

Luk

ndê ñawaê ñayham

Yom whê ñawaê ñayham dindéc sa-nga

Luk in Yisu ndê ngacsênom dom, ma in ngac Israel-nga dom. In ngac Grik-nga, ma in dokta, ma bocdinañ tanjalê bu in ngac tiguauc. Luk dau gêlic gêñ hoñ nañ Yisu kôm, nañ dom, magoc in kip yom hoñ sa yêc lau nañ sêmbo sêwhiñ Yisu têtñ ndoc in gic hu ndê gwelêñ e in mbu pi undambê gi (1:1-4). Luk ndê ñawaê ñayham hêganônñ Yisu ti in ndê gwelêñ, ma in to bapia dañ tiyham (Aposel) pi gwelêñ nañ lau aposel sêkôm ña ñalau Dabuñ ndê ñaclai.

Yêc in ndê yom ñamata-nga, Luk sôm bu in to yom têtñ ngac atu dañ ñaê Tiopilas. Ñaê dau danem kwi bu 'ngac nañ atac whiñ Anötö.' Magoc in to tu ngac tigeñ dinañ-nga dom, in to ndê ñawaê ñayham hêganônñ lau nañ lau Israel dom gitôm in dau, ma lau Israel-nga sêwhiñ. In tac whiñ bu ñac sêñyalê bu Yisu, in lau Israel-nga si Mesaya, ma in meñ gic waê lau Israel-nga tawasê dom, magoc meñ bu ti lau hoñ si Pômdau, ma bu mbac ndu tu lau hoñ-nga. Ma bocdinañ Luk tac whiñ bu Yisu ndê ñawaê sa têtñ gameñ nom-nga hoñ, bu lau sêñgô ma sêkêñ whiñ Yisu, dec oc sêtap Anötö ndê mwasin nem ñac si-nga sa.

Yom Ñamata-nga

1 O ngac atu Tiopilas. Lau daêsam sêñsahê bu sêto yom pi gêtñ hoñ nañ ñandô sa yêc yac mba gameñ. ²Ñac sêto sêñkuc yom nañ lau nañ sêmbo sêwhiñ Yisu têtñ ndoc in gic hu ndê gwelêñ, nañ sic dulu têtñ yac. Lau dau sêlic gêtñ hoñ nañ Yisu kôm pi tandô, dec sêhoc ñawaê ñayham asê pi gêtñ dau. ³Ma aô bocdinañ, gakip yom hoñ sa pi gêtñ ñamata-nga ma meñ têtñ kwahic dec, ma galic ñayham bu wato sip bapia dindéc ma wanñin têtñ am. Aô gato yom kakuc ñadênañ tôm gêtñ hoñ nañ hôc asê. Tu dinañ-nga O ngac atu Tiopilas, ⁴am oc êmyalê bu yom hoñ pi Yisu nañ am ñgô su, nañ yom ñandô.

Jon, Ñgac Kêku Lau-nga ndê puc dinda kôc in-nga

⁵Têtñ têtñ Kin ñHerod gêm gôlin gameñ Judia-nga, nañ ñdabuñsiga dañ mbo, in ndê ñaê Sekaria. In kôm ndê gwelêñ whiñ dabuñsiga nañ

sêmbo dabuŋsiga ŋamata-ŋga Abaisa^a ndê toŋ. Sekaria ndê awhê ndê ŋaê Elisabet, ma iŋ Aron^b ndê wakuc daŋ, gitôm Sekaria dau. ⁶Anötö gêlic iŋlu sêsa lêŋ gitêŋ yêc iŋ aŋgô-ŋga, sêŋsêlêŋ sêŋkuc Anötö ndê yomsu ti ŋagôliŋ ŋalêŋ ŋayham. ⁷Iŋlu sêti awhê andô ma ŋgac andô su, magoc balêkoc mba, bu Elisabet iŋ awhê gapoc.

⁸Têŋ têm daŋ Sekaria ndê toŋ si ndoc sênem akiŋ Anötö-ŋga hóc asê, ma iŋ gêm ndê gwelêŋ dabuŋsiga-ŋga mbo Anötö ndê lôm dabuŋ yêc Jerusalem. ⁹Ma gitôm dabuŋsiga si mêtê, sêpuc gapoc gi sip Sekaria, bu sôc lôm dabuŋ ŋalôm ndi, ma kêŋ da ŋamalu ŋayham. ¹⁰Ma têtŋ ndoc iŋ sôc gi bu kêŋ da ŋamalu ŋayham, naŋ lau Israel-ŋga hoŋ naŋ sêkac sa tu s êtoc Anötö sa-ŋga, naŋ sêteŋ mbec sêlhac awê. ¹¹Têtŋ ndoc dinaŋ Pômdau ndê aŋela daŋ hoc dau asê têtŋ Sekaria, ma kalhac alta da ŋamalu-ŋga ŋandô-ŋga. ¹²Têtŋ ndoc Sekaria tandô pi aŋela dau, iŋ sô ti töc dau ŋandô. ¹³Magoc aŋela sôm têtŋ iŋ, “Töc daôm dom Sekaria, bu Pômdau ŋgô mbec naŋ am teŋ. Am nem awhê Elisabet oc kôc atômŋgac daŋ, ma am oc sam iŋ ndê ŋaê bu Jon. ¹⁴Iŋ oc kôm am atac ŋayham atu, ma lau daêsam oc sêtisambuc tu dinda kôc iŋ-ŋga, ¹⁵bu iŋ oc ti ŋgac tiwaê yêc Pômdau aŋgô-ŋga. Iŋ oc nôm wain me bu ŋaŋga dom, magoc têtŋ têm iŋ yêc dinda atac ŋalôm eŋ, naŋ ŋalau Dabuŋ oc nem iŋ ahuc, ma mbo whiŋ iŋ ŋapaŋ. ¹⁶Ma têtŋ ndoc iŋ tiatu, naŋ iŋ oc nem lau Israel-ŋga daêsam kwi, sêmbu sêsôc Pômdau ŋac si Anötö ŋapu. ¹⁷Iŋ oc ti propet ŋaŋga ma ti ŋaclai gitôm propet ŋamata-ŋga Elaija. Ma iŋ oc muŋ Pômdau, bu nem lau daêsam si ŋalôm kwi. Dambai oc atac whiŋ atui, ma lau daŋgapêc oc sêti lau ti gauc naŋ sêsa si lêŋ gitêŋ. ŋalêŋ dinaŋ iŋ oc êmasaŋ lau si ŋalôm bu sêkôc Pômdau sa.”

¹⁸Sekaria ŋgô aŋela ndê yom dinaŋ su, goc sôm têtŋ iŋ, “Alu ati awhê andô ma ŋgac andô su. Boc-dinaŋ ŋalêŋ bocke dec aö wanyalê bu am nem yom oc ŋandô sa?” ¹⁹Goc aŋela ô yom ma sôm, “Aö Gabriel naŋ galhac Pômdau aŋgô-ŋga, ma iŋ kêkiŋ aö bu wahoc ŋawaê ŋayham dindec asê têtŋ am. ²⁰Gêŋ naŋ aö gasôm yom pi, naŋ oc ŋandô sa tôm ŋandoc. Tigeŋ am kêŋ whiŋ aö dom, ma bocdinaŋ am oc awham mba sa, ma sôm yom dom e gêtŋ hoŋ dindec hóc asê su.”

²¹Têtŋ dinaŋ lau naŋ sêmbo awê, naŋ sêhônŋ Sekaria ma gauc gêm bu bocke ma iŋ mbo tiwandêc yêc lôm dabuŋ ŋalôm. ²²Ma têtŋ ndoc Sekaria

^a 1:5 Abaisa - dabuŋsiga ŋamata-ŋga daŋ naŋ mbo têtŋ Kiŋ Dawid ndê têm. Têtŋ têm dinaŋ lau Israel si dabuŋsiga sêwhê dau kôc ti toŋ 24 kêkuc dabuŋsiga ŋamata-ŋga si ŋaê (1 Kr 24:7-19 ma Nia 12:11-17). Ma tiŋambu sêkôm gwelêŋ tôm ŋatoŋ 24 dinaŋ sêyô dau sêyô dau. Têtŋ Yisu ndê têm, lau dabuŋsiga daêsam sêndôc gameŋ ŋamakê-ŋga, ma sêpi Jerusalem tu sêkôm gwelêŋ yêc †lôm dabuŋ tôm ŋac si toŋ si ndoc, ma tiŋambu sêmbu sêtêŋ si gameŋ si (Luk 1:8, 23). Alic yom whê ŋaê ‘dabuŋsiga’ sa-ŋga yêc buku dindec ŋambu-ŋga. ^b 1:5 Aron - lau Israel si dabuŋsiga ŋamata-ŋga naŋ gêm akiŋ Anötö têtŋ Moses ndê têm. Alic Eks 7:1-6 ma 28:1.

mbu sa awê gi, naŋ gitôm dom bu sôm yom, ma gic amba ŋambwa têtŋ ŋac, dec ŋac si gauc sa bu iŋ gêlic gêtŋ ŋagatu daŋ yêc lôm dabuŋ ŋalôm.

²³Tiŋambu iŋ ndê bêc gwelen-ŋga pacndê, ma iŋ kölhö mbu têtŋ ndê malac gi. ²⁴Ma iŋ ndê awhê Elisabet daê, dec timêtê dau ŋapep, ma mbo teŋ mbo iŋlu si andu gitôm ayô amanŋdaŋ. Elisabet sôm, ²⁵“Pômdau kôm gêtŋ dindec ma gêm aô sa. Ŋamata-ŋga aô gambo ti mayanŋ yêc lau aŋgô-ŋga, bu aô awhê gapoc, tigeŋ kwahic dec Pômdau tawalô aô, ma kôc aô mayanŋ su.”

Yisu ndê puc dinda kôc iŋ-ŋga

²⁶Elisabet daê gitôm ayô 6 su, goc Anötö kêkiŋ aŋela Gabriel têtŋ malac Nasaret naŋ yêc gameŋ Galili-ŋga, ²⁷bu kêtŋ aheŋ têtŋ awhê akiŋ daŋ. Iŋ ndê ŋaê Maria, ma lau sêhoc yom asê su bu Maria oc nem ŋgac daŋ ŋaê Josep, naŋ Kiŋ Dawid ndê apanŋgac daŋ. ²⁸Aŋela dau têtŋ Maria gi ma sôm, “O awhê naŋ Anötö tac whiŋ am ndu andô, Pômdau whiŋ am.” ²⁹Yom dau kôm Maria sô ŋandô, ma iŋ gauc gêm têtŋ dau bu, “Iŋ awha gic aô tu sake-ŋga?” ³⁰Goc aŋela sôm têtŋ iŋ, “Tôc daôm dom Maria, bu Anötö gêlic am ŋayham kêlêc. ³¹Am oc daêm ma kôc balêkoc ŋgac daŋ, ma sam iŋ ndê ŋaê bu Yisu. ³²Iŋ oc ti ŋgac tiwaê, ma lau oc sêsam iŋ bu Anötö Ŋaclai ti Ŋawasi Ŋadau ndê Atu. Pômdau Anötö oc kêtŋ iŋ wêkaiŋ apanŋgac Dawid ndê pôtŋ kiŋ-ŋga. ³³Iŋ oc nem gôliŋ †Jakob ndê wakuc lau Israel-ŋga, ma iŋ ndê gôliŋ oc pacndê dom.”

³⁴Goc Maria ndac aŋela dau bu, “Aô gayêc gawhiŋ ŋgac daŋ dom, ma bocdinaŋ yom dau oc ŋandô sa ŋalêtŋ bocke?” ³⁵Ma aŋela ô yom ma sôm, “Ŋalau Dabuŋ oc têtŋ am meŋ, ma Anötö, Ŋaclai ti Ŋawasi Ŋadau ndê ŋaclai oc nem am ahuc. Tu dinaŋ-ŋga balêkoc dabuŋ naŋ am oc kôc, naŋ lau oc sêsam iŋ bu Anötö ndê Atu. ³⁶Ma am ŋgô! Elisabet, awhê andô naŋ yêc am apami si toŋ, naŋ daê ma oc kôc balêkoc daŋ. Sêsôm bu iŋ awhê gapoc, magoc kwahic iŋ daê tôm ayô 6 su. ³⁷Bu gêtŋ daŋ yêc dom, naŋ Anötö gitôm dom bu kôm ŋandô sa.” ³⁸Ma Maria ô yom ma sôm, “Pômdau ndê awhê akiŋ aô. Bocdinaŋ, yom naŋ am sôm, naŋ ŋandô sa pi aô.” Maria sôm yom dinaŋ su, goc aŋela hu iŋ siŋ.

Maria gic Elisabet kêsi

³⁹Têtŋ têtŋ dinaŋ Maria kêmasaŋ dau, ma kêsêlêŋ ŋagahô têtŋ malac daŋ yêc gameŋ ŋabaô Judia-ŋga gi. ⁴⁰Iŋ hôc asê ma têtŋ Sekaria ndê andu gi, ma ta Elisabet ndê ŋaê. ⁴¹Têtŋ têtŋ Elisabet ŋgô Maria ndê yom, naŋ balêkoc naŋ yêc iŋ ŋalôm kwê soc ti ŋaŋga, ma Ŋalau Dabuŋ gêm Elisabet ahuc. ⁴²Ma iŋ sôm yom awha atu, “Anötö toc am sa hôc gêlêc lauwhê sambob su, ma oc toc balêkoc naŋ am oc kôc, naŋ sa bocdinaŋ. ⁴³Aô awhê bocke, dec am, aneŋ Pômdau dinda mweŋ bu lic aô? ⁴⁴Têtŋ ndoc aô gaŋgô am mbwêc aô, naŋ balêkoc naŋ yêc aô ŋatac, naŋ kwê soc

ti atac ñayham. ⁴⁵Am kêñ whiñ bu Pômdau ndê yom p i am oc ñandô sa, ma tu dinañ-ñga am tap iñ ndê mwasiñ sa!”

Maria po Anötö ndê waê sa

⁴⁶⁻⁴⁷Ma Maria sôm:

“Aö wapo Pômdau ndê waê sa ti aneñ ñalôm sambuc, ma aö atac ñayham kêlêc tu Anötö nañ gêm aö si-ñga. ⁴⁸Ñahu bu iñ kêlhiñ iñ ndê awhê akiñ ñambwa, aö dec siñ dom. Têñ kwahic dec ma ndi, lau hoñ oc sêsam aö bu awhê nañ Anötö kêmwasiñ. ⁴⁹Iñ Ñaᅇga Ñadau nañ kôm gêñ atu têtñ aö, ma iñ ndê ñaê dabuñ.

⁵⁰Tôm têtñ sambob, iñ tawalô lau hoñ nañ sêtôc iñ ma sêtoc iñ sa. ⁵¹Iñ amba ñaᅇga kôm gêñ atu, ma lau nañ yom sêtoc dau sa-ñga gêm ñac si ñalôm ahuc, nañ iñ soc ñac su sêlhö têtñtêtñ. ⁵²Iñ kêmasuc kiñ nom-ñga su yêc ñac si pôn kiñ-ñga, magoc lau nañ sêñgwininñ dau, nañ iñ toc ñac sa.

⁵³Iñ kêmwasiñ lau ñalôm sawa ña gêñ ñayham-ñayham, magoc iñ kêkiñ lau ti lêlôm sêsa amba sawa si. ⁵⁴⁻⁵⁵Iñ gêm iñ ndê lau akiñ Israel-ñga sa, ma tøm yom nañ iñ gic bata têtñ abañ Abraham, ma têtñ iñ ndê wakuc hoñ nañ sêñkuc iñ, nañ iñ tawalô ñac.”

⁵⁶Maria kêpiñ Anötö ma sôm yom dinañ su, goc mbo whiñ Elisabet gitôm ayô tö, ma tiñambu iñ kôlhö mbu têtñ ndê malac gi.

Elisabet kôc Jon

⁵⁷Elisabet ndê ndoc meñ sa dec iñ kôc balêkoc ñgac dañ. ⁵⁸Ma iñ ndê dawai ti lau meñpañ iñ-ñga sêñgô bu Pômdau tawalô iñ ñalêñ dinañ, ma ñac hoñ atac ñayham sêwhiñ iñ. ⁵⁹Têtñ balêkoc dau ndê bêc ti-8-ñga, ñac hoñ sêmeñ bu sêsê balê ndê ñamlic ñatô su sêñkuc lau Israel-ñga si ðpwac, ma ñac tac whiñ bu sêkêñ damba Sekaria ndê ñaê pi iñ. ⁶⁰Tigeñ iñ dinda sôm, “Mba! Dasam iñ ndê ñaê bu Jon.” ⁶¹Ma sêsôm têtñ iñ, “Yêc am nem dawam, ñgac ñaê Jon dañ mbo dom.” ⁶²Ma ñac sic amba têtñ damba bu sêñyalê ñaê bocke iñ tac whiñ. ⁶³Iñ kôm ña amba bu sêkêñ tapele dañ têtñ iñ, dec sêkêñ ma iñ to, “Iñ ndê ñaê Jon,” goc lau hoñ sêhêdaê. ⁶⁴Ma ñagahô iñ êmbala tigoloñ, ma iñ sôm yom asê ma kêpiñ Anötö.

⁶⁵Gêñ dau kôm ñac lau hoñ sêsö, ma lau nañ sêmbo Judia ñagameñ lôc-ñga, nañ sem yom-galôm ñapañ pi gêñ hoñ dinañ. ⁶⁶Lau hoñ sêñgô ñawaê, ma ñac gauc gêm yom dau ñapañ yêc ñac si ñalôm. Ma ñac sêlic bu Pômdau ndê ñaclai tôte dau asê yêc balê dau, dec sêndac dandi, “Iñ oc ti ñamalac kaiñ bocke?”

Sekaria hoc yom asê gitôm propet

⁶⁷Têtñ têtñ dinañ Ñalau Dabuñ gêm Jon ndê damba Sekaria ahuc, ma iñ hoc yom asê gitôm propet dañ ma sôm,

68 “Tampin̄ Pômdau, yac lau Israel-nga neŋ Anötö, bu in̄ meŋ bu nem in̄ ndê lau si. 69In̄ po ngac ti ŋaclai daŋ sa yêc in̄ ndê ngac akiŋ Dawid ndê lau wakuc, naŋ gitôm bu nem yac si. 70Anötö ndê propet dabuŋ sêhoc yom asê pi gêŋ dau muŋ su, ma kwahic dec Anötö kôm yom dau ŋandô sa. 71In̄ kêmasaŋ lêtŋ dinaŋ, bu nem yac si yêc yac neŋ ŋacyo ti lau naŋ sêtec yac amba. 72In̄ tawalô yac, tôm in̄ gic bata têtŋ abaŋi, ma gauc gêm in̄ ndê pwac dabuŋ, 73naŋ in̄ kêmatin̄ tidônŋ whiŋ abaŋ Abraham. 74In̄ oc nem yac si yêc yac neŋ ŋacyo amba, tu bu yac danem akiŋ in̄ ti atac pa su, 75ma tu bu taŋsêlêtŋ dasa lêtŋ gitêtŋ ti dabuŋ yêc in̄ aŋgô-nga tôm bêc hoŋ. 76Ma Jon, aneŋ balê, lau oc sêsam am bu ‘Anötö, ŋaclai ti ŋawasi ŋadau ndê propet,’ bu am oc muŋ Pômdau ma êmasaŋ lau si ŋalôm tu sêkôc in̄ sa-nga. 77Ma am oc whê Anötö ndê lau si gauc sa pi lêtŋ naŋ in̄ oc suc ŋac si sac kwi tu bu nem ŋac si-nga. 78Yac neŋ Anötö ndê lêtŋ tawalô yac-nga, naŋ oc tôm ac naŋ pi ma kalhac umbonŋ, 79ma pô lau naŋ sêndöc gameŋ ŋasec, ma lau naŋ sêmpin̄ bu sêmbac ndu. In̄ oc wê yac dasa seŋ bu datap yom malô sa.”

80Tiŋambu balê dau tiatu, ma kêŋ ndê ŋalôm sambuc tu nem akiŋ Anötö-nga. Ma in̄ mbo gameŋ sawa e tôm bêc naŋ in̄ gic hu ndê gwelenŋ, dec gêm mêtê kalhac lau Israel aŋgô-nga.

Maria kôc Yisu

2 ¹Têtŋ têm dinaŋ †Sisa Ogasta gic atu yom bu sêsê lau hoŋ naŋ sêmbo Rom si gôlin̄ ŋapu, naŋ sa tu bu sênemlhi takis-nga. ²(Têtŋ ndoc dinaŋ Kirinius gêm gôlin̄ gameŋ Siria-nga, ma gêŋ dinaŋ ti têm ŋamata-nga naŋ sêsê lau sa yêc in̄ ndê gôlin̄ ŋapu.) ³Bocdinaŋ lau hoŋ sêtêtŋ si malachu si, bu sêto si ŋaê sip bapia sêsê ŋac sa-nga.

⁴Josep in̄ Dawid ndê wakuc daŋ, ma bocdinaŋ in̄ hu malac Nasaret yêc gameŋ Galili-nga siŋ, ma sip têtŋ Dawid ndê malac yêc gameŋ Judia-nga gi, malac naŋ sêsam bu Betlehem. ⁵Josep lu Maria sêwhiŋ dau si bu sêkêŋ si ŋaê, bu sêhoc in̄lu si yom asê su bu oc sênem dau. Ma Maria daê mbo. ⁶Têtŋ ndoc in̄lu sêmbo Betlehem, naŋ Maria ndê bêc bu kôc balêkoc-nga hôc asê. ⁷Josep lu Maria sêyêc bôc si mala, bu ŋasawa mbasi yêc andu ŋacleŋ-nga. Ma yêc dê, Maria kôc in̄ ndê balêkoc ŋac ŋamata-nga. Ma in̄ kôm in̄ si ŋa po, ma kêŋ in̄ yêc bôc si apa sêneŋ gêtŋ-nga.

Aŋela sêhoc Yisu ŋawaê asê

⁸Têtŋ ôbwêc dinaŋ lau ŋatô sêyob si domba sêmbo malac dau ŋamakê. ⁹Ma Anötö ndê aŋela daŋ hoc dau asê têtŋ ŋac. Pômdau ndê ŋawê pô ŋac, ma sêtöc dau ŋandô. ¹⁰Goc aŋela dau sôm têtŋ ŋac bu, “Atöc daôm dom! Aö bu wakêŋ ŋawaê ŋayham daŋ têtŋ mac, naŋ oc kôm mac atac ŋayham

atu. Ma ηawaê dindéc gic waê lau hoη. ¹¹Mac nem ηgac nem mac si-ηga hôc asê têtj bêc dau dindéc. Iη dinda kôc iη yêc Betlehem, malac naη sêsam bu Dawid ndê malac. Iη †Mesaya dau naη Anötö gic bata bu êηkiη meη, ma mac nem Pômdau dau. ¹²Atêtj Betlehem andi, ma mac oc aηyalê balêkoc dau pi gêtj bocdec bu. Sêkôm iη si ηa po, ma sêkêtj iη yêc bôc si apa sêneη gêtj-ηga.” ¹³Ma ηgaghô aηela undambê-ηga daêsam sêhoc dau asê sêwhiη aηela dinaη, ma sem wê sêmpinη Anötö bocdec bu, ¹⁴“Anötö ndê waê sa yêc lôlôc. Ma yom malô yêc nom, têtj lau naη Anötö gêlic ηac ηayham.”

Lau sêyob domba-ηga sêtêtj Betlehem si

¹⁵Aηela sem wê dinaη su, goc sêmbu sêpi undambê si. Ma lau sêyob domba-ηga sêsôm têtj dandi, “Ayôc! Datêtj Betlehem dandi, ma dalic gêtj atu naη Pômdau ndê aηela sêhoc asê têtj yac.” ¹⁶Goc sêηsahic dau sêtêtj Betlehem si, ma sêtap Maria lu Josep sa, ma sêlic balêkoc dau yêc bôc si apa sêneη gêtj-ηga. ¹⁷Sêlic iη su goc sêsa si, ma sic miη yom naη aηela hoc asê têtj ηac pi balêkoc dau. ¹⁸Ma lau hoη naη sêηgô ηac si yom, naη sêhêdaê ηandô. ¹⁹Magoc Maria gauc gêm yom hoη ηapaη yêc ndê ηalôm. ²⁰Ma lau sêyob domba-ηga sêlhô sêmbu sêtêtj gameη sêyob domba-ηga si. Sêmpinη Anötö ma sêtoc iη ndê waê sa tu gêtj hoη naη sêηgô ti sêlic, naη gitôm aηela sôm asê têtj ηac.

Sêtôc Yisu yêc lôm dabuη

²¹Têtj bêc 8 giηga su, sêsê balê ndê ηamlic ηatô su, kêkuc lau Israel-ηga si pwac. Ma sêsam iη ndê η aê Yisu, tôm aηela sam iη têtj ndoc iη kêη puc Maria bu iη oc daê.

²²Muη-ηga, Moses to yomsu daη pi lauwhê Israel-ηga naη sêkôc balêkoc, naη yêc bocdec bu. Sêhôn e bêc 40 pacndê, goc ηac oc ηawasi sa tiyham yêc Anötö aηgô-ηga. Bocdinaη têtj Maria ndê bêc 40 pacndê su, goc iηlu Josep sêkôc Yisu sêtêtj lôm dabuη yêc malac Jerusalem si, bu sêtôc iη yêc Pômdau aηgô-ηga. ²³Sêkôm bocdinaη kêkuc Pômdau ndê yomsu naη Moses to bocdec bu, “Asam balêkoc ηgac mbêc hoη bu dabuη yêc Pômdau aηgô-ηga.” ²⁴Ma têtj têm dinaη iηlu sêkêtj da bu Maria ηawasi sa tiyham. Sêkêtj da tôm Pômdau ndê yomsu, balusi lu me mbac sauη lu.

²⁵Têtj têm dinaη ηgac daη ηaê Simeon mbo Jerusalem. Iη ηgac gitêtj ti dabuη, ma iη hôη ndoc bu Anötö êηkiη iη ndê Mesaya bu nem lau Israel-ηga si. ηalau Dabuη whiη iη tôm bêc hoη, ²⁶ma têtj ndoc daη, kêη gauc têtj iη bu iη oc mbo tali e lic Mesaya naη Pômdau gic bata. ²⁷Ma ηalau Dabuη wê Simeon têtj lôm dabuη gi, têtj bêc naη Yisu dinda lu damba sêkôc iη sêmeη bu sêkêtj da sêηkuc Moses ndê yomsu. ²⁸Iη pê Yisu sa, goc kêpiη Anötö ma sôm, ²⁹⁻³⁰“O Pômdau atu, yom naη am gic bata su,

naŋ kwahic dec ŋandô sa. Aô tanôŋ galic am nem †Ŋgac Nem Lau Si-ŋga su, ma bocdinaŋ dec oc tôm bu am nem ŋgac akiŋ aô dec wambac ndu ti atac malô. ³¹Am kêmasaŋ lêŋ dindéc yêc lau hoŋ aŋgô-ŋga. ³²Am nem ŋawê oc pô lau hoŋ, bu tôc am asê têtŋ lau gameŋ apa-ŋga, ma bu po am nem lau Israel-ŋga si waê sa.”

³³Simeon sôm yom dinaŋ pi Yisu, dec kôm Yisu dinda lu damba sêhêdaê. ³⁴Goc Simeon gêm mbec ŋac, ma sôm têtŋ Yisu dinda Maria, “Anötö kêyaliŋ balê dindéc sa, ma tu iŋ-ŋga lau Israel-ŋga daêsam oc sêpeŋ, magoc daêsam naŋ sêkêŋ whiŋ iŋ, naŋ oc sêtap Anötö ndê mwasiŋ sa. Iŋ meŋ bu tôc Anötö ndê lêŋ asê têtŋ lau, magoc daêsam oc sêpu iŋ ti ndê yom, ³⁵ma ŋalêŋ dinaŋ gauc naŋ yêc lau daêsam si ŋalôm, naŋ oc meŋ sa tiawê. Ma tu gêtŋ naŋ oc hóc asê iŋ-ŋga, am daôm oc hóc ŋandê atu tôm bieŋ kuŋ am ŋatê.”

³⁶Propet awhê daŋ mbo lôm dabuŋ ŋabatêmdö. Iŋ ndê ŋaê

Ana, ma iŋ damba iŋ Paniel, naŋ yêc Aser ndê toŋ.^c Ana iŋ ti awhê andô su. Muŋ-ŋga iŋ gêm ŋgac su ma iŋlu nakweŋ sêmbo sêwhiŋ dau gitôm yala 7, ³⁷goc nakweŋ mbac ndu ma Ana ti awhê sawa ma mbo e iŋ ndê yala ti 84. Tôm acsalô ti ôbwêc hoŋ iŋ gêm akiŋ Anötö mbo lôm dabuŋ ŋabatêmdö, ma têm daêsam iŋ hu gêtŋ danêŋ-ŋga siŋ tu nem dabuŋ dau ti teŋ mbec ŋaŋga-ŋga. ³⁸Têtŋ têm naŋ Simeon ndê yom pi Yisu pacndê, naŋ Ana têtŋ ŋac gi, ma gêm daŋge Anötö. Ma iŋ gic hu sôm yom pi balêkoc têtŋ lau hoŋ naŋ sêhôn ndoc naŋ Anötö oc nem lau Jerusalem ti Israel-ŋga si.

³⁹Josep lu Maria sêkôm gêtŋ hoŋ tôm Pômdau ndê yomsu sôm, goc sêmbu sêtêtŋ ŋac si malac Nasaret yêc gameŋ Galili-ŋga si. ⁴⁰Ma Yisu tiatu ma ti balê ti licwalô. Ma gauc ŋayham ma Anötö ndê mwasiŋ gêm iŋ ahuc.

Yisu mbo lôm dabuŋ

⁴¹Tôm yala hoŋ Maria lu Josep sêpi Jerusalem si, bu sêlic om atu †Pasowa-ŋga. ⁴²Têtŋ Yisu ndê yala ti 12, naŋ ŋac hoŋ sêpi si, tôm iŋlu si gêbôm. ⁴³Ma têtŋ ndoc Mwasiŋ Pasowa-ŋga pacndê, goc Maria lu Josep sêhu Jerusalem siŋ bu sêmbu sêtêtŋ iŋlu si malac sêndi. Yisu gacgeŋ mbo Jerusalem, magoc iŋlu sêŋyalê dom, ⁴⁴bu sêŋsêlêŋ sêmbo seŋ sêwhiŋ lau toŋ atu, dec sem gauc bu iŋ oc mbo lau toŋ atu dinaŋ ŋalôm. Sêhu Jerusalem siŋ sêsa si gitôm bêc daŋ, goc sêŋsalê iŋ yêc ŋac si lau. ⁴⁵Sêtap iŋ sa dom, dec bêc tilu-ŋga iŋlu sêmbu sêtêtŋ Je rusalem si, bu sêŋsalê iŋ. ⁴⁶Sêhóc asê Jerusalem, ma ŋagalaŋsê sêtap iŋ sa yêc lôm dabuŋ. Iŋ ndóc whiŋ lau naŋ sêndôhôn mêtê, ma iŋ kêtŋ daŋga ŋac si yom. Ma iŋ ndac

^c 2:36 Aser - Jakob ndê atui 12 si daŋ. Lau Israel sêwhê dau kôc ti toŋ 12 sêŋkuc apai 12 dinaŋ (alic Gen 35:26).

ɲac pi gêŋ daêsam. ⁴⁷Lau hoŋ naŋ sêŋgô iŋ, naŋ sêhêdaê tu iŋ ndê gauc-ɲga, ma tu yom hoŋ naŋ iŋ ô têŋ kêdôhônɲaga-ɲga.

⁴⁸Têŋ ndoc Maria lu Josep sêlic iŋ, naŋ sêhêdaê. Ma Maria ndac iŋ, “Aneŋ balê, tu sake-ɲga am kôm gêŋ dindéc têŋ alu damam? Alu aŋsalê am ti ɲalôm ɲawapac.” ⁴⁹Ma Yisu ndac iŋlu, “Tu sake-ɲga amlu aŋsalê aô? Damaŋ ndê andu dindéc, ma aô gac waê bu wambo dec.” ⁵⁰Tigeŋ ɲac sêŋyalê iŋ ndê yom ɲahu dom.

⁵¹Goc Yisu whiŋ iŋlu, ma sêmbu sêtêŋ malac Nasaret si, ma iŋ danɲa wambu têŋ iŋlu ɲapep. Ma iŋ dinda gauc gêm yom hoŋ dinaŋ ɲapaŋ yêc ndê ɲalôm. ⁵²Ma Yisu tiatu ma ti ɲgac tiguauc, ma Anötö ma ɲamalac hoŋ sêlic iŋ ɲayham.

Jon, ɲgac Kêku Lau-ɲga kêmasaŋ Yisu ndê seŋ
(*Mat 3:1-12; Mak 1:2-8*)

3 ¹Tiŋambu Taibirias ti lau Rom-ɲga si kiŋ atu,^d ma têŋ iŋ ndê yala ti-15-ɲga, naŋ iŋ ndê la u bata bocdec sem gôliŋ lau Rom-ɲga si gameŋ ɲatô. Pontias Pailot gêm gôliŋ gameŋ Judia-ɲga, †Herod Antipas gêm gôliŋ Galili, Herod ndê dôwa Pilip gêm gôliŋ Ituria ma Trakonitas, ma Lisanias gêm gôliŋ Abelin. ²Ma Anas lu Kayapas sêti l au Israel-ɲga si †dabuŋsiga ɲamata-ɲga. Têŋ ndoc dinaŋ Anötö kêkiŋ iŋ ndê yom têŋ Jon, Sekaria ndê atuŋgac naŋ mbo gameŋ sawa. ³Bocdinaŋ Jon gic hu iŋ ndê gwelenɲ. Iŋ golom-golom malac hoŋ naŋ yêc Bu Jordan ɲamakê, ma gêm mêtê bu lau sêliŋ saŋgu tu bu sêtôc asê bu sêkac si ɲalôm kwi ma sêhu mêtê sac siŋ, dec Anötö oc suc ɲac si sac kwi.

⁴Propet Aisaya hoc yom asê pi Jon muŋ su, tôm iŋ to yêc ndê buku bocdec bu:

ɲamalac dan ta yom yêc gameŋ sawa bocdec bu, ‘Amasaŋ Pômdau ndê seŋ. Amasaŋ nem ɲalôm bu akôc iŋ sa.

⁵Busuŋ hoŋ oc sêti gameŋ apa-pa, ma lôc ti ɲabaö hoŋ oc sêti gameŋ gapoŋ. Seŋ mbwê hoŋ oc sêtisolop, ma seŋ hoc-hoc oc sêti seŋ ɲayham.

⁶Ma lau nom-ɲga hoŋ oc sêlic Anötö ndê lêŋ nem lau si-ɲga.’

[Ais 40:3-5]

⁷Ma tu dinaŋ-ɲga Jon sôm têŋ lau daêsam naŋ sêsa si bu iŋ êŋku ɲac, “Mac mboc ɲatui mac! Tu sake-ɲga mac alhö ameq? Mac akôc gauc pi Anötö ndê atac ɲandê naŋ lau propet sêkêŋ puc yac bu oc meŋ sa, dec gauc gêm bu ameq ma aliŋ busaŋgu ɲambwa, a? ⁸Aŋgô! Akôm mêtê ɲayham naŋ tôc asê bu mac am daôm kwi yomandô. Asôm têŋ daôm dom, bu ‘Abraham apai yac, ma tu dinaŋ-ɲga Anötö oc kôc yac sa.’ Aö wasôm têŋ mac bu Anötö gitôm bu nem hoc hoŋ dindéc kwi sêti

^d 3:1 Kiŋ atu naŋ gêm gôliŋ gameŋ Rom-ɲga hoŋ naŋ sêsam bu †Sisa.

Abraham atui sêd mac. ⁹A hoŋ naŋ sem ŋandô ŋayham dom, naŋ kwahic dec Anötö kêŋ ki ŋamata têtŋ ŋawakac, ma iŋ oc lêtŋ su ma tuc pi ya ndi.”

¹⁰Lau toŋ atu dinaŋ sêŋgô Jon ndê yom ma sêndac iŋ, “Bocdinaŋ yac oc akôm sake?” ¹¹Ma iŋ ô yom ma sôm, “Tamwalô lau ŋatô. Mac nem asa ndê ŋakwê ŋandô-ŋga lu bu sêyêc, naŋ kêŋ daŋ têtŋ lau naŋ si ŋakwê mbasi. Ma asa ndê gêtŋ daneŋ-ŋga yêc, naŋ nem lau naŋ sêpônda dau, naŋ sa bocdinaŋ.”

¹²Lau sêkôc takis-ŋga ŋatô sêsa si bu Jon êŋku ŋac, ma sêndac, “Kêdôhônŋwaga, yac oc akôm sake?” ¹³Goc Jon sôm têtŋ ŋac, “Akôc takis ŋapep, ma ahôc gêlêc dôhônŋ naŋ lau Rom-ŋga sêkêŋ, naŋ dom!”

¹⁴Ma lau siŋ-ŋga ŋatô sêndac iŋ, “Ma yac, oc akôm sake?” Ma iŋ sôm, “Aŋgôliŋ yom tasanŋ pi lau, me akôm gêtŋ ti ŋaclai bu aŋgaho ŋac si mone me gêtŋ dom. Akôc ŋaôli gwelenŋ-ŋga naŋ lau Rom-ŋga sêkêŋ têtŋ mac, ma tamgatu awa ŋatô dom.”

¹⁵Têtŋ têtŋ dinaŋ lau Israel-ŋga sêkêŋ bata bu Anötö oc êŋkiŋ iŋ ndê Mesaya, ma lau hoŋ naŋ sêŋgô Jon, naŋ sêhê gauc bu mboe iŋ Mesaya dau. ¹⁶Magoc Jon sôm têtŋ lau hoŋ, “Ŋgac daŋ oc meŋ hóc asê. Iŋ ndê ŋaclai hóc gêlêc aô neŋ su. Aô ŋgac ŋambwa, gitôm dom bu wati iŋ ndê ŋgac akiŋ naŋ kêgapwêc iŋ ndê atapa ŋawalô. Aô dec kaku mac ŋa bu ŋambwa, tigenŋ iŋ oc êŋku mac ŋa Ŋalau Dabuŋ ti ya. ¹⁷Iŋ meŋ bu êŋsahê lau, gitôm ŋgac naŋ whê wit ŋandô ti ŋapa kôc, dec oc ndic ŋandô sa sôc andu gêtŋ ŋandô-ŋga, ma tuc ŋapa sip ya naŋ sa ŋapanŋ ndi.” ¹⁸Ŋalêŋ dinaŋ Jon hoc ŋawaê ŋayham asê têtŋ lau, ma gêm la ŋac ŋa yom ŋaŋga daêsam.

¹⁹Tiŋambu Jon puc Kiŋ Herod ndê giso asê, bu Herod gêm iŋ asi ndê awhê Herodias, ma kôm mêtê sac daêsam whiŋ. ²⁰Dec Herod gêm dau si, ma kôm giso daŋ tiyham bocdec bu, iŋ kêŋ Jon ndôc gapocwalô.

Jon kêku Yisu

(Mat 3:13-17; Mak 1:9-11; Jon 1:32-34)

²¹Têtŋ têtŋ naŋ Herod kêŋ Jon ndôc gapocwalô su dom, naŋ Yisu sa têtŋ Jon gi, ma Jon kêku iŋ whiŋ. Tiŋambu Yisu kalhac ma teŋ mbec mbo, ma undambê kac sa, ²²ma Ŋalau Dabuŋ gêm balusi aŋgô, ma sip meŋ sac Yisu ŋahô. Ma awaha daŋ sa akêŋ undambê, naŋ sôm, “Aô neŋ Atuŋgac atac whiŋ-ŋga am. Aô gatisambuc am ŋandô.”

Yisu ndê apai si ŋadênaŋ

(Mat 1:1-17)

²³Yisu gic hu ndê gwelenŋ têtŋ iŋ ndê yala gitôm 30. Ma iŋ ndê apai bocdindec. Lau sêsam Yisu bu Josep atu. Ma Josep iŋ Eli atu, ²⁴naŋ Matat atu, naŋ Liwai atu, naŋ Melki atu, naŋ Yanai atu, naŋ Josep atu, ²⁵naŋ Matatias atu, naŋ Amos atu, naŋ Nahum atu, naŋ Esli atu, naŋ Nagai atu,

26naŋ Mat atu, naŋ Matatias atu, naŋ Semin atu, naŋ Yosek atu, naŋ Yoda atu, 27naŋ Yoanan atu, naŋ Resa atu, naŋ Serubabel atu, naŋ Siltiel atu, naŋ Neri atu, 28naŋ Melki atu, naŋ Adi atu, naŋ Kosam atu, naŋ Elmadam atu, naŋ Er atu, 29naŋ Josua atu, naŋ Eliesa atu, naŋ Yorim atu, naŋ Matat atu, naŋ Liwai atu, 30naŋ Simeon atu, naŋ Juda atu, naŋ Josep atu, naŋ Yonam atu, naŋ Eliakim atu, naŋ Melea atu, 31naŋ Mena atu, naŋ Matata atu, naŋ Natan atu, naŋ Dawid atu, 32naŋ Jessi atu, naŋ Obed atu, naŋ Boas atu, naŋ Salmon atu, naŋ Nason atu, 33naŋ Aminadab atu, naŋ Ram atu, naŋ Hesron atu, naŋ Peres atu, naŋ Juda atu, 34naŋ Jakob atu, naŋ Aisak atu, naŋ Abraham atu, naŋ Tera atu, naŋ Naho atu, 35naŋ Serug atu, naŋ Reu atu, naŋ Peleg atu, naŋ Eber atu, naŋ Sela atu, 36naŋ Kenan atu, naŋ Apakad atu, naŋ Sem atu, naŋ Noa atu, naŋ Lamek atu, 37naŋ Metusela atu, naŋ Inok atu, naŋ Yared atu, naŋ Mahalalel atu, naŋ Kenan atu, 38naŋ Inos atu, naŋ Set atu, naŋ Adam atu, naŋ Anötö atu.

Sadaŋ kêtôm Yisu

(Mat 4:1-11; Mak 1:12-13)

4 1Ŋalau Dabuŋ gêm Yisu ahuc ma iŋ hu Bu Jordan siŋ. Ma Ŋalau wê iŋ bambaliŋ mbo gameŋ sawa 2gitôm bêc 40. Yêc dindê Sadaŋ kêsahê bu êntôm iŋ. Tôm bêc hoŋ dinaŋ Yisu gêŋ gêŋ daŋ dom, ma tiŋambu gêŋ yô iŋ ŋandô. 3Ma Sadaŋ sôm têŋ iŋ, “Am Anötö ndê Atu, a? Bocdinaŋ sôm têŋ hoc dindêc bu nem dau kwi ti bolom.” 4Magoc Yisu ô yom ma sôm, “Mba! Sêto Anötö ndê yom yêc bocdec bu, ‘*Gêŋ danen-ŋga ŋambwa kêŋ lau sêndôc tali dom.*’ ”

5Goc Sadaŋ kôc iŋ sa pi lôc baliŋ daŋ gi, ma ŋagahô iŋ tôc têŋ iŋ gameŋ hoŋ naŋ kiŋ nom-ŋga sem gôliŋ. 6-7Ma iŋ sôm, “Gêŋ hoŋ dindêc yêc aneŋ gôliŋ ŋapu. Ma gitôm bu wakêŋ têŋ asa naŋ aô atac whiŋ naŋ. Am bu pôn hamduc têŋ aô, dec wakêŋ ŋaclai ti ŋawasi hoŋ dindêc têŋ am.” 8Ma Yisu ô iŋ ndê yom ma sôm, “Mba! Sêto yom yêc bocdec bu, ‘*Pôn hamduc têŋ Pômdau am nem Anötö, ma nem akiŋ iŋ tiger.*’ ”

9Goc Sadaŋ wê iŋ pi malac Jerusalem gi, ma kêŋ iŋ kalhac lôm dabuŋ ŋapoc lôlôc, ma sôm têŋ iŋ, “Am Anötö ndê Atu, a? Dec pwê sip akêŋ dec ndi. 10Am oc tisac dom, bu sêto yom yêc bocdec bu, ‘*Pômdau oc êŋkiŋ ndê aŋela bu sêyob am.* 11Ŋac oc sêpê am sa lôlôc bu am tiŋ gahum pi hoc daŋ dom.’ ” 12Magoc Yisu ô yom bocdec bu, “Sêto yom yêc bu, ‘*Êmsahê Pômdau am nem Anötö dom.*’ ”

13Ŋalêŋ dinaŋ Sadaŋ kêsahê lêŋ daêsam tu êntôm Yisu-ŋga. Ma tiŋambu iŋ hu iŋ siŋ ma kôlhô gi, bu hôŋ têm daŋ tiyham.

Yisu gic hu ndê gwelenŋ yêc Galili

14Ŋalau Dabuŋ ndê ŋaclai gêm Yisu ahuc, ma iŋ mbu têŋ gameŋ Galili-ŋga gi. Ma ŋawaê pi iŋ sa têŋ gameŋ ŋamakê-ŋga hoŋ gi. 15Iŋ kêdôhôn lau yêc ŋac si lôm wê-ŋga, ma lau hoŋ sêmpinŋ iŋ.

Yisu ndê lau sêsoc ij yêc ndê malac Nasaret

¹⁶Tijambu Yisu hôc asê ij ndê malachu Nasaret. Yêc dinañ ij kêkuc ndê gêbôm, ma têtj bêc †Sabat-nga ij sôc lôm wê-nga gi. Ij tisa kalhac bu sam Anötö ndê mêtê, ¹⁷ma sêkêtj propet Aisaya ndê bapia tilhuñ têtj ij. Yisu kac bapia dau sa, ma kêsalê yom nañ sêto yêc bocdec bu:

¹⁸Pômdau kêñ ndê Ijalau gêm aô ahuc, dec kêyalij aô sa bu wasôm jawae ñayham asê têtj lau ñalôm sawa. Ij kêkiñ aô bu wasôm asê têtj lau bu Anötö kêmasañ lêtj bu êngapwêc ñac su yêc gapocwalô, ma bu kôm lau tapeç si tandô po asê, bu wanem lau nañ si ñacyo sêngwiniñ ñac, nañ sa, ¹⁹ma bu wanem mêtê bu kwahic dec Pômdau kêyalij têtj wakuc sa bu êmwasiñ lau. [Ais 61:1-2]

²⁰Yisu sam yom dau su, goc kêlhuñ bapia dau sa tiyham, kêñ mbu têtj dabuñwaga, ma ndöc sic. Lau hoñ nañ sêndöc lôm, nañ tahê ij, ²¹dec ij gic hu ndê yom ma sôm, “Yom nañ mac añgô, nañ ñandô sa têtj acsalô dindec.”

²²Lau hoñ sem yomgalôm pi ij ti sêlic ij ñayham, ma sêhêdaê tu ij ndê yom ñayham-nga. Ma sêsôm têtj dandi, “Ij Josep ndê atuñgac. Bocke ma ij sôm yom kaiñ dinañ?” ²³Ma Yisu sôm têtj ñac, “Aô kayalê mac nem gauc. Mboe mac oc asôm yom göliñ dindec têtj aô, ‘Dokta, nem daôm sa.’ Gêñ nañ aô gakôm yêc malac Kapenaom, nañ mac añgô jawae su, dec mac atac whiñ bu aô wakôm tiyham yêc dec, a?” ²⁴Ma ij sôm, “Yomandô! Yêc propet dañ ndê malac, ij ndê lau oc sêkôc ij sa dom.

²⁵Têtj propet Elaija ndê têtj, nañ lauwhê sawa Israel-nga daêsam sêmbo. Têtj ndoc dinañ u gic dom e tôm yala tö ma ayô 6, ma tóbôm atu gêm gameñ ahuc. ²⁶Tigetj Anötö kêkiñ Elaija têtj awhê sawa Israel-nga dañ dom, magoc kêkiñ ij bu nem awhê sawa dañ sa yêc Sarepet, malac nañ yêc Saidon ñagameñ. ²⁷Ma têtj propet Elaisa ndê têtj, nañ lau ti gêmbac †leprasi daêsam sêmbo lau Israel-nga ñalôm. Tigetj Elaisa kôm Israel si dañ ñayham sa dom. Ij gêm ñgac Siria-nga Naman tawasê sa.”

²⁸Yisu ndê yom dinañ kôm lau nañ sêndöc lôm wê-nga, atac ñandê atu. ²⁹Sêtisa ma sêsoc ij ma sêkôc ij sa sêtêtj salic sac nañ yêc malac dau ñamakê, bu sêsuc ij sip ndi. ³⁰Tigetj ij kêsêlêtj gic ñac kôc, ma kôlhö gi.

Yisu kêdôhôn lau ma soc ñalau sac yêc malac Kapenaom

(Mak 1:21-28)

³¹Tijambu ij mbu têtj malac Kapenaom nañ yêc gameñ Galili-nga gi. Têtj bêc Sabat-nga ij kêdôhôn lau. ³²Ñac sêhêdaê tu ij ndê yom-nga, bu ij kêdôhôn lau ti ñaclai atu. ³³Ma ñgac dañ nañ ñalau sac mbo ij ñalôm, nañ ndöc lôm wê-nga dinañ. Ij mbwêc awaha atu, ³⁴“Ei! Yisu Nasaret-nga. Aô kayalê am, am ñgac dabuñ nañ Anötö kêkiñ. Am bu kôm sake têtj yac? Am mweñ bu señ yac su, a?” ³⁵Magoc Yisu hec yom ñalau sac dau

ma sôm, “Am mamaŋ ma hu iŋ siŋ!” Goc ŋalau sac kôm ŋgac dau peŋ sip nom gi yêc lau hoŋ aŋgô-ŋga, ma sa yêc iŋ, magoc kôm iŋ tisac dom.

³⁶L au hoŋ sêhêdaê tu gêŋ dinaŋ-ŋga, ma sêsôm têtŋ dau, “Yom bocke naŋ iŋ kêdôhôn? Iŋ gic atu yom ŋaŋga ma ti ŋaclai têtŋ ŋalau sac, ma soc ŋac su!” ³⁷Ma tiŋambu lau sic miŋ pi Yisu e iŋ ndê waê gêm gameŋ hoŋ dinaŋ ahuc.

Yisu gêm lau gêmbac daêsam sa

(*Mat 8:14-17; Mak 1:29-34*)

³⁸Yisu tisa ma hu lôm wê-ŋga dau siŋ, ma têtŋ Saimon ndê andu gi. Saimon ndê lawawê gêmbac lic ŋandê atu, dec sêndac Yisu bu nem iŋ sa. ³⁹Goc Yisu têtŋ iŋ gi, ma gic atu bu gêmbac dau hu iŋ siŋ. Ma ŋagahô awê dau tisa ma gêm akiŋ ŋac.

⁴⁰Têtŋ telha dinaŋ ac gi sip su, goc lau sêkôc lau ti gêmbac hoŋ sa akêtŋ ŋac si andu, ma sêtêtŋ Yisu si. Iŋ kêtŋ amba sac ŋac hoŋ, ma kôm ŋac ŋayham sa. ⁴¹Ma iŋ soc ŋalau sac daêsam su, ma sêhu lau siŋ ti sêmbwêc, “Am Anötö ndê Atu.” Magoc iŋ hec yom ŋac, ma kêtŋ yao bu ŋac sêsôm iŋ asê dom, ŋahu bu ŋac sêŋyalê bu iŋ Mesaya dau.

Yisu hu malac Kapenaom siŋ

(*Mak 1:35-39*)

⁴²Têtŋ bêbêc ganduc Yisu hu malac dau siŋ, ma sa gi bu mbo tawasê. Ma lau malac-ŋga sêsa si bu sêŋsalê iŋ, ma têtŋ ndoc sêtap iŋ s a, naŋ sêteŋ iŋ bu hu ŋac siŋ dom. ⁴³Magoc iŋ sôm têtŋ ŋac, “Mba! Aô gac waê bu wasôm ŋawaê ŋayham pi †Anötö ndê gôliŋ asê yêc malac ŋatô whiŋ. Anötö kêkiŋ aô tu gwelêŋ dinaŋ-ŋga.” ⁴⁴Ma iŋ golom-golom malac naŋ sêyêc gameŋ Judia-ŋga, ma gêm mêtê tôm ŋac si lôm wê-ŋga hoŋ.

Yisu kêgalêm ŋgacsêŋomi ŋamata-ŋga

(*Mat 4:18-22; Mak 1:16-20; Jon 1:35-42*)

5 ¹Têtŋ bêc daŋ Yisu kalhac Bugictoŋ Genesaret^e ŋamakê. Ma lau daêsam sêkac sa ma sêŋgihi iŋ ahuc tu bu sêŋgô Anötö ndê yom naŋ iŋ hoc asê. ²Yisu gêlic lau sêkôc i-ŋga ŋatô sêŋgwasîŋ si wasaŋ sêmbo baö, ma ŋac si waŋ lu sêpoc suŋ sa têtŋ baö. ³Dec iŋ pi waŋ daŋ gi, ma ndac waŋ ŋadau, ŋgac naŋ sêsam bu Saimon, bu hêc waŋ dau sa awê ŋagec. Goc iŋ ndöc sic ndöc waŋ, ma kêdôhôn lau naŋ sêlhac baö.

⁴Têtŋ têm Yisu gic bata iŋ ndê yom, naŋ sôm têtŋ Saimon, “Hêc waŋ sa bugictoŋ ŋagapoŋ ndi, ma kêtŋ nem wasaŋ sip bu kôc i.” ⁵Ma Saimon sôm, “O ŋgac atu, yac am gwelêŋ atu ôbwêc baliŋ, magoc akôc i daŋ dom. Magoc tu am sôm-ŋga, dec aô wakêtŋ wasaŋ sip ndi.” ⁶Goc Saimon

^e 5:1 Genesaret - Bugictoŋ Galili-ŋga ndê ŋaê daŋ.

ti ndê lau sêhêc waŋ sêsa si, ma sêkêŋ wasaŋ sip gi. Ma sêkôc i daêsam andô e wasaŋ meŋhu, kêpiŋ bu wasaŋ kic. ⁷Bocdinaŋ ŋac sic gayo ŋac si sillip ŋatô naŋ sêmbo waŋ tilu-ŋga bu sêmeŋ ma sênem ŋac sa. Goc ŋac sic dulu i sip waŋ lu-lu e meŋhu, ma kêpiŋ bu waŋ lu-lu sêpac.

⁸Têŋ ndoc Saimon Pita gêlic i daêsam dinaŋ, naŋ iŋ pôn haduc yêc Yisu gahi-ŋga ma sôm têŋ iŋ, “Pômdau, hu aô siŋ, bu aô ŋgac sac!” ⁹Iŋ sôm yom dinaŋ, ŋahu bu iŋ ti lau hoŋ naŋ sêmbo sêwhiŋ iŋ, naŋ sêhêdaê tu sêhê i daêsam dinaŋ-ŋga. ¹⁰Ma Jems lu Jon, Sebedi ndê atungac lu naŋ sêmbo waŋ tilu-ŋga, naŋ sêhêdaê boc-d inaŋ. Magoc Yisu sôm têŋ Saimon, “Tôc daôm dom. Am ŋgac kôc i-ŋga, magoc kwahic dec ma ndi, am oc kôm gwelêŋ bu kôc ŋamalac sêmeŋ sêŋkuc aô.” ¹¹Ma tiŋambu sêsôc baô si goc sêhu gêŋ hoŋ siŋ, ma sêŋkuc Yisu.

Yisu kôm ŋgac ti gêmbac leprasi ŋayham sa

(Mat 8:1-4; Mak 1:40-45)

¹²Yisu mbo malac atu daŋ, ma ŋgac daŋ naŋ gêmbac leprasi gêm iŋ ndê ŋamlic sambuc ahuc, naŋ têŋ iŋ gi. Têŋ ndoc iŋ gêlic Yisu, naŋ iŋ hu dau aŋgô andô têŋ nom, ma teŋ iŋ, “Pômdau, am bu tac whiŋ, dec gitôm bu am oc kôm aô ŋamlic ŋawasi sa.” ¹³Goc Yisu kêmatôc amba ma kêmasec iŋ ma sôm, “Aô atac whiŋ, dec wasôm têŋ am bu ŋamlic ŋawasi sa.” Ma ŋagahô eŋ gêmbac leprasi hu iŋ siŋ. ¹⁴Goc Yisu kêŋ yao ma sôm, “Ndic miŋ têŋ ŋamalac daŋ dom, tigeŋ têŋ dabuŋsiga ndi, ma tôc daôm têŋ iŋ bu lic bu am nem ŋamlic ŋawasi sa su. Ma kêŋ da tu am ŋamlic ŋawasi sa-ŋga tôm yomsu naŋ Moses kêŋ têŋ yac. Ma ŋalêŋ dinaŋ lau hoŋ oc sêŋyalê bu am ŋamlic ŋayham sa.”

¹⁵Yisu bu kêŋ yao ŋgac dau, magoc ŋawaê pi gêŋ naŋ Yisu kôm, naŋ gêm gameŋ sambuc ahuc. Bocdinaŋ lau daêsam sêtêŋ iŋ si ŋapaŋ, bu sêŋgô iŋ ndê yom, ma bu iŋ kôm ŋac si gêmbac ŋayham sa. ¹⁶Tigeŋ têm ŋatô iŋ hu lau hoŋ siŋ, ma sa gameŋ sawa gi bu teŋ mbec.

Yisu gêm ŋgac bôliŋ daŋ sa

(Mat 9:1-8; Mak 2:1-12)

¹⁷Têŋ bêc daŋ Yisu kêdôhôn lau mbo andu daŋ. Ma lau †Palêsai ti kêdôhônwaga yomsu-ŋga ŋatô naŋ sêmeŋ akêŋ malac Galili-ŋga ti Ju dia-ŋga hoŋ, ma akêŋ Jerusalem, naŋ sêndöc sêsuŋ sa têŋ iŋ. Ma Pômdau ndê ŋaclai gêm Yisu ahuc bu kôm lau gêmbac ŋayham sa.

¹⁸Têŋ têm dinaŋ lau ŋatô sêmeŋ sêmbalaŋ ŋgac bôliŋ daŋ yêc sac, ma bu sêsôc andu dau sêndi, tu bu sêkêŋ iŋ yêc Yisu aŋgô-ŋga. ¹⁹Magoc lau daêsam sêŋgihi Yisu ahuc e ŋasawa mba. Bocdinaŋ ŋac sêpi andu ŋapoc lôlôc si, ma sêkac poc sa. Goc sêŋwhaŋ sac ti ŋgac bôliŋ dau sip lau daêsam ŋalhu, solop têŋ Yisu aŋgô-ŋga gi. ²⁰Yisu gêlic gêŋ dinaŋ dec kêyalê bu ŋac sêkêŋ whiŋ iŋ, ma sôm têŋ ŋgac bôliŋ, “O ŋgac daôm, kwahic dec aô wasuc am nem sac kwi.”

²¹Goc lau Palêsai ti lau nanj sêndôhôn yomsu sic hu sem yom-galôm têtj dau bocdec bu, “Ijgac dindec inj asa? Inj ndê yom sac sambuc! Anötö tigenj gitôm bu suc sac kwi!” ²²Yisu kêyalê njac si gauc dinanj ma ndac njac, “Tu sake-njga mac gauc gêm yom bocdinanj? ²³Mac akêtj whinj dom bu anej njac lai yêc bu wasôm têtj njac dau bu, ‘Aö wasuc am nem sac kwi.’ Bocdinanj aö wasôm têtj inj, ‘Tisa ma êmsêlêj.’ ²⁴Ma têtj ndoc mac alic anej yom dau njandô sa, nanj anjalê bu Anötö kêtj njac lai têtj †Jamalac ndê Atu bu suc njamalac si sac kwi yêc nom whinj.”

Goc Yisu sôm têtj njac bôlinj dau, “Tisa, kôc nem mbô sa, ma lhö têtj nem andu ndi.” ²⁵Ma njagahô njac dau kalhac njac si angô-njga, kôc inj ndê mbô sa, ma mbu têtj ndê andu gi ti kêpinj Anötö. ²⁶Ma lau honj sêhêdaê njandô. Sêmpinj Anötö ma sêsôm, “Acsalô lec yac dalic gêtj kainj danj solop!”

Yisu kêgalêm Liwai bu ênjuc inj

(Mak 2:13-17; Luk 5:27-32)

²⁷Tinjambu Yisu sa awê gi ma gêlic njac kôc takis-njga danj nanj ndê njac Liwai, ndöc ndê mala kôc takis-njga. Ma Yisu sôm têtj inj, “Êmkuc aö!”

²⁸Goc Liwai tisa, hu gêtj honj sinj yêc, ma kêkuc Yisu.

²⁹Tinjambu Liwai ndê mwasiñj atu danj tu Yisu-njga yêc inj ndê andu. Ma lau sêkôc takis-njga daêsam, ma lau njatô sêndöc tebo ma señj gêtj sêwhinj injlu Yisu. ³⁰Ma lau Palêsai ti lau †Skraib njatô nanj sêmbo Palêsai si tonj, nanj sêlic gêtj dau dec sêtuudinj ma sêsôm têtj Yisu ndê njacsêñjomi, “Tu sake-njga mac anj ti anôm gêtj awhinj lau sêkôc takis-njga ti lau sac njatô?” ³¹Ma Yisu dau ô njac si yom ma sôm, “Lau nanj sêlic dau bu gêmbac mba, nanj oc sêñsalê dokta dom, magoc lau ti gêmbac oc sêñsalê dokta. ³²Aö gameñj bu wanjalêm lau nanj sêlic dau bu lau gitêtj, nanj sa dom, aö gameñj bu wanjalêm lau sac sa bu sênem dau kwi.”

Yao gêtj daney-njga-njga

(Mat 9:14-15; Mak 2:18-20)

³³Ma lau Palêsai ti lau Skraib dinanj sêsôm têtj inj, “Ndoc daêsam Jon, Ijgac Kêku Lau-njga ndê sêñjomi sêhu gêtj daney-njga sinj ma sêteñj mbec, ma Palêsai si sêñjomi sêkôm bocdinanj. Magoc tôm bêc honj am nem njacsêñjomi sêñôm ti señj gêtj sêmbo.” ³⁴Goc Yisu sôm, “Ijgac nem awhê-njga danj bu ênjgalêm lau sa sêmbo sêwhinj inj bu sêneñj mwasiñj nem awhê-njga, dec oc tôm dom bu dasôm têtj njac bu sêhu gêtj daney-njga sinj têtj ndoc njac dau mbo whinj njac. ³⁵Ijalêñj tigenj aö gambo gawhinj anej njacsêñjomi, ma tu dinanj-njga dec sêhu gêtj daney-njga sinj dom. Tigenj ndoc oc meñj, nanj njacyo oc sêkôc aö su yêc njac, ma têtj ndoc dinanj njac oc njalôm njawapac, ma sênjuc lêtj dahu gêtj daney-njga sinj-njga.”

Yisu ndê yom gitôm gêtj wakuc

(Mat 9:16-17; Mak 2:21-22)

³⁶Ma inj sôm yom gôlinj danj têtj njac bocdec bu, “Po akwa danj bu kic, dec yac dakêc po wakuc bu dasi pi po akwa dinanj dom. Bu dakôm, oc

tanjariŋ po wakuc, ma po wakuc oc tòm po akwa dom. ³⁷Ma têtŋ ndoc lau sêmasariŋ wain wakuc, naŋ sêkêc sip bôc ŋamlic wain-ŋga akwa dom. Mba. Ŋac bu sêkôm, goc wain wakuc oc hôc ŋamlic akwa kôc ma wê niŋga. Ma bôc ŋamlic oc tisac bocdinaŋ. ³⁸Mba. Wain wakuc dakêc sip bôc ŋamlic wakuc. ³⁹Ma lau naŋ sênôm wain akwa su, naŋ sêtec bu sênôm wain wakuc, bu sêsôm, ‘Wain akwa, iŋ ŋayham.’ ”

Yisu iŋ Pômdau bêc Sabat-ŋga

(Mat 12:1-8; Mak 2:23-28)

6 ¹Têtŋ bêc Sabat-ŋga daŋ, Yisu kêsêlêtŋ mbo lôcwha naŋ gic ôm wit-ŋga daŋ kic, ma iŋ ndê ŋgacsêŋomi sêkôc wit ŋandô ma sêŋsê ŋapa goc seŋ ŋandô. ²Ma Palêsai ŋatô sêlic gêtŋ dau ma sêndac, “Tu sake-ŋga mac akôm gwelêŋ naŋ yac neŋ yomsu gic yao bu dakôm têtŋ bêc Sabat-ŋga dom?” ³Ma Yisu ô yom ma sôm, “Gauc nem yom naŋ sêto yêc pi gêtŋ naŋ Kiŋ Dawid kôm. Mac asam su, me? Têtŋ ndoc daŋ gêtŋ yô iŋ ma lau naŋ sêwhiŋ iŋ, ⁴dec iŋ sôc Anötô ndê andu gi, ma gêtŋ bolom dabuŋ naŋ lau sêkêŋ ti da, naŋ Moses kêtŋ yao bu dabuŋsiga tawasê sêneŋ. Ma iŋ kêtŋ têtŋ lau naŋ sêmbo sêwhiŋ iŋ ma ŋac seŋ. Magoc lau daŋ sêŋgôliŋ yom pi Dawid me sêsôm bu iŋ kêtŋgîlî yomsu lec dom.”

⁵Ma iŋ sôm têtŋ ŋac, “Ŋamalac ndê Atu iŋ gêtŋ hoŋ ŋadau, ma iŋ Pômdau bêc Sabat-ŋga whiŋ.”

Yisu kôm ŋgac amba balê ŋayham sa têtŋ bêc Sabat-ŋga

(Mat 12:9-24; Mak 3:1-6)

⁶Têtŋ bêc Sabat-ŋga daŋ iŋ sôc lôm wê-ŋga daŋ gi, ma kêdôhôn lau. Ma ŋgac daŋ naŋ ndê amba andô-ŋga tibalê naŋ ndôc. ⁷Lau Palêsai ti lau naŋ sêndôhôn yomsu naŋ sêŋsalê yom bu sêŋgôliŋ pi Yisu. Tu dinaŋ-ŋga dec ŋac tatiŋ iŋ ŋapep bu mboe iŋ oc kôm ŋgac dau ŋayham sa têtŋ bêc Sabat-ŋga, dec ŋac oc sêsôm bu iŋ kêtŋgîlî yomsu Sabat-ŋga. ⁸Yisu kêyalê ŋac si gauc, ma sôm têtŋ ŋgac amba balê, “Tisa, ma lhac lau hoŋ aŋgô-ŋga.” Ma iŋ tisa kalhac. ⁹Goc Yisu sôm têtŋ ŋac, “Aô bu wandac mac bu gêtŋ bocke oc êŋgîlî yomsu Sabat-ŋga? Dakôm ŋayham têtŋ lau, me dakôm sac têtŋ lau? Danem ŋamalac sa, me datec ŋac sêmbac ndu?” ¹⁰Iŋ tahê ŋac hoŋ, ma sôm têtŋ ŋgac dau, “Êmatôc amam.” Goc ŋgac dau kêmatôc amba, ma amba dau ŋayham sa tiyham.

¹¹Magoc gêtŋ dau kôm lau Palêsai ti lau Skraib atac ŋandê atu, ma ŋac sem yomgalôm têtŋ dau pi Yisu, ma pi gêtŋ bocke bu sêkôm têtŋ iŋ-ŋga.

Yisu kêyalîŋ aposel 12 sa

(Mat 10:1-4; Mak 3:13-19)

¹²Têtŋ bêc daŋ Yisu pi lôc daŋ gi bu teŋ mbec, ma tòm ôbwêc baliŋ iŋ teŋ mbec mbo. ¹³Têtŋ galaŋsê bêbêc iŋ kêgalêm lau naŋ sêŋkuc iŋ sêmeŋ,

ma kêyalin̄ ñac si lau 12 sa, ma sam ñac bu lau †Aposel. ¹⁴Lau Aposel dau si ñaê bocdec: Saimon, nañ Yisu sam bu ‘Pita,’ lu asi Andru, ma Jems, Jon, Pilip, Batolomeas, ¹⁵Matyu, Tomas, Jems (nañ Alpayas ndê atu), Saimon (nañ sêsam bu ‘Ŋgac †Selot’), ¹⁶Judas (nañ ñadamba in̄ ñgac dan̄ ñaê Jems), ma Judas Iskeriot nañ tiñambu oc hoc Yisu asê.

Yisu kêdôhôn̄ lau ma kôm gêmbac ñayham sa
(*Mak 3:7-12*)

¹⁷Yisu ti ndê ñgacsêñomi sêsip akêñ lôc sêmeñ, ma Yisu kalhac gameñ gapoñ. Ma †sêñomi daêsam nañ sêñkuc Yisu, nañ sêkac sa su sêmbo dinañ. Ma lau toñ atu akêñ malac Jerusalem ti malac gameñ Judia-ñga hoñ, ma lau akêñ gameñ gwêc-ñga nañ yêc kêpiñ malac Taya ma Saidon, nañ sêmeñ bu sêñgô in̄ ndê yom, ma bu in̄ kôm ñac si gêmbac ñayham sa. ¹⁸Lau nañ ñalau sac sêmbo ñac si ñalôm, nañ Yisu kôm ñac ñayham sa. ¹⁹Ma lau hoñ sêhóc sôsôwec bu sêmasec in̄, ñahu bu ñaclai sa yêc Yisu, ma kôm lau gêmbac hoñ ñayham sa.

Yisu ndê yom ñatô
(*Mat 5:1-12*)

- ²⁰Yisu tahê in̄ ndê ñgacsêñomi ma sôm,
“Anötö ndê mwasiñ gic waê mac lau ñalôm sawa, bu in̄ gêlic ñayham bu kôc mac sa andöc in̄ ndê gôlin̄ ñapu.
- ²¹Anötö ndê mwasiñ gic waê mac lau nañ kwahic dec gêñ yô mac, bu in̄ oc kêñ gêñ hóc mac dôn-ñga.
Anötö ndê mwasiñ gic waê mac lau nañ kwahic dec andöc ti tamsulu, bu in̄ oc nem malô mac e ambwac.
- ²²Anötö ndê mwasiñ gic waê mac lau nañ sêtec mac ma sêtiñ mac, ma sêpu mac ti sêkôm nem waêm tisac tu mac añkuc Ŋamalac ndê Atu-ñga. ²³Ahêgo daôm dom têtñ ndoc lau sêkôm bocdinañ, tigeñ atê wê ti atac ñayham, bu Anötö oc kêñ ñagêyô ñayham têtñ mac yêc undambê. Ma gauc nem bu lau nañ sêtec mac, nañ si apai sêkôm ñalêñ tigeñ dinañ têtñ Anötö ndê lau propet ñamata-ñga.
- ²⁴Oyaê mac lau nañ apo daôm sa ña awa ti wapa daêsam. Mac atap nem mwasiñ ñayham sa têtñ têtñ kwahic dec-ñga, magoc gêñ dau oc tôm dom bu nem mac sa têtñ têtñ ñambu-ñga.
- ²⁵Oyaê mac lau nañ añ gêñ ñawahô kwahic dec. Tiñambu gêñ oc yô mac.
Oyaê mac lau nañ ambwac kwahic dec. Tiñambu mac oc atan̄ dan̄gibo atu ma andöc ti tamsulu.
- ²⁶Oyaê mac lau nañ lau hoñ sêmpiñ mac. Atac ñayham tu gêñ dinañ-ñga dom, bu ñalêñ tigeñ lau Israel-ñga si apai sêmpiñ lau propet tasan̄.”

Atac whiņ mac nem ŋacyo
(*Mat 5:43-48*)

²⁷Ma Yisu sôm têtj lau dinaņ, “Aņgô aneņ yom. Atac whiņ mac nem ŋacyo, ma akôm ŋayham têtj lau naņ sêtec mac. ²⁸Anem mbec lau naņ sêpucbo mac, ma ateņ mbec pi lau naņ sêkôm sac têtj mac. ²⁹Ŋgac daņ bu tap am sip alim andô daņga, naņ kêtj daņga bu iņ ndic whiņ. Ŋgac daņ bu kôc nem ŋakwê baliņ su yêc am, naņ êmgamiņ nem ŋakwê ŋandô-ņga dom magoc kêtj têtj iņ whiņ. ³⁰Ŋgac daņ bu ndac gêtj daņ, naņ kêtj têtj iņ. Ma ŋgac daņ bu kôc am nem gêtj daņ, naņ ndac bu iņ kêtj mbu meņ dom. ³¹Mêtê ŋayham-ņayham naņ mac atac whiņ bu lau sêkôm têtj mac, naņ mac daôm akôm têtj ŋac.

³²“Lau hoņ atac whiņ lau naņ atac whiņ ŋac ô. Bocdinaņ mac bu atac whiņ nem silip tawasê ma atac tec nem ŋacyo, dec mac nem mêtê hôc gêlêc lau sac si mêtê su dom. ³³Ma lau hoņ sêkôm ŋayham têtj lau naņ sêkôm ŋayham têtj ŋac ô, ma mac bu akôm bocdinaņ, dec mac nem mêtê hôc gêlêc lau sac si mêtê su dom. ³⁴Ma mac bu akêtj tôp têtj mac nem silip, naņ iņ gêtj atu dom. Mac aņyalê su bu tiņambu ŋac oc sêndic tôp dau. Lau sac sêkêtj tôp têtj si silip, ma takwê bu ŋac sêndic tôp hoņ mbu meņ.

³⁵“Bocdinaņ ayob daôm bu aņkuc lau sac si mêtê dom. Atac whiņ nem ŋacyo, ma akôm ŋayham têtj ŋac. Akêtj gêtj têtj ŋac, ma ahêgo daôm dom pi ndoc bocke ŋac oc sêkêtj gêtj dau mbu meņ-ņga. Tu dinaņ-ņga Anötö, Ŋaclai ti Ŋawasi Ŋadau oc kêtj ŋaôli ŋayham atu têtj mac, ma sam mac bu iņ ndê atui awhê ma ŋgac. Bu Anötö dau kêmwasij lau sac ma lau naņ sem danġe iņ dom, naņ sêwhiņ. ³⁶Bocdinaņ tamwalô lau hoņ, tôm Damam undambê-ņga tawalô lau.”

Yom datoc asidôwai sa-ņga
(*Mat 7:1-5*)

³⁷Ma Yisu sôm, “Anem dôhôn lau si lêtj ti sakiņ tu bu alic lau ŋatô sac ŋambwa, me tu bu apu ŋac-ņga dom. Mac bu akôm, dec Anötö oc lic mac sac ma pu mac tu mac nem lêtj ti sakiņ-ņga boc-dinaņ. Asuc lau si sac kwi, ma Anötö oc suc mac nem kwi boc-dinaņ. ³⁸Têtj ndoc mac bu anem lau ŋatô sa, naņ akêtj gêtj têtj ŋac ti nem ŋalôm sambuc, ma boc-dinaņ Anötö oc kêtj gêtj hôc gêlêc su têtj mac e meņhu ma êņsalê mac ahuc. Bu Anötö oc êmwasiņ mac, gitôm mac amwasij lau.”

³⁹Ma Yisu sôm yom gôliņ daņ bocdec, “Ŋgac tapec gitôm bu wê tapec daņ dom. Mba! Iņlu lu-lu oc sêpeņ sêsip sê sêndi. ⁴⁰Ma kwapuc daņ oc hôc gêlêc gwalam akwa naņ kêdôhôn iņ, naņ dom. Magoc kwapuc hoņ naņ sêndôhôn gêtj hoņ e tidôn ŋac, naņ oc sêtôm ŋac si kêdôhônwaga.

⁴¹“Tu sake-ņga am hêgo daôm tu gêtj golop sauņ naņ yêc nem asidôwa tandô, tigeņ gêtj golop atu naņ yêc am daôm tanôm, naņ am gêlic apu?”

42 Ma bocke am oc sôm têtj nem asidôwa, ‘Aneŋ asidôwa, aö bu wakôc gêtj golop naŋ yêc am tanôm, naŋ sa,’ magoc gêtj golop atu naŋ pôc am daôm tanôm ahuc, naŋ am gêlic dom? Am ŋgac tim yom lau-ŋga! Gêtj ŋamata-ŋga kôc gêtj golop sa yêc daôm tanôm e tanôm ŋawa sa, goc tiŋambu kôc gêtj golop sauŋ naŋ yêc nem asidôwa tandô, naŋ sa.”

Lau si mêtê whê ŋac sa bu ŋayham me sac

(Mat 7:16-19; 12:33-35)

43 Ma Yisu sôm, “A ŋayham daŋ oc nem ŋandô sac dom, ma a sac oc nem ŋandô ŋayham dom. 44 Dalic ŋandô naŋ a tidau-tidau sem, ma bocdinaŋ yac taŋyalê bu a ŋayham me sac. Gitôm dom bu dahij ŋandô ŋayham yêc a sac. 45 Ma ŋalêtj tigeŋ, yom naŋ lau sêsôm, naŋ tôc gêtj bocke naŋ hôc ŋac si ŋalôm ahuc, naŋ asê. Mêtê ti gauc ŋayham yêc lau ŋayham si ŋalôm, ma bocdinaŋ sêkôm mêtê ŋayham. Ma mêtê ti gauc sac yêc lau sac si ŋalôm, dec sêkôm sac.”

Yom gôliŋ pi ŋgac sêkwê andu-ŋga lu

(Mat 7:24-27)

46 “Tu sake-ŋga mac asam aö bu, ‘Pômdau, Pômdau,’ tigeŋ mac daŋam wambu aneŋ yom dom? 47 ŋamalac naŋ têtj aö meŋ ma ŋgô aneŋ yom, ma daŋga wambu yom dau, naŋ aö bu wawhê iŋ sa têtj mac. 48 Iŋ gitôm ŋgac kwê andu-ŋga naŋ kwê sê baliŋ sip nom ŋaŋga, ma kêtj hoc kêgapiŋ alhö dôŋ têtj ndoc iŋ kêsuhuŋ sip sê baliŋ dinaŋ. Têtj ndoc uhô-ŋga, bu hêc meŋ hôc pi andu dau, magoc andu dau kalhac ŋaŋga, bu iŋ kwê ŋapep. 49 Magoc ŋamalac naŋ ŋgô aneŋ yom ma daŋga wambu dom, naŋ gitôm ŋgac naŋ kwê andu, magoc kêtj alhö sip nom ŋalôm gi dom. Têtj ndoc uhô-ŋga, bu hêc ma hôc pi ndê andu e ŋagahô eŋ andu dau ku sa ma tisac sambuc.”

ŋgac bata siŋ-ŋga daŋ kêtj whiŋ ŋaŋga

(Mat 8:5-13)

7 ¹ Yisu gic bata yom naŋ iŋ kêdôhôn têtj lau toŋ atu dinaŋ, goc sôc malac Kapenaom gi. ² Ma ŋgac bata Rom-ŋga naŋ gêm gôliŋ lau siŋ-ŋga 100, naŋ mbo malac dau. Iŋ ndê ŋgac akiŋ daŋ naŋ iŋ tac whiŋ kêlêc, naŋ gêmbac e kêpiŋ bu mbac ndu. ³ Ma iŋ ŋgô Yisu ŋawaê, dec kêkiŋ lau bata Israel-ŋga ŋatô sêtêtj iŋ si, bu sêndac iŋ bu meŋ ma kôm iŋ ndê ŋgac akiŋ ŋayham sa. ⁴⁻⁵ ŋac sêhóc asê têtj Yisu, ma sêsôm têtj iŋ bu, “ŋgac bata siŋ-ŋga dinaŋ iŋ ŋgac ŋayham, ma iŋ tac whiŋ yac lau Israel-ŋga. Iŋ gêm yac sa tu akwê yac mba lôm wê-ŋga. Boc-dinaŋ yac ateŋ am bu nem iŋ sa.”

⁶ Goc Yisu whiŋ ŋac gi. Iŋ meŋ suŋ sa têtj andu, ma ŋgac bata siŋ-ŋga dau kêkiŋ ndê silip ŋatô bu sêsôm têtj iŋ, “Pômdau, ŋgac bata siŋ-ŋga dau

sôm bu inj tec bu kêñ ñawapac têtñ am. Inj sôm bu am ñgac tiwaê nañ hóc gêlêc inj su, dec inj maya bu am têtñ inj ndê andu ndi. ⁷Tu dinañ-ñga inj dau têtñ am meñ dom. Tigerñ inj sôm bu inj kêyalê su bu am ñgac ti ñaclai atu, ma bocdinañ dec am gitôm bu sôm ña awham ñambwa, dec inj ndê ñgac akiñ oc ñayham sa. ⁸Bu inj dau dañga wambu lau nañ si ñaclai hóc gêlêc inj ndê, ma inj ndê lau siñ-ñga dañga wambu inj. Inj bu sôm têtñ dañ, ‘Am ndi,’ dec inj oc ndi. Ma inj bu sôm têtñ dañ, ‘Mweñ!’ dec inj oc meñ. Ma inj bu sôm têtñ ndê ñgac akiñ bu kôm gêtñ dañ, dec inj oc kôm.”

⁹Yisu ñgô ñgac bata siñ-ñga ndê yom dinañ e hêdaê. Inj kac dau kwi ma sôm têtñ lau toñ atu nañ sêñkuc inj, “Aö wasôm têtñ mac bu yêc lau Israel-ñga hoñ aö gatap ñac si dañ nañ kêñ whiñ ñañga gitôm ñgac Rom-ñga dinañ, nañ sa dom.”

¹⁰Ma tiñambu ñgac bata siñ-ñga ndê lau sêmbu sêtêtñ inj ndê andu si, ma sêtap sa bu ñgac akiñ dau ñayham sa su.

Yisu uñ ñgac dañ nañ mbac ndu su, nañ sa

¹¹Bêc ñatô giñga su, ma Yisu têtñ malac Nein gi, ma inj ndê ñgac-sêñjomi ti lau daêsam sêwhiñ inj si. ¹²Têtñ têtñ inj meñ kêpiñ malac dau ñagatam, inj gêlic lau ñatô sêsa sêmeñ, sêmbalañ ñgac batê dañ bu sêñsuhuj inj. ñgac batê dinañ dinda inj awhê sawa nañ ndê balêkoc ñatô mbasi. Ma lau malac-ñga daêsam sêwhiñ dinda sêsa sêmeñ. ¹³Pômdau gêlic dinda, ma tawalô inj ñandô, goc sôm, “Am tañ dom.” ¹⁴Goc inj têtñ ñac gi, ma kêmasac sasac nañ ñgac batê yêc. Ma lau nañ sêhóc sasac, nañ sêlhac teñ. Ma inj sôm, “Aneñ balê, aö wasôm têtñ am bu tisa!” ¹⁵Ma ñgac dau tisa ndöc, ma gic hu sôm yom. Goc Yisu kêñ inj mbu têtñ dinda gi. ¹⁶Gêtñ dinañ kôm lau hoñ sêtöc dau atu, ma ñac sic hu sêmpiñ Anötö. ñatô sêsôm, “Propet atu dañ hóc asê yac.” Ma ñatô sêsôm, “Anötö kêlhiñ inj ndê lau yac siñ dom, inj gêm yac sa.” ¹⁷Ma tiñambu ñawaê pi gêtñ nañ Yisu kôm, nañ gêm gameñ Judia-ñga ma gameñ ñamakê-ñga hoñ ahuc.

Yisu sôm yom pi Jon, ñgac Kêku Lau-ñga

(Mat 11:2-18)

¹⁸Têtñ ndoc dinañ Jon, ñgac Kêku Lau-ñga ndöc gapocwalô, ma inj ndê sêñjomi sic miñ têtñ inj pi gêtñ hoñ nañ Yisu kôm. Goc Jon kêyalij inj ndê sêñjomi lu sa, ¹⁹ma kêkiñ injlu sêtêtñ Yisu si, bu sêndac inj, “Anötö gic bata têtñ yac bu oc êñkiñ Mesaya. Am daôm dinañ, me yac oc akêñ batañ ñgac dañ tiyham?”

²⁰⁻²¹Têtñ ndoc ñgac lu dinañ sêhóc asê Yisu, inj gêm gwelêñ mbo, ma kôm lau daêsam ñayham sa, lau gêmbac ma lau ti ñalau sac. Ma inj kôm lau tapec daêsam si tandô po asê. Ma injlu sêsôm têtñ inj, “Jon, ñgac Kêku Lau-ñga kêkiñ alu atêtñ am amêñ, bu andac am bu am Mesaya dau, me yac oc akêñ batañ ñgac dañ tiyham?” ²²Goc Yisu ô injlu si yom ma sôm, “Amlu ambu andi ma

asôm yom têt Jon pi mêtê narj amlu aŋgô aô gahoc asê, ma pi gêt narj amlu alic aô gakôm. Lau tapec sêlic gameŋ tiyham, lau bôliŋ sêŋsêlêŋ tiyham, lau ti gêmbac leprasi si ŋamlic ŋawasi sa, lau daŋgasuŋ bic sêŋgô yom tiyham, lau batê sêtisa, ma lau ŋalôm sawa sêŋgô ŋawaê ŋayham. ²³Aŋgô! Lau narj atac lu-lu tu aô-ŋga dom, narj oc sêtap Anötö ndê mwasij sa.”

²⁴Ŋgac lu narj Jon kêkiŋ, narj sêhu Yisu siŋ ma sêmbu si, goc Yisu sôm yom pi Jon têt lau toŋ atu, ma ndac ŋac bocdec bu, “Têt ndoc mac asa atêt Jon yêc gameŋ sawa a, narj mac gauc gêm bu atap ŋamalac kain bocke sa? Mac bu alic ŋgac gauc babalê, gitôm gakoc narj mbu kêwic, a? ²⁵Mac asa a bu alic ŋgac narj sôc ŋakwê ŋayham, a? Mba! Lau narj sêsôc ŋakwê ŋayham ma seŋ gêt ŋayham, narj sêmbo gameŋ ŋayham gitôm kin si andu. ²⁶B ocdinaŋ dec aô bu wandac mac, bu mac asa a bu alic sake? Bu alic propet daŋ? Yomandô! Iŋ propet daŋ, ma iŋ hóc gêlêc propet hoŋ su. ²⁷Propet akwa daŋ to yom narj Anötö sôm têt Mesaya bocdec bu, ‘*Aô wanŋiŋ aneŋ ŋgac aheŋ-ŋga muŋ am, bu êmasaŋ am nem seŋ.*’ Y om pi ŋgac aheŋ-ŋga dau hêganôŋ Jon solop. ²⁸Ŋamalac narj dinda nom-ŋga sêkôc ŋac, narj si daŋ hóc gêlêc Jon su dom. Tigeŋ aô wasôm têt mac, bu lau hoŋ narj sêsôc Anötö ndê gôliŋ ŋapu su, lau tiwaê, ma lau waêmba bocdinaŋ, narj hoŋ sêhóc gêlêc Jon su yêc Anötö aŋgô-ŋga.”

²⁹Lau daêsam narj sêŋgô Yisu ndê yom dinaŋ, ma lau sêkôc takis-ŋga sêwhiŋ, narj sêtôc asê bu sêlic Anötö ndê lêt bu lêt solop eŋ. Ŋahu bu muŋ-ŋga, têt ndoc Jon gêm mêtê ma kêku lau mbo, narj sêkôc iŋ ndê yom sa ma sêliŋ saŋgu. ³⁰Tigeŋ lau Palêsai ti gwalam akwa yomsu-ŋga sêkôc Jon ti iŋ ndê yom sa dom, ma sêliŋ iŋ ndê saŋgu dom, dec tôc asê bu sêtec Anötö ndê lêt narj Jon tôc têt ŋac.

³¹Ma Yisu gic têt yom ma sôm, “Lau têt dindec-ŋga ŋac lau kain bocke? Aô wanem dôhôn pi gêt sake tu bu wawhê ŋac si lêt sa-ŋga? ³²Ŋac sêtôm balêkoc narj sêkôc whê sêmbo malac lôm, narj sêtucdiŋ ŋac si silip ŋatô ma sêsôm, ‘Têt ndoc narj yac ac oŋ bu datê wê, narj mac atec. Ma têt ndoc yac am wê daŋgibo-ŋga, narj mac atec bu ataŋ awhiŋ.’ ³³Ma mac lau têt dindec-ŋga bocdinaŋ. Jon, Ŋgac Kêku Lau-ŋga meŋ ma gêt gêt ŋayham dom, ma nôm wain dom, ma mac asôm bu ŋalau sac daŋ mbo iŋ ndê ŋalôm. ³⁴Ma Ŋamalac ndê Atu meŋ hóc asê, ma gêt gêt ŋayham ti nôm wain, ma mac asôm bu iŋ ŋgac gêt gêt ti nôm wain ŋawahô-ŋga, ma iŋ hê silip têt lau sac ti lau sêkôc takis-ŋ ga. Bocdinaŋ, mac lau têt dindec-ŋga atôm balêkoc narj sêkôm tô anij ŋapaŋ. ³⁵Tigeŋ Anötö ndê gauc hóc gêlêc gêt hoŋ, ma iŋ ndê lau sêŋyalê bu iŋ ndê lêt iŋ lêt solop.”

Awhê daŋ kêc bu ŋamalu pi Yisu gahi
(*Mat 26:6-13; Mak 14:3-9; Jon 12:1-8*)

³⁶Palêsai daŋ ŋaê Saimon kêgalêm Yisu bu neŋ gêt whiŋ iŋ, dec Yisu sôc iŋ ndê andu gi, ma ndöc tebo bu neŋ gêt. ³⁷Yêc malac dinaŋ, awhê

sac danj mbo. Inj ngô njawaê bu Yisu ndöc Palésai ndê andu dinañ, dec kôc bu njamalu njayham sip kac danj, ma têtj andu dau gi. ³⁸Inj pônj haduc yêc Yisu gahi-nga ma tañ, ma inj ndê tasulu sip Yisu gahidômbwê. Goc inj puñ Yisu gahi ña kêclauñ, ngutô inj gahi, ma mbac gêtj malu dau pi inj gahi. ³⁹Saimon gêtic gêtj dau, ma gauc gêm yêc dau, “Injgac dindec inj bu propet danj, dec inj oc êñyalê bu awhê nañ kêmasec inj, nañ awhê sac danj.” ⁴⁰Yisu kêyalê yom nañ Saimon gauc gêm, goc sôm, “Saimon, aö bu wasôm yom danj têtj am.” Ma Saimon ô yom ma sôm, “Kêdôhônjwaga, sôm.”

⁴¹Goc Yisu sôm yom gôlinj danj bocdec bu, “Injgac lu sêkôc tôp yêc ngac ti lêlôm. Injgac danj ndê tôp gitôm †denarii 500 ma danj ndê tôp gitôm denarii 50. ⁴²Inju si mone sêndic tôp-nga mbasi, dec inj hu injlu si tôp njayom sij. Am gauc gêm bocke? Inju si asa oc atac whinj ngac dau hôc gêlêc?” ⁴³Ma Saimon sôm, “Injgac nañ kôc tôp atu, nañ.” Ma Yisu sôm, “Am sôm solop.” ⁴⁴Goc inj kac dau kwi, tahê awhê dinañ, ma sôm têtj Saimon, “Aö gasôc am nem andu gameñ, magoc am kêñ bu têtj aö bu wanjwasinj gahinj-nga tôm lau Israel-nga si gêbôm dom. Tigeñ lic awhê dec. Inj ndê tasulu kôm aö gahinj njamaim sa, ma inj puñ aö gahinj ña kêclauñ. ⁴⁵Am ngutô aö dom, tigeñ awhê dec ngutô aö gahinj njapanj. ⁴⁶Am kêc olib njakwi pi aö njagôlônj dom, tigeñ inj kêc bu njamalu pi aö gahinj. ⁴⁷Bocdinañ aö wasôm têtj am bu awhê dindec kêyalê bu Anötö suc inj ndê sac daêsam kwi, ma bocdinañ inj atac whinj aö njandô. Tigeñ lau nañ gauc gêm bu ñac si sac atu dom, nañ oc atac whinj inj nañ bu suc ñac si sac kwi, nañ njandô dom.”

⁴⁸Ma Yisu sôm têtj awhê dau, “Aö gasuc am nem sac kwi su.” ⁴⁹Ma njacleñ njatô nañ sêndöc sêwhinj, nañ sêsôm têtj dandi, “Injgac dindec inj ngac kainj bocke, dec inj suc sac kwi?” ⁵⁰Tigeñ Yisu sôm têtj awhê dau, “Am nem kêñ whinj gêm am si. Lhö ti atac malô ndi.”

Lauwhê daêsam sêñkuc Yisu

8 ¹Tinjambu Yisu golom malac atu-tu ti saunj-saunj, ma gêm mêtê ma hoc njawaê njayham asê pi Anötö ndê gôlinj. Ma †njgacsênjomi 12 ²ti lauwhê daêsam sêñsêlêñ sêwhinj inj. Lauwhê dinañ njatô Yisu soc njalau sac su yêc ñac, ma njatô inj kôm ñac si gêmbac njayham sa. ñac si danj inj Maria Magadala, nañ Yisu soc njalau sac 7 su yêc inj. ³Ma awhê danj inj Joana, nañ ndê akweñ Kusa yob Herod ndê andu. Maria lu Joana, ma Susana, ma lauwhê daêsam sêñkuc Yisu ma sêkêñ si awa ti wapa tu sênem inj ti ndê njgacsênjomi sa-nga.

Yom gôlinj pi njgac kêbalip wit njawhê

(Mat 13:1-9; Mak 4:1-9)

⁴Têtj têtj danj lau toñj atu sêtêñ Yisu sêmeñ, ma lau akêñ malac honj yêc gameñ Galili-nga sêmbo sêwhinj. Ma Yisu sôm yom gôlinj danj bocdec

bu, ⁵“Ŋgac daŋ sa gi bu êmbalip wit ŋawhê yêc ndê ôm, ma têtŋ ndoc iŋ kêbalip gêtŋ dau, naŋ ŋatô sêpeŋ sêsip seŋ, dec lau sêkwê dôŋ ma mbac lôlôc-ŋga sêsip sêmeŋ ma seŋ su. ⁶Ma ŋawhê ŋatô sêpeŋ sêsip gameŋ hoc-hoc, ma têtŋ têtŋ sêpo sêpi sêmeŋ, naŋ sem bôliŋ, bu nom dau tibasô. ⁷Ŋawhê ŋatô sêpeŋ sêsip kwaŋ ti ŋakwa ŋalôm, ma têtŋ ndoc sêpo sêpi sêmeŋ, naŋ kwaŋ pi whiŋ e yaŋ gêtŋ dau ndu. ⁸Ma ŋawhê ŋatô sêpeŋ sêsip nom ŋayham, ma sêpo sêpi sêmeŋ e sem ŋandô gitôm 100.” Yisu gic bata yom gôliŋ dau, goc sôm, “Asa bu dangasuy yêc, naŋ ŋgô aneŋ yom!”

Yisu whê yom gôliŋ wit ŋawhê-ŋga ŋahu sa
(*Mat 13:10-23; Mak 4:10-20*)

⁹Tiŋambu Yisu ndê ŋgacsêŋomi sêndac iŋ bu whê yom gôliŋ dinaŋ ŋahu sa. ¹⁰Ma iŋ sôm, “Anötô ndê gôliŋ ŋalêtŋ ŋahu sip ŋalôm gi. Iŋ kêyalinŋ mac sa bu aŋyalê ŋahu dau, magoc aô wasôm yom têtŋ lau ŋatô ŋa yom gôliŋ ŋambwa. Tôm yom naŋ sêto yêc, naŋ sôm, ‘Ŋac sêlic gêtŋ naŋ aô gakôm, naŋ ŋapaŋ, magoc ŋac si gauc sa dom. Ma ŋac sêŋgô aneŋ yom ŋapaŋ, tigeŋ ŋac sêŋyalê ŋahu dom.’”

¹¹Goc Yisu sôm, “Yom gôliŋ dau ŋahu bocdec. Yom pi wit ŋawhê naŋ hêganôŋ Anötô ndê yom. ¹²Wit ŋawhê naŋ sêpeŋ sêsip seŋ, naŋ hêganôŋ lau naŋ sêŋgô Anötô ndê yom, magoc Sadaŋ meŋ ma kêgaho yom dau su yêc ŋac si ŋalôm, tu bu ŋac sêkêtŋ whiŋ dom, ma sêtap Anötô ndê mwasiŋ nem ŋac si-ŋga sa dom. ¹³Ma yom pi wit ŋawhê naŋ sêpeŋ sêsip gameŋ hoc-hoc, naŋ hêganôŋ lau naŋ sêŋgô Anötô ndê yom ma sêkôc sa ti atac ŋayham, tigeŋ gitôm gêtŋ ŋawhê naŋ ŋawakac mba, dec lau dinaŋ sêkêtŋ whiŋ ŋasawa sauŋ, magoc lêtôm meŋ ku ŋac dulu. ¹⁴Ma yom pi wit ŋawhê naŋ sêpeŋ sêsip kwaŋ ti ŋakwa ŋalôm, naŋ hêganôŋ lau naŋ sêŋgô Anötô ndê yom, magoc ŋawapac ma mone ti gêtŋ ŋayham-ŋayham nom-ŋga gêm ŋac si ŋalôm ahuc, ma ŋac si ŋandô mbasi. ¹⁵Tigeŋ wit ŋawhê naŋ sêpeŋ sêsip nom ŋayham, naŋ hêganôŋ lau ti ŋalôm ŋawasi, naŋ sêŋgô Anötô ndê yom ma sêkôc sa tidôŋ yêc si ŋalôm, ma sêlhac ŋaŋga ŋapaŋ ma sem ŋandô daêsam.”

Dasiŋ lam ŋawê kwi dom
(*Mak 4:21-25*)

¹⁶Ma Yisu sôm yom daŋ bocdec bu, “Yac datuŋ lam asê tu bu dasiŋ kwi sip lôŋ ŋalôm, me dakêtŋ sôc sasac ŋapu dom. Mba! Taŋkiŋ êŋgalêtŋ ŋalhu, bu lau naŋ sêsôc sêmeŋ, naŋ sêlic ŋawê. ¹⁷Ma ŋalêtŋ tigeŋ, yom naŋ yêc siŋ dau, ma yom naŋ ŋahu sip ŋalôm gi, naŋ oc meŋ sa tiawê.

¹⁸“Bocdinaŋ akôc gauc ŋapep pi Anötô ndê yom naŋ mac aŋgô. Asa naŋ kôc Anötô ndê yom sa sip ndê ŋalôm e tidôŋ, naŋ Anötô oc kêtŋ ŋagauc daêsam têtŋ iŋ. Magoc asa naŋ gauc gêm bu iŋ kôc Anötô ndê yom sa su, tigeŋ iŋ kôc sa tidôŋ dom, naŋ Anötô oc kôc yom dau su yêc iŋ.”

Yisu dinda ti asii*(Mat 12:46-50; Mak 3:31-35)*

¹⁹Yisu ndöc andu daŋ, ma iŋ dinda ti asii sêmeŋ bu sêlic iŋ. Magoc lau daêsam sêmbo sêwhiŋ iŋ, ma gitôm dom bu sêtigasuc iŋ. ²⁰Ma ŋamalac daŋ sôm têtŋ Yisu, “Am dinam ti asimi sêmbo awê, ma ŋac bu sêlic am.” ²¹Magoc Yisu ô yom ma sôm, “Lau naŋ sêŋgô Anötö ndê yom ma daŋga wambu ŋapep, naŋ sêti aö dinaŋi ti asiŋi.”

Yisu kôm bu ŋamponŋ timalô*(Mat 8:23-27; Mak 4:35-41)*

²²Têtŋ bêc daŋ Yisu sôm têtŋ iŋ ndê ŋgacsêŋomi, “Dapi bugictoŋ ŋadaŋga dandi,” goc iŋ pi waŋ daŋ whiŋ ŋac, ma sêsa si. ²³Sêlac waŋ sêmbo, ma Yisu yêc bêc yêc. Ma mbu puc atu dec gêli bu sa ma ŋamponŋ gic sip waŋ e kêpiŋ bu waŋ pac. ²⁴Dec sêtêtŋ Yisu si, sêuŋ iŋ sa ma sêsôm, “Ŋadau, ŋadau, yac oc dandiŋaŋ!” Ma Yisu tisa ma sôm yom ŋaŋga têtŋ mbu ti bu ŋamponŋ, dec ŋamponŋ dau timalô, ma gameŋ ŋaŋeŋ sa. ²⁵Ma Yisu sôm têtŋ ŋac, “Tu sake-ŋga mac akêtŋ whiŋ gwalec?” Ma ŋac sêtöc dau ti sêhêdaê, ma sêsôm têtŋ dandi, “Ei! Iŋ ŋgac dec asa? Iŋ gitôm bu kêŋ yatu gêŋ hoŋ, ma mbu ti bu ŋamponŋ sêwhiŋ, ma sêsöc iŋ ndê yom ŋapu!”

Yisu kôm ŋgac ti ŋalau sac ŋayham sa*(Mat 8:28-34; Mak 5:1-20)*

²⁶Sêlac e sêhök asê lau Gerasa-ŋga si gameŋ naŋ yêc Bugictoŋ Galili-ŋga ŋadaŋga mbu têtŋ gameŋ ac pi-ŋga. ²⁷Yisu sip baö gi, ma ŋgac daŋ akêtŋ malac atu naŋ yêc gameŋ dinaŋ, naŋ têtŋ iŋ meŋ. Iŋ ŋgac naŋ ŋalau sac sêmbo iŋ ndê ŋalôm. Ŋasawa baliŋ su ŋgac dau söc ŋakwê dom, ma ndöc andu dom, magoc mbo öm sêhök-ŋga. ²⁸⁻²⁹Ndoc daêsam ŋalau sac sêkök iŋ döŋ, ma lau sêŋsahê bu sêsö iŋ amba ti gahi döŋ ŋa sen ŋaŋga ma sêyob iŋ. Magoc têtŋ hoŋ iŋ hê sen kic, ma ŋalau sac sêwê iŋ sa gameŋ sawa gi. Têtŋ ndoc iŋ gêlic Yisu meŋ, naŋ iŋ mbwêc ma hu dau sip nom yêc iŋ aŋgök-ŋga. Ma Yisu gic atu ŋalau sac bu sêhu ŋgac dau siŋ, goc ŋalau daŋ ta yom ti ŋaŋga, “Yisu, Anötö Ŋaclai ti Ŋawasi Ŋadau ndê Atu, am bu kôm sake têtŋ aö? Aö wateŋ am bu kôm aö ŋayom dom!” ³⁰Goc Yisu ndac ŋalau sac, “Am nem ŋaê asa?” Ŋalau sac daêsam sêmbo ŋgac dau ŋalôm, ma tu dinaŋ-ŋga ŋac si daŋ ô Yisu ndê yom ma sôm, “Aneŋ ŋaê ‘Toŋ Atu.’ ” ³¹Ma ŋalau sac h oŋ dinaŋ sêteŋ Yisu tidim daêsam, bu êŋkiŋ ŋac sêsip suŋ baliŋ sac naŋ sêsam bu Abis,^f naŋ sêndi dom.

³²Têtŋ têtŋ dinaŋ böc toŋ atu seŋ gêŋ sêmbo löc ŋapu yêc gameŋ dinaŋ, ma ŋalau dau sêteŋ Yisu bu êŋkiŋ ŋac sêsök böc dinaŋ si ŋalôm, ma Yisu

^f 8:31 Suŋ baliŋ sac (Abis) - alic Rev 9:1.

gôlôc. ³³Goc ñalau sac sêhu ñgac dinañ siñ ma sêsôc bôc si ñalôm si. Ma bôc hoñ sênti sêsip salic sac ma sêsip bugictôñ ñalôm si, ma bu kô ñac sêmbac ndu. ³⁴Têñ ndoc lau sêyob bôc-ñga sêlic gêñ dau, nañ sêlhô si, ma sic miñ pi gêñ dau têñ lau nañ sêmbô malac atu ti gameñ ñamakê-ñga. ³⁵Ma lau hoñ sêsa si bu sêlic gêñ nañ Yisu kôm. Têñ têm sêhôt asê iñ, nañ sêlic ñgac nañ iñ soc ñalau sac su yêc iñ, nañ ndôc Yisu gahi-ñga. Sêlic bu iñ ndê gauc ñawa sa, ma iñ sôt ñakwê sa tiyham, dec sêtôt dandi. ³⁶Lau nañ sêlic gêñ dau, nañ sic miñ têñ ñac pi ñalêñ nañ Yisu kôm ñgac ti ñalau sac ñayham sa. ³⁷Ma lau Gerasa-ñga hoñ sêndac Yisu bu hu ñac siñ, bu ñac sêtôt dau atu. Goc Yisu pi wañ ma bu lhô ndi. ³⁸Ma ñgac nañ ñalau sac sêhu iñ siñ, nañ teñ Yisu ñaŋga bu whiñ iñ ndi, magoc Yisu kêkiñ iñ sa gi ma sôm, ³⁹“Am mbu têñ am nem andu ndi, ma ndic miñ gêñ hoñ nañ Anötô kôm têñ am.” Goc ñgac dau kôlhô gi, ma gic miñ têñ lau hoñ nañ sêmbô malac atu dinañ, pi gêñ atu nañ Yisu kôm têñ iñ.

Yisu kôm awhê lu ñayham sa

(*Mat 9:18-26; Mak 5:21-43*)

⁴⁰Lau daêsam sêhôn Yisu sêmbô gameñ Galili-ñga, ma têñ têm iñ mbu akêñ bugictôñ ñadañga meñ, nañ sêkôc iñ sa ti atac ñayham. ⁴¹Ma ñgac bata dañ, nañ yob lôm wê-ñga yêc gameñ dinañ, nañ meñ hôt asê Yisu. Iñ ndê ñaê Jairas, ma iñ hu dau sip nom yêc Yisu aŋgô-ñga, ma teñ iñ ñaŋga bu têñ iñ ndê andu ndi, ma nem iñ ndê atuwê sa. ⁴²Bu iñ ndê atuwê tigeñ, nañ ndê yala gitôm 12, nañ gêmbac atu e kêpiñ bu mbac ndu. Bocdinañ Yisu whiñ iñ gi.

Iñ kêsêlêñ mbo señ, ma lau toñ atu sêñgihi iñ ahuc. ⁴³Lau toñ dinañ si dañ iñ awhê nañ gêm dac ñapañ tôm yala 12 su, magoc ñamalac dañ gitôm bu nem iñ sa dom. ⁴⁴A whê dau meñ kêsêlêñ mbo Yisu ñambu-ñga, ma kêmasêc iñ ndê ñakwê sip ñadali. Ma ñagahô iñ ndê dac sa tiyham dom. ⁴⁵Têñ dinañ Yisu ndac, “Asa kêmasêc aô?” Lau dañ sêsôm dau asê dom, ma Pita sôm, “Aneñ ñadau, lau toñ dindêc sêwhiñ yac sêkôm am si.” ⁴⁶Magoc Yisu sôm, “Ñamalac dañ kêmasêc aô, bu aô kayalê bu aneñ ñaclai ñatô sa gi.” ⁴⁷Awhê dinañ kêyalê bu iñ gitôm dom bu siñ dau, dec tigasuc Yisu. Iñ kêtitec, ma hu dau sip nom gi. Ma yêc lau hoñ aŋgô-ñga, iñ whê sa bu iñ kêmasêc Yisu tu bu ñayham sa-ñga, ma bu têñ ndoc iñ kêmasêc iñ, nañ ñagahô iñ ñayham sa. ⁴⁸Ma Yisu sôm têñ iñ, “O aneñ bawhê, am nem kêñ whiñ aô dec kôm am ñayham sa. Am lhô ti atac malô ndi.”

⁴⁹Yisu sôm yom dinañ mbo, ma ñgac dañ meñ akêñ Jairas ndê andu, ma sôm têñ Jairas, “Am atômwê mbac ndu su, dec kêñ ñawapac têñ Kêdôhônwaga dau dom.” ⁵⁰Yisu ñgô yom dinañ, magoc iñ sôm têñ Jairas, “Tôt daôm dom. Kêñ whiñ, ma iñ oc ñayham sa.”

⁵¹⁻⁵³Têñ ndoc sêhôt asê Jairas ndê andu, nañ sêlic lau daêsam sêhu dañgibo asê ma sêtañ sêmbô. Goc Yisu sôm, “Mac atañ dom! Iñ mbac

ndu dom, iŋ yêc bêc yêc.” Magoc ŋac sêmbwac iŋ, bu sêŋyalê bu bawhê dau mbac ndu su. Tigeŋ Yisu kalhac lau hoŋ ahuc sêmba awê, ma kôc Pita, Jems ma Jon, ma bawhê dau damba lu dinda, sêwhiŋ iŋ ma sêsôc andu si. ⁵⁴Ma iŋ kêm bawhê dau sip amba ma sôm, “Aneŋ bawhê, tisa!” ⁵⁵Goc bawhê dau tali sa tiyham, ma ŋagahô iŋ tisa kalhac. Ma Yisu sôm bu sêkêŋ gêŋ daner-ŋga têŋ iŋ. ⁵⁶Iŋ damba lu dinda sêhêdaê, magoc Yisu gic yao bu sêndic miŋ pi gêŋ naŋ iŋ kôm, naŋ dom.

Yisu kêkiŋ ŋgacsêŋomi 12 sêsa si

(*Mat 10:7-11; Mak 6:7-11*)

9 ¹Yisu kêgalêm ŋgacsêŋomi 12 sa sêpitigeŋ, ma kêŋ ŋaclai ti licwalô têŋ ŋac gitôm bu sêsoc ŋalau sac su, ma sêkôm lau gêmbac ŋayham sa. ²Ma iŋ kêkiŋ ŋac bu sêsa sêndi ma sênem mêtê pi Anötö ndê gôliŋ, ma bu sênem lau gêmbac sa. ³Iŋ sôm têŋ ŋac, “Aŋsêlêŋ amam sawa andi, akôc tôc dom, ma akôc talhi, me bolom, me mone, me ŋakwê aô daôm-ŋga dom. ⁴Têŋ têm mac asôc malac daŋ ma lau sêkôc mac sa asôc ŋac si andu, naŋ ambo whiŋ ŋac e mac ahu malac dau siŋ. ⁵Ma lau malac daŋ-ŋga bu sêkôc mac sa dom, naŋ atoŋ kop su yêc gahim têŋ ndoc mac ahu ŋac siŋ, bu atôc ŋac si giso asê.” ⁶Ŋgacsêŋomi sêŋgô yom dinaŋ, goc sêsa si. Ŋac sêŋsêlêŋ sêlom-sêlom malac ma sêhoc ŋawaê ŋayham asê, ma sêkôm lau ŋayham sa yêc gameŋ hoŋ.

Herod ndac bata Yisu

(*Mat 14:1-2; Mak 6:14-16*)

⁷Têŋ ndoc dinaŋ gôliŋwaga Galili-ŋga Herod ŋgô yom pi gêŋ hoŋ naŋ Yisu kôm. Ma iŋ gauc gêm yom daêsam, bu lau ŋatô sêsôm bu Yisu iŋ Jon, Ŋgac Kêku Lau-ŋga naŋ tisa akêŋ lau batê-ŋga. ⁸Ma lau ŋatô sêsôm bu iŋ propet akwa Elaija naŋ meŋ hoc dau asê, ma ŋatô sêsôm bu iŋ propet ŋamata-ŋga si daŋ, naŋ tisa akêŋ lau batê-ŋga. ⁹Tigeŋ Herod sôm, “Aô gac atu, dec sêtim Jon ndê kachu kic su. Asa dec lau sic miŋ pi iŋ?” Ma iŋ tac whiŋ bu lic Yisu.

Yisu gôlôm lau 5,000

(*Mat 14:13-21; Mak 6:32-44; Jon 6:1-15*)

¹⁰Têŋ têm aposel 12 sêmbu sêmeŋ, naŋ sic miŋ têŋ Yisu pi gêŋ hoŋ naŋ sêkôm. Ma tiŋambu iŋ kôc ŋac sa sêwhiŋ iŋ, ma ŋac tawasê sêtêŋ malac Betsaida si. ¹¹Magoc lau daêsam sêŋgô ŋawaê ma sêtêŋ Yisu si. Ma iŋ kôc ŋac sa, ma sôm y om têŋ ŋac pi Anötö ndê gôliŋ, ma kôm ŋac si lau gêmbac ŋayham sa.

¹²Sêmba e kêpiŋ bu ac ndi sip, goc ŋgacsêŋomi 12 sêtêŋ iŋ si ma sêsôm, “Gameŋ dindec yac dambo, naŋ gameŋ sawa. Bocdinaŋ êmkiŋ lau toŋ dindec sêlhô sêtêŋ malac ti gameŋ ŋamakê-ŋga sêndi, bu sêŋsalê

gêṅ sêneṅ-ṅga ma gameṅ sêyêc bêc-ṅga.” ¹³ Magoc Yisu sôm, “Mac akêṅ gêṅ têṅ ṅac sêneṅ.” Ma ṅac sêḍ yom ma sêsôm, “Yac mba gêṅ daner-ṅga daêsam dom. Bolom limdaṅ ma i lu sêndöc. Bocke? Yac andi anemlhi gêṅ bu lau hoṅ sêneṅ, a?” ¹⁴ Ṽac sêsôm yom dinaṅ ṅahu bu lau toṅ dinaṅ si laungac ṅanamba gitôm 5,000. Magoc Yisu sôm têṅ iṅ ndê ṅgac-sêṅomi, “Akêṅ lau sêndöc sic titoṅ-titoṅ tôm 50.” ¹⁵ Goc ṅac sêkôm gitôm iṅ sôm, ma lau hoṅ sêndöc sic. ¹⁶ Ma Yisu kôc bolom limdaṅ ma i lu sa, tatac undambê, ma gêm daṅge, goc pô kôc-kôc, ma kêṅ têṅ ṅgacsêṅomi bu sêndic sam têṅ lau. ¹⁷ Lau hoṅ seṅ gêṅ e hóc ṅac dôn, ma tiṅambu ṅgacsêṅomi sic gêṅ ṅadêlê sa sip gatop 12 e meṅhu.

Pita sôm Yisu ṅahu asê
(*Mat 16:13-20; Mak 8:27-30*)

¹⁸ Têṅ ndoc daṅ Yisu ti iṅ ndê ṅgacsêṅomi sêmbo tawasê, ma iṅ teṅ mbec mbo. Pacndê, goc iṅ ndac ṅac, “Lau sêsôm bu aö asa?” ¹⁹ Ma sêsôm, “Lau ṅatô sêsôm bu am Jon, Ṽgac Kêku Lau-ṅga, ma ṅatô sêsôm bu am Elaija, ma ṅatô sêsôm bu am propet ṅamata-ṅga si daṅ, naṅ tisa akêṅ lau batê-ṅga.” ²⁰ Goc Yisu ndac ṅac, “Ma mac daôm, mac asôm bu aö asa?” Ma Pita sôm, “Am Mesaya, naṅ Anötö gic bata bu êṅkiṅ meṅ.” ²¹ Yisu ṅgô yom dau ma gic yao ṅac bu sêsôm asê têṅ lau daṅ dom e tiṅambu. ²² Iṅ sôm, “Ṽamalac ndê Atu gic waê bu hóc ṅawapac daêsam. Lau bata ti ṅdabuṅsiga atu-tu ma lau naṅ sêndôhôn yomsu oc sêtec iṅ ma lau oc sêndic iṅ ndu. Magoc têṅ bêc titö-ṅga Anötö oc uṅ iṅ sa tiyham.”

Lau naṅ sêṅkuc Yisu oc sêhóc ṅawapac
(*Mat 16:24-28; Mak 8:34–9:1*)

²³ Ma iṅ sôm têṅ ṅac hoṅ, “Asa naṅ tac whiṅ bu êṅkuc aö naṅ êṅgwiniṅ dau, ma tôm bêc hoṅ hóc ndê a gicso dau sa, ma êṅkuc aö. ²⁴ Bu asa naṅ tac whiṅ bu sap gêṅ nom-ṅga dôn ṅapaṅ tu mbo tali-ṅga, naṅ oc niṅga. Magoc asa naṅ bu hu gêṅ nom-ṅga siṅ tu êṅkuc aö-ṅga, naṅ oc niṅga dom. ²⁵ Ṽamalac daṅ bu po gêṅ nom-ṅga hoṅ sa, magoc iṅ dau gatu bu niṅga, dec gêṅ nom-ṅga hoṅ dinaṅ oc tôm dom bu nem iṅ sa. ²⁶ Asa naṅ bu maya tu aö ti aneṅ yom-ṅga, naṅ Ṽamalac ndê Atu oc maya tu iṅ-ṅga, têṅ ndoc iṅ mbu meṅ ti iṅ dau ndê ṅawasi, ma Damba ndê ṅawasi ma aṅela dabuṅ si ṅawasi whiṅ. ²⁷ M a aö wasôm bu yomandô, lau ṅatô kwahic dec sêmbo, naṅ oc gacgeṅ sêmbo tali e sêlic Anötö ndê gôliṅ meṅ sa tiawê.”

Pita, Jems ma Jon sêlic Yisu ndê ṅawasi
(*Mat 17:1-13; Mak 9:2-10*)

²⁸ Yisu sôm yom dinaṅ su, ma bêc ṅatô gitôm 8 meṅ gi su. Ma Yisu bu teṅ mbec, dec kôc Pita, Jon ma Jems sêwhiṅ iṅ ma sêpi lôc daṅ si. ²⁹ Ma

tên tēm Yisu ten mbec mbo, nan in nde angô andô kain dan sa, ma in nde ngakwê nawasi sêp sambuc. ³⁰⁻³¹Ma ngac lu sêhôn asê ti nawasi atu, nan Moses lu Elaija, ma inlu sem yomgalôm sêwhin Yisu. Sêsôm yom pi gên nan oc hôn asê Yisu yêc malac Jerusalem tên ndoc men sa bu in hu nom dindéc sin.

³²Tên ndoc dinan, Pita ma ngac lu nan sêwhin in, nan kwapac ma bêc yô nac, tigen nac tali sa ma sêlic Yisu nde nawasi ti ngac lu nan sêlhac sêwhin in. ³³Tên tēm Moses lu Elaija bu sêhu Yisu sin, nan Pita sôm tên in, “Ŋadau, nayham kêlêc bu yac dambo dec. Yac oc akwê bac tö, am nem dan, Moses nde dan, ma Elaija nde bac dan.” In sôm yom dinan, magoc in nde gauc sa dom. ³⁴In sôm yom dinan mbo, ma dao dan men ma kôm nac ahuc e ngacsênomi tö dinan sêtôc dau atu. ³⁵Ma awha dan sa yêc dao nalôm, nan sôm, “Aô neŋ atungac dau dindéc, nan aô kayalin sa. Angô in nde yom man!” ³⁶Sênghô su goc sêlic Yisu tawasê mbo. Tinambu nac sem yom dau ahuc yêc dau-nga, ma tên ndoc dinan sêsôm yom asê pi gên nan sêlic, nan dom.

Yisu soc nalau sac su yêc balê dan

(Mat 17:14-21; Mak 9:14-29)

³⁷Tên galansê nac sêsip akên lôc dau sêmen, ma lau ton atu sêkac sa sêtên Yisu si. ³⁸Ŋac si dan ta yom bocdec bu, “Kêdôhônwaga, aô gakôc aneŋ atungac tigen dindéc men, ma waten am bu nem in sa. ³⁹Ŋalau sac dan mbo in nalôm, ma tēm daêsam kôc in dön, m a kêmwanan in nanŋa e in mbwêc atu, ma whapwic sa. Ŋalau sac dau bu kôm in tisac, ma tec bu hu in sin. ⁴⁰Aô gateŋ am nem ngac-sênomi bu sêsoc nalau dau su, magoc nac sêtôm dom.” ⁴¹Goc Yisu sôm, “O mac lau sac. Mac nem akên whin mbasi! Aô gambo gawhin mac nasawa hic balin su, ma bocke mac atôm dom bu akôm gên dan? Aô oc wambo wawhin mac tu wanem mac sa napan-nga dom!” Ma Yisu sôm tên balê dau nadamba, “Kôc nem balê sa mwen.”

⁴²Tên tēm balê dau kêsêlên men, nan nalau sac kôc in dön ma kêmwanan in. Tigen Yisu hec yom nalau sac, ma kôm balê dau nayham sa, ma kên in mbu tên in damba gi. ⁴³Ŋalên dinan Yisu tôc Anötö nde naclai ti nawasi atu asê, dec kôm lau hon sêhêdaê.

Yisu sôm tiyham bu in oc mbac ndu ma tisa tiyham

(Mat 17:22-23; Mak 9:30-32)

Lau hon sêlhac ti sêhêdaê tu gên hon nan Yisu kôm-nga, ma in sôm tên in nde ngacsênomi, ⁴⁴“Angô aneŋ yom dindéc napep! Tinambu oc sêkên Ŋamalac nde Atu sip lau natô amba.” ⁴⁵Magoc nac sênjalê yom dau nahu dom. Yom dau nahu yêc sin dau tên nac, ma sêtôc bu sêndac Yisu bu whê sa tên nac.

Asa ti ngac namata-nga
(*Mat 18:1-5; Mak 9:33-37*)

⁴⁶Tijambu Yisu ndê ngac-sêñomi sêseñ dau pi ñac si asa iñ ngac namata-nga. ⁴⁷Yisu kêyalê ñac si gauc, goc kôc balê sauñ ñañ ma kêñ iñ kalhac kêpiñ iñ, ⁴⁸ma sôm têtñ ñac, “Asa ñañ kôc balê sauñ ñañ tòm iñ dindec sa tu aneñ ñaê-nga, ñañ kôc aô sa, ma asa ñañ kôc aô sa, ñañ kôc iñ ñañ kêkiñ aô gameñ, ñañ sa. Mac nem asa ñañ kêtwininñ dau ma ti mac nem ngac akiñ, ñañ ti ngac namata-nga yêc Anötö añgô-nga.”

Lau ñañ sêkôm gwelenñ tu Yisu-nga, ñañ sêwhê dau kôc dom
(*Mak 9:38-41*)

⁴⁹Ma Jon sôm, “Ñadau, yac alic ngac ñañ kôm gwelenñ ma soc ñalau sac su yêc lau ña am nem ñaê. Iñ kêkuc am whiñ yac dom, ma boc-dinañ yac ac yao iñ bu kôm gwelenñ dau dom.” ⁵⁰Tigeñ Yisu sôm, “A lhac iñ ahuc dom, bu asa ñañ kêñ kisa mac dom, ñañ mac nem ñañ.”

Lau gameñ Samaria-nga sêkôc Yisu sa dom

⁵¹Ndoc meñ kêpiñ bu Yisu mbu pi undambê ndi, dec iñ kêmasañ dau bu pi malac Jerusalem ndi. ⁵²Iñ kêkiñ lau aheñ-nga sêmuñ iñ, sêsôc lau †Samaria-nga si malac ñañ si, bu sêmasañ gameñ tu iñ mbo-nga. ⁵³Magoc lau Samaria-nga sêñyalê bu iñ kêsêlêñ hêganônñ malac Jerusalem, ma tu dinañ-nga dec sêkôc iñ sa dom. ⁵⁴Jems lu Jon sêlic gêtñ dau, goc sêndac Yisu, “Pômdau, am bu sôm, dec yac oc añgalêm ya sip akêtñ undambê meñ, ma señ ñac su.” ⁵⁵Tigeñ Yisu kac dau kwi, ma sôm iñlu. ⁵⁶Ma ñac hoñ sêlom malac ñañ si.

Lêñ tañkuc Yisu-nga
(*Mat 8:18-22*)

⁵⁷Yisu ti ndê ngacsêñomi sêñsêlêñ sêmbo señ ma ngac ñañ sôm têtñ Yisu, “Aô bu wañkuc am, wawhiñ am watêñ gameñ bocke ñañ am oc ndi.” ⁵⁸Ma Yisu ô iñ ndê yom ma sôm, “Giam pôm si hocsuñ yêc, ma mbac lôlôc-nga si ñaic yêc, tigeñ Ñamalac ndê Atu ndê mala yêc bêc-nga mba.”

⁵⁹Ma iñ sôm têtñ ngac ñañ, “Mweñ êmkuc aô!” Magoc ngac dau sôm, “Pômdau, gêtñ namata-nga aô wandi wambo wawhiñ aneñ lau e añsuhunñ damañ su ñañ, ma tijambu wambu wameñ wañkuc am.” ⁶⁰Ma Yisu sôm têtñ iñ, “Mba! Am êmkuc aô ñañ gêtñ namata-nga. Tec lau batê sêñsuhunñ lau batê. Tigeñ am ndi, ma hoc yom asê têtñ lau pi Anötö ndê gôliñ.”

⁶¹Ma ngac ñañ tiyham sôm, “Pômdau, aô bu wañkuc am, tigeñ gêtñ namata-nga wambu watêñ aneñ andu, ma wakam aneñ lau.” ⁶²Ma Yisu ô iñ ndê yom ma sôm, “Asa ñañ gic hu gwelenñ ñañ, tigeñ kac dau kwi ma

hêgo gêñ nañ in hu sinj su, nañ gitôm dom bu nem gwelenj mbo Anötö ndê gôlinj ñapu.”

Yisu kêkinj sêñomi 72 sêsa si

10 ¹Tiñambu Pômdau kêyaliñ sêñomi 72 tiyham sa, bu êñkinj ñac lu-lu sêsa sêndi sêmunj in, sêtêñ gameñ ti malac hoñ nañ in atac whiñ bu ndic kêsi. ²Ma in sôm têtñ ñac, “Gêñ ñandô daêsam yêc ôm, magoc lau sêndic gêñ ñandô sa-ñga daêsam dom. Bocdinañ atej mbec têtñ ôm ñadau bu êñkinj lau gwelenj-ñga sêsôc in ndê ôm sêndi, ma sêndic gêñ ñandô sa. ³Kwahic dec aô bu wañkinj mac asa andi! Magoc ayob daôm ñapep, bu aô kakiñ mac bu asa andi atôm domba ñatu, nañ sêtêñ giam pôm si gameñ sêndi. ⁴Akôc talhi, me dalu, me atapa dom, ma añsêlêñ ñagahô andi. Ahê mwalêc lau yêc señ dom. ⁵Têtñ ndoc mac bu asôc andu dañ, nañ asôm bu, ‘Yom malô têtñ lau andu dindec-ñga.’ ⁶Andu ñadau bu ñgac yom malô-ñga dom, dec mac nem mbec yom malô-ñga oc gacgeñ yêc mac-ñga. Ma andu ñadau bu ñgac yom malô-ñga, dec in oc kôc mbec yom malô-ñga dinañ sa. ⁷Ambo andu dinañ, ma alom-alom andu dom. Aneñ ti anôm gêñ bocke nañ sêkêñ têtñ mac, nañ ti mac nem ñaôli gwelenj-ñga. Mêtê solop bu lau g welenj-ñga sêkôc ñaôli gwelenj-ñga.

⁸“Têtñ têtñ mac asôc malac dañ, ma lau sêkôc mac sa, nañ aneñ gêñ daneñ-ñga nañ sêkêñ têtñ mac. ⁹Akôm ñac si lau gêmbac ñayham sa, ma asôm têtñ ñac, ‘Anötö ndê gôlinj meñ kêpiñ.’ ¹⁰Tigeñ mac bu asôc malac dañ, ma sêkôc mac sa dom, nañ goc alhac malac lôm ma asôm, ¹¹‘Yac atonj kop mac nem malac-ñga su yêc yac mba gahiñ. Yac akêñ kop dindec mbu têtñ mac bu atôc nem mêtê sac asê. Tigeñ añyalê bu Anötö ndê gôlinj meñ kêpiñ.’ ¹²Yomandô aô wasôm têtñ mac bu têtñ bêc Anötö êmatôc lau-ñga, nañ lau malac dinañ-ñga oc sêtap ñagêyô sac andô sa, hóc gêlêc ñagêyô nañ Anötö oc kêñ têtñ lau sac malac Sodom-ñga.”

Yisu sôm yom pi lau nañ sem dau kwi dom

(Mat 11:20-24)

¹³Yisu gic têtñ yom ma sôm, “Oyaê mac lau malac Korasin ma Betsaida-ñga. Mac oc atap Anötö ndê atac ñandê sa. †Lau apa nañ sêndôc malac Taya ma Saidon, bu sêlic gêñ dalô nañ aô gakôm yêc mac añôm-ñga, dec oc tôm sênem dau kwi wandêc su, ma sêndôc ti sêtañ si sac. ¹⁴Tigeñ mac akôm dom, dec wasôm têtñ mac bu têtñ ndoc Anötö êmatôc lau-ñga, nañ in oc kêñ ñagêyô sac sambuc têtñ mac, hóc gêlêc ñagêyô nañ in oc kêñ têtñ lau Taya ti Saidon-ñga, nañ su.

¹⁵“Ma mac lau Kapenaom-ñga, mac gauc gêm bu mboe Anötö oc kôc mac sa andôc undambê, a? Mba! In oc êmasuc mac su asip lambwam andi!”

¹⁶Ma Yisu sôm têtñ sêñomi 72 bu, “Asa nañ kôc mac nem yom sa, nañ gitôm in kôc aneñ yom sa. Ma asa nañ tec mac, nañ gitôm in tec aô

bocdinaŋ. Ma asa naŋ tec aö, naŋ tec Damaŋ naŋ kêkiŋ aö gameŋ.” Yisu sôm yom dinaŋ su, goc kêkiŋ sêŋjomi 72 sêsa si.

Sêŋjomi 72 sêmbu sêmeŋ

¹⁷Tiŋambu sêŋjomi 72 dinaŋ sêmbu sêmeŋ ti atac ŋayham, ma sêsôm, “Pômdau, têŋ ndoc yac asôm am nem ŋaê asê, naŋ gêŋ hoŋ sêsôc yac mba yom ŋapu, ma ŋalau sac sêwhiŋ.” ¹⁸Ma Yisu sôm, “Aö kayalê bu gêŋ naŋ mac akôm, naŋ ku Sadaŋ ndê ŋaclai dulu, e tôm iŋ peŋ akêŋ undambê ŋagahô ŋambwa, tôm sickac hep tigeŋ. ¹⁹Aö gakêŋ ŋaclai têŋ mac su, tôm bu akwê mboc ti gapiŋgap dôn, ma bu ahôc gêlêc mac nem ŋacyo Sadaŋ ndê ŋaclai hoŋ su. Gêŋ daŋ oc kôm mac atisac dom. ²⁰Kwahic dec mac atac ŋayham bu ŋalau sac sêsôc mac nem yom ŋapu. Tigeŋ atac ŋayham atu, bu Anötö to mac nem ŋaê sa yêc undambê.”

²¹Têŋ ndoc dinaŋ ŋalau Dabuŋ gêm Yisu ahuc, ma iŋ tac ŋayham atu, ma sôm, “O Damaŋ, undambê ti nom ŋadau. Aö wampiŋ am bu am tôlec nem yom ŋa-ŋandô asê têŋ lau naŋ sêŋgwiniŋ dau, ma siŋ kwi têŋ lau naŋ gauc gêm bu ŋac lau tigauc ma sêŋyalê gêŋ hoŋ. Aêc, Damaŋ, am kôm bocdinaŋ kêkuc am daôm nem atac whiŋ.

²²“Damaŋ kêŋ gêŋ hoŋ sip aö amaŋ. Lau daŋ sêŋyalê Atu dom, Damba tawasê kêyalê iŋ. Ma lau daŋ sêŋyalê Damba dom, tigeŋ iŋ ndê Atu kêyalê iŋ, ma lau naŋ Atu dau atac whiŋ bu tôlec iŋ asê têŋ ŋac, naŋ sêŋyalê Damba.”

²³Ma iŋ kac dau kwi ma sôm têŋ iŋ ndê ŋgacsêŋjomi tawasê, “Atac ŋayham tu mac alic gêŋ hoŋ dindec-ŋga. ²⁴Aö wasôm têŋ mac bu propet ti kiŋ daêsam atac whiŋ bu sêlic gêŋ naŋ mac alic su, magoc sêlic dom. Ma ŋac atac whiŋ bu sêŋgô yom naŋ mac ŋgô su, magoc sêŋgô dom.”

Yom gôliŋ pi lau meŋpaŋ yac-ŋga

(*Mat 22:34-40; Mak 12:28-31*)

²⁵Têŋ ndoc daŋ gwalam akwa yomsu-ŋga daŋ tisa bu êŋsahê Yisu. Ma iŋ ndac Yisu bocdec bu, “Kêdôhônwaga, aö wakôm sake, dec Anötö oc kôlec aö sa wambo taŋli ŋapaŋ yêc undambê?” ²⁶Ma Yisu sôm, “Am kêyalê yomsu hoŋ naŋ Anötö kêŋ têŋ Moses. Ma yomsu dau sôm bu am kôm sake?” ²⁷Goc ŋgac dau sôm, “Yomsu daŋ sôm bu, ‘Atac whiŋ Pômdau, am nem Anötö, ti am nem ŋalôm sambuc, ti gatôm sambuc, ti licwalô sambuc ma ti am nem gauc sambuc.’ Ma yomsu daŋ tiyham sôm bu, ‘Atac whiŋ lau meŋpaŋ am, tôm am tac whiŋ am daôm.’ ” ²⁸Ma Yisu sôm, “Am sôm solop. Kôm bocdinaŋ, dec am oc ndôlec tamli ŋapaŋ.”

²⁹Magoc ŋgac dau gauc gêm bu tôlec asê bu iŋ ŋgac gitêŋ, dec ndac Yisu, “Ma lau asa sêti aneŋ lau meŋpaŋ aö-ŋga?” ³⁰Yisu ô iŋ ndê yom ŋa yom gôliŋ daŋ bocdec bu, “ŋgac Israel-ŋga daŋ kêsêlêŋ mbo seŋ akêŋ Jerusalem ma bu sip têŋ malac Jeriko ndi, ma lau kaŋ sêkôlec iŋ dôn. ŋac

sêkôc ij ndê ñakwê su, sic ij tisac e kêpij bu mbac ndu, goc sêhu ij sin yêc ma sêlhô si. ³¹Tinjambu dabuñsiga Israel-nga dañ kêsêlêñ mbo señ tigeñ dinañ meñ, ma têtñ ndoc ij gêlic ñgac dau, nañ kêlêc ij ma kôlhô gi. ³²Malô goc ñgac Israel-nga dañ akêñ †Liwai ndê toñ meñ hóc asê, gêlic ñgac dau, ma kêlêc ij ma kêsêlêñ gi. ³³Tinjambu ñgac Samaria-nga dañ kêsêlêñ mbo señ dinañ, meñ hóc asê, goc gêlic ñgac dau ma tawalô ij. ³⁴Ij têtñ ij gi, kêgwasij ij ndê gamboc ña olib ñakwi ti wain, goc kêpanj. Ma ij kêtñ ij ndôc ij ndê doñki ñahô, kôc ij sa gi sôc andu ñaclêñ-nga dañ, ma yob ij. ³⁵Galansê bêbêc ij kêtñ mone denarii lu têtñ andu ñadau, ma sôm, ‘Nem yaom ñgac dindec. Ma mone dindec bu nditôm dom, goc wakêtñ mone ñatô tiyham têtñ ndoc aö wambu wameñ.’”

³⁶Ma Yisu ndac, “Am gauc gêm bocke? Lau tö dinañ si asa ij ñgac nañ sip lau kañ si amba, nañ ndê ñgac meñpanj ij-nga?” ³⁷Goc ñgac yomsu-nga sôm, “Ñgac dê, nañ tawalô ij.” Ma Yisu sôm, “Am ndi ma kôm bocdinañ. Tamwalô lau hoñ ma nem ñac sa.”

Mata lu Maria

³⁸Yisu ti ndê ñgacsêñomi sêñsêlêñ si e sêhóc asê malac dañ. Ma awhê dañ, nañ ndê ñaê Mata, kêgalêm Yisu bu neñ gêtñ yêc ij ndê andu. ³⁹Têtñ ndoc Yisu sôc gi ndôc, nañ Mata ndê asiwê Maria ndôc sic kêpij Pômdau gahi-nga, bu ñgô ij ndê yom. ⁴⁰Tigeñ Mata kôm gwelêñ atu tu ndê gêtñ-nga. Ij têtñ Yisu meñ ma ndac, “Pômdau, aö tañwasêñ gakôm gwelêñ gambo! Aö asijwê lec gêm aö sa dom, ma am gêlic ñayham, me? Sôm bu ij nem aö sa.” ⁴¹Magoc Yisu ô ij ndê yom ma sôm, “Mata, Mata, am hêgo daôm tu gêtñ daêsam-nga. ⁴²Magoc lau hoñ sêpônda gêtñ atu tigeñ. Maria tac whij gêtñ ñayham dau, ma lau dañ oc sêtôm dom bu sêkôc su yêc ij.”

Yom pi lêtñ dateñ mbec-nga

(Mat 6:9-13; 7:7-11)

11 ¹Têtñ bêc dañ Yisu teñ mbec mbo gameñ dañ. Ij teñ mbec pacndê, ma ij ndê ñgac-sêñom dañ sôm têtñ ij, “Pômdau, tôm Jon kêdôhôn ij ndê sêñomi, dec êmdôhôn yac bu atêñ mbec.” ²Ma Yisu sôm, “Têtñ ndoc mac bu atêñ mbec, nañ atêñ bocdec bu:

Damañ, am nem ñaê lau sênem dabuñ mañ.

Mweñ ti lau hoñ si Pômdau.

³Tôm bêc hoñ kêtñ yac mba gö têtñ yac.

⁴Suc yac mba sac kwi, bu lau hoñ nañ sêkôm sac têtñ yac, nañ asuc si sac ñatôp kwi bocdinañ.

Ma yob yac bu lêtôm tap yac sa dom.”

⁵⁻⁶Ma ij gic têtñ yom ma sôm, “Akôc gauc pi mac daôm nem lêtñ nañ atêñ gêtñ têtñ nem dawami. Mboe am nem ñaclêñ señ baliñ-nga dañ meñ hóc asê têtñ ôbwêc, ma am pônda gêtñ daneñ-nga bu kêtñ têtñ ij. Ma

têḅ timaniḅhu am bu tēḅ am nem dawam daḅ ndi, ma sôm tēḅ iḅ, ‘Oê dawaḅ, kēḅ gö ḅatô tēḅ aô bu wakēḅ tēḅ aô neḅ silip naḅ kwahic dec meḅ hôc asê.’ ⁷Am gauc gēm bocke? Am dawam dinaḅ oc ô nem yom yêc andu ḅalôm ma sôm, ‘Kēḅ ḅawapac tēḅ aô dom! Aô gac gatam ahuc su, ma aneḅ balêkoc sêyêc bêc su. Gitôm dom bu watisa ma wakēḅ gēḅ daḅ tēḅ am!’ Iḅ oc sôm bocdinaḅ, a? ⁸Aô wasôm tēḅ am, bu am nem dawam oc tisa ma kēḅ gēḅ tēḅ am, magoc iḅ oc kēḅ tu am dawam iḅ-ḅga dom. Iḅ oc kēḅ gēḅ tēḅ am tôm am ndac, ḅahu bu am pônḅa daôm ma mayam pac tu ndac iḅ-ḅga.

⁹“Bocdinaḅ aô wasôm tēḅ mac. Ateḅ gēḅ tēḅ Anötö, dec oc akôc ḅandô, aḅsalê iḅ ti ndê lêḅ, ma oc atap sa, ma amati gatam, dec oc lêc su tēḅ mac. ¹⁰Bu Anötö kēḅ gēḅ tēḅ lau hoḅ naḅ sêḅdac iḅ, ma lau hoḅ naḅ sêḅsalê iḅ ti ndê lêḅ, naḅ oc sêḅap sa, ma ḅac naḅ sêḅmati gatam, naḅ oc lêc su tēḅ ḅac.

¹¹“Damba daḅ, bu atuḅgac teḅ i, dec oc kēḅ mboc wēm daḅ tēḅ iḅ dom. ¹²Ma atuḅgac bu ndac mbac ḅ agulu, goc damba oc kēḅ gapiḅgac tēḅ iḅ dom. ¹³Mac lau sac, tigeḅ atoc nem balêkoc sa ḅa gēḅ ḅayham-ḅayham. Magoc Damam naḅ mbo undambê iḅ gitêḅ eḅ, ma oc kēḅ ḅjalau Dabuḅ tēḅ lau naḅ sêḅeḅ iḅ.”

Yisu ndê ḅaclai ḅahu
(*Mat 12:22-32; Mak 3:23-27*)

¹⁴Têḅ ndoc daḅ Yisu soc ḅjalau sac awha mba daḅ su yêc ḅgac daḅ. Têḅ tēm ḅjalau sac hu ḅgac awha mba dau siḅ, naḅ ḅgac dau gic hu sôm yom asê, ma lau toḅ atu naḅ sêlic, naḅ sêhêdaê.

¹⁵⁻¹⁶Lau ḅatô bu sêḅsahê Yisu, dec sêḅdac iḅ bu kôm gēḅ dalô daḅ bu tôc asê bu iḅ kôc ḅaclai yêc Anötö ndê. Ma lau ḅatô sêsôm, “ḅjalau sac si ḅadau †Belsebal kēḅ ḅaclai tēḅ Yisu, ma bocdinaḅ iḅ soc ḅjalau sac su.”

¹⁷Yisu kêyalê ḅac si gauc, ma sôm, “Lau gameḅ daḅ bu sêwhê dau kôc, dec ḅac si ḅacyo oc sêseḅ ḅac su. Ma gôlôwac daḅ bu sêwhê dau kôc, dec ḅac oc sêlhac ḅaḅga dom, ma ḅac si ḅacyo oc sêku ḅac dulu. ¹⁸Ma Sadaḅ boc-dinaḅ. Iḅ bu kēḅ kisa iḅ ndê ḅjalau sac, dec iḅ ndê gôliḅ oc niḅga. Bocke dec mac asôm bu aô gasoc ḅjalau sac su ḅa Belsebal ndê ḅaclai.

¹⁹Mac asôm bu aô gakôc ḅaclai yêc Belsebal, dec gasoc ḅjalau sac su. Ma bocke? Mac nem sêḅomi naḅ sem gweleḅ sêsoc ḅjalau sac-ḅga sêwhiḅ, naḅ mac aḅgôliḅ yom dau pi ḅac whiḅ, a? ḅac oc sêlic mac nem yom bu so ma sêmatôc mac! ²⁰Aô gasoc ḅjalau sac ḅa Anötö ndê ḅaclai, bocdinaḅ aḅyalê bu Anötö ndê ḅaclai bu nem gôliḅ gēḅ hoḅ, naḅ hôc asê mac su.

²¹“Sadaḅ iḅ gitôm ḅgac ti licwalô atu naḅ kôc iḅ ndê wapa siḅ-ḅga, ma yob iḅ ndê andu. Oc tôm dom bu lau sêḅgaho ḅgac kaiḅ dinaḅ ndê gēḅ daḅ. ²²Tigeḅ ḅgac ti licwalô atu naḅ hôc gêlêc iḅ ndê bu ndic siḅ tēḅ iḅ ma ku iḅ dulu, dec iḅ oc kôc iḅ ndê wapa siḅ-ḅga su, ma whê iḅ ndê wapa hoḅ kôc.

23 “Asa naŋ kalhac whiŋ aö dom, naŋ ti aneŋ ŋacyo. Ma asa naŋ gic lau sa sêteŋ aö sêmeŋ dom, naŋ soc ŋac su yêc aö.”

Ŋalau sac sêŋsalê mala naŋ yêc ŋambwa
(*Mat 12:43-45*)

24 “Têŋ ndoc ŋalau sac daŋ sa yêc ŋamalac daŋ, naŋ gitôm iŋ kêgihi mbo gameŋ sawa ma kêsalê mala êŋwhaŋ dau-ŋga. Tigeŋ têtŋ ndoc iŋ tap sa dom, naŋ iŋ oc sôm têtŋ dau, ‘Aö wambu wandi wasôc andu naŋ aö gahu siŋ su.’ 25 Ma iŋ oc mbu ndi, ma tap sa bu ŋamalac dau ndê ŋalôm yêc ŋambwa, gitôm andu sawa naŋ sêmasaŋ ŋawasi sa. 26 Dec iŋ oc sa ndi, kôc ŋalau sac 7 naŋ sac sambuc sêhóc gêlêc iŋ su, naŋ sêmeŋ, ma ŋac hoŋ oc sêsôc andu dinaŋ sêndi ma sêmbo dinaŋ. Bocdinaŋ ŋawapac naŋ tap ŋamalac dau sa, naŋ hóc gêlêc ŋawapac ŋamata-ŋga-ŋga su.”

27 Yisu sôm yom dinaŋ, ma awhê daŋ yêc lau toŋ atu ŋalôm ta yom ma sôm, “Am dinam naŋ kôc am ma kêŋ su am, naŋ tap Anötö ndê mwasiŋ sa su.” 28 Ma Yisu sôm, “Lau naŋ sêŋgô Anötö ndê yom ma sêkôc sa ti daŋga wambu, naŋ oc sêtap Anötö ndê mwasiŋ sa hóc gêlêc su.”

Lau sêndac Yisu bu kôm gêtŋ dalô
(*Mat 12:38-42*)

29 Lau daêsam naŋ sêmbo sêwhiŋ Yisu, naŋ si toŋ kêsôwec ŋapaŋ. Ma iŋ sôm, “Lau têm dindéc-ŋga ŋac lau sac. Sêndac gêtŋ dalô, magoc Anötö oc tôc gêtŋ dalô tigeŋ têtŋ ŋac, tôm gêtŋ dalô naŋ iŋ kôm pi Jona. 30 Anötö kêkiŋ Jona têtŋ lau Ninewa gitôm gêtŋ dalô daŋ, ma ŋalêtŋ tigeŋ gêtŋ naŋ oc hóc asê ŋamalac ndê Atu, naŋ oc ti lau têm dindéc-ŋga si gêtŋ dalô.

31 “Muŋ-ŋga, Kwin Siba-ŋga^s kêsêlêŋ seŋ baliŋ, bu ŋgô Kiŋ Solomon ndê yom ti gauc atu-tu. Ma kwahic dec ŋgac naŋ hóc gêlêc Solomon su mbo dec, tigeŋ lau têm dindéc-ŋga sêpu iŋ ndê yom. Tu dinaŋ-ŋga, kwin dau oc tisa akêtŋ lau batê têtŋ ndoc Anötö oc êmatôc lau, ma iŋ oc hoc lau têm dindéc-ŋga si sac asê. 32 Ma ŋalêtŋ tigeŋ, têtŋ béc ŋambu-ŋga lau Ninewa oc sêtisa sêwhiŋ lau têm kwahic dec-ŋga, ma ŋac oc sêhoc lau dindéc si sac asê. Ŋahu bu lau Ninewa sêŋgô Jona ndê yom ma sem si ŋalôm kwi. Ma kwahic dec, ŋgac naŋ hóc gêlêc Jona su mbo dec, tigeŋ lau kwahic dec-ŋga sem dau kwi dom.”

Ŋamalac si tandô gitôm ya ŋawê
(*Mat 6:22-23*)

33 “Yac datuŋ lam asê tu bu dasiŋ kwi me taŋgatôc ŋa suc ahuc dom. Mba! Dakêtŋ êŋgalêtŋ lhu, bu lau naŋ sêsôc sêmeŋ naŋ sêlic ŋawê.

^s **11:31** Kwahic dec dasam gameŋ Siba-ŋga bu ‘Arabia.’ Miŋ pi Kwin Siba-ŋga sêto yêc 1 Kiŋ 10:1-13.

34“Am nem tanôm gitôm ya ñawê nañ tôc señ têtj am. Bocdinañ am nem tanôm bu wê am sa lêtj ñayham, dec am oc gacgeñ mbo ñawê ñalôm. Magoc tanôm bu wê am sa lêtj sac-nga, dec am gacgeñ mbo ñasec ñalôm. 35 Tu dinañ-nga dec yob daôm ñapep bu ñawê nañ yêc nem ñalôm, nañ mbac e ñasec sa dom. 36 Ma am bu sap lêtj ñawê-nga dôñ ñapañ, ma ndic ahê lêtj ñasec-nga, dec ñawê oc nem am nem ñalôm sambuc ahuc, tôm lam dañ pô am.”

Yisu pu lau Palêsai ti lau yomsu-nga

37 Yisu gic bata yom dinañ su, goc Palêsai dañ kégalm in bu neñ gêtj whiñ in. Yisu sôc ñgac dau ndê andu gi ma ndöc sic ndöc tebo. 38 Ma Palêsai dau hêdaê bu Yisu gêtj gêtj magoc kêgwasiñ amba muñ su dom. 39 Goc Pômdau sôm têtj in, “Mac lau Palêsai atôm laclhu ti pele nañ sêtjwasin ñadômbwê-nga ñawasi sa, magoc ñalôm ñadômbwi yêc dôñ yêc. Bu mêtê tamgatu gêtj ma mêtê sac hóc mac nem ñalôm ahuc. 40 Mac lau gauc mbasi-nga. Anötö nañ kêmasañ ñamalac ñamlic ti gêtj awê-nga nañ kêmasañ ñalôm-nga whiñ. 41 Tamwalô lau ñalôm sawa, ma akêtj nem ñalôm sambuc tu anem ñac sa-nga, ma bocdinañ dec mac nem ñamlic ti ñalôm whiñ oc ñawasi sa yêc Anötö añgô-nga.

42 “Oyaê. Mac lau Palêsai awhê nem gêtj ôm-nga saun-saun hoñ kôc ti toñ amanlu, ma akêtj toñ tigerj ti da têtj Anötö. Mac akôm gêtj saun dinañ, tigerj mac ahu gêtj atu siñ. Mac amatôc lau si yom ñapep dom, ma atac whiñ Anötö su dom. Gêtj saun nañ mac akôm, in ñayham, magoc akôm yêc gêtj atu-tu whiñ bocdinañ. 43 Oyaê. Mac lau Palêsai atac whiñ bu andöc lau tiwaê si pôn yêc lôm wê-nga, ma atac whiñ bu lau sêtoc mac sa atôm lau tiwaê yêc malac lôm. 44 Oyaê. Tu mêtê sac nañ hóc mac nem ñalôm ahuc, dec mac atôm nom nañ sêtjsuhun ñgac batê dañ yêc ñalôm, ma lau sêtjyalê dom ma sêtjsêlêtj sêmbo ñahô.”

45 Gwalam akwa yomsu-nga dañ ñgô Yisu ndê yom dinañ ma sôm, “Kêdôhônwaga, am sôm yom dinañ pi lau Palêsai, ma am pu yac lau yomsu-nga whiñ.” 46 Ma Yisu sôm, “Oyaê. Mac lau yomsu-nga akêtj yomsu daêsam têtj lau nañ kêtj wapac ñac ñandô, tigerj mac daôm akôm gêtj dañ bu anem ñac sa tu sêhóc ñawapac dinañ-nga dom.

47 “Oyaê. Mac amasañ sêhô bu atoc propet akwa-kwa sa, magoc mac daôm apami sic propet dau ndu. 48 Bocdinañ mac atôc asê bu mac alic gêtj nañ apami sêkôm, nañ bu ñayham. 49 Anötö kêyalê gêtj hoñ, dec hoc yom asê gwanañ pi mac apami bocdec bu, ‘Aô wanñij lau propet ma lau aposel sêtêtj ñac sêndi, magoc ñac oc sêndic propet ñatô ndu, ma sêkôm mêtê sac têtj ñatô.’ 50 Bocdinañ mac lau têtj dindec-nga oc awêkaiñ ñagêyô awhiñ apami, tu propet hoñ si dac nañ sêkêc siñ-nga, têtj têtj ñamata-nga andô e meñ. 51 Aêc, Abel in ñgac ñamata-nga, ma Sekaria in ñgac ñambu-nga, propet nañ ñac sic ndu yêc lôm dabun, ma alta nañ kalhac

lôm dabuŋ ŋasactô, naŋ ŋalhu. Aêc, aö wasôm têtŋ mac, lau têtŋ kwahic dec-ŋga oc sêtap matôc sa pi lau hoŋ dinaŋ si dac.

⁵²“Oyaê. Lau daêsam takwê mac gwalam akwa yomsu-ŋga bu awhê Anötö ti ndê lêtŋ sa têtŋ ŋac, magoc mac am ŋac sa ŋapep dom. Mac atôm lau naŋ sêyob ki gatam-ŋga, ma sêtéc bu sêkac sa têtŋ lau naŋ bu sêsôc sêndi. Mac daôm aŋyalê Anötö ti asôc iŋ ŋapu dom, ma mac alhac lau naŋ bu sêŋyalê iŋ ti sêsôc iŋ ŋapu, naŋ ahuc.”

⁵³Yisu gic bata yom dinaŋ ma hu andu dau siŋ. Ma lau Palêsai ti lau naŋ sêndôhôn yomsu, naŋ sic hu sêkêŋ kisa iŋ ŋandô. Ŋac sêndac iŋ pi gêtŋ daêsam, ⁵⁴sêŋsahê bu sêtîm iŋ bu sôm yom giso, dec oc tôm bu sêmatôc iŋ.

Yisu ndê yom ŋatô

(Mat 10:26-33)

12 ¹Têtŋ têtŋ dinaŋ lau daêsam andô, tausen ma t ausen, sêkôm mwasac bu sêtigasuc Yisu e sêŋgapiŋ dau sa. Ma Yisu sôm yom têtŋ iŋ ndê ŋgacsêŋomi bocdec bu, “Ayob daôm ŋapep bu lau Palêsai si mêtê sac lom mac dom. Ŋac sêsôm yom ŋayham magoc ŋac dau sêkôm ŋandô sa dom. Mêtê dau gitôm yist naŋ tôm bu nem bolom ahuc ŋagahô eŋ.

²Gêtŋ hoŋ naŋ lau sem ahuc, ma gêtŋ hoŋ naŋ yêc siŋ dau, naŋ oc meŋ sa tiawê. ³Yom bocke naŋ mac asôm têtŋ daôm têtŋ ôbwêc, naŋ lau oc sêŋgô têtŋ acsalô. Ma yom naŋ mac asôm malô têtŋ daôm yêc andu ŋalôm, naŋ oc sêsôm asê yêc malac lôm. ⁴Aneŋ lau mac aŋgô. Atôc lau naŋ bu sêndic mac ndu-ŋga dom, bu tiŋambu ŋac sêtôm dom bu sêkôm gêtŋ daŋ tiyham têtŋ mac. ⁵Tigeŋ aö wasôm têtŋ mac bu atôc Anötö, ma asôc iŋ ŋapu. Bu têtŋ ndoc mac ambac ndu su, iŋ ndê ŋaclai yêc bu tuc mac asip lambwam andi. Aêc, aö wasôm têtŋ mac, atôc iŋ!

⁶“Akôc gauc pi mbac kecsoc naŋ lau sêlic bu gêtŋ ŋambwa. Tigeŋ Anötö oc êŋlhiŋ ŋac si daŋ siŋ dom. ⁷Ma Anötö tac whiŋ mac hôc gêlêc mbac sauŋ-sauŋ daêsam su. Yomandô! Anötö kêyalê mac e pi sa, gitôm iŋ sê mac nem kêclauŋ hoŋ sa timala. Bocdinaŋ atôc daôm dom.

⁸“Aö wasôm têtŋ mac bu asa naŋ sôm asê yêc lau aŋgô-ŋga bu iŋ kêtŋ whiŋ aö, naŋ Ŋamalac ndê Atu oc sôm ŋamalac dau ndê ŋaê asê yêc Anötö ndê aŋela aŋgô-ŋga. ⁹Tigeŋ asa naŋ sêc iŋ ndê kêtŋ whiŋ aö-ŋga ahuc yêc lau aŋgô-ŋga, naŋ Ŋamalac ndê Atu oc sêc iŋ ahuc yêc Anötö ndê aŋela aŋgô-ŋga bocdinaŋ. ¹⁰Asa naŋ bu sôm yom sac pi Ŋamalac ndê Atu, tigeŋ tiŋambu kac ndê ŋalôm kwi, naŋ Anötö oc suc iŋ ndê sac kwi. Tigeŋ asa naŋ sôm yom sac sambuc pi Ŋalau Dabuŋ, naŋ Anötö oc suc iŋ ndê sac kwi dom.

¹¹“Tiŋambu lau oc sêkôc mac dôŋ tu mac akêŋ whiŋ aö-ŋga. Ŋac oc sêwê mac atêŋ lau bata Israel-ŋga andi, bu sêmatôc mac yêc ŋac si lôm

wê-nga. Ma ñac oc sêkên mac alhac gôlinwaga ma lau ti ñaclai aŋgô-nga bocdinaŋ. Têŋ ndoc dinaŋ, ahêgo daôm tu yom asôm ma aô têtŋ ñac-nga dom. ¹²Bu ñalau Dabuŋ oc êndôhôn mac ma kêtŋ yom têtŋ mac tu asôm-nga têtŋ ndoc dinaŋ.”

Yom gôlin pi ñac ti lêlôm

¹³Ñgac daŋ yêc lau toŋ atu dinaŋ ñalôm ndac Yisu bocdec bu, “Kêdôhônwaga, sôm têtŋ aô dôwaŋ bu whê damaŋ ndê wapa lêtŋsêm kôc ma kêtŋ ñatô têtŋ aô.” ¹⁴Magoc Yisu sôm, “Am ñgô su naŋ. Anötô kêyalin aô sa ti am nem ñgac êmatôc yom-nga me ñgac whê wapa kôc-nga dom.” ¹⁵Goc iŋ sôm têtŋ lau hoŋ, “Ayob daôm ñapep bu tamgatu wapa nom-nga dom. Bu ñamalac si ñahu sêmbo tali-nga sip awa ti wapa daêsam naŋ sic sa-nga, naŋ dom.”

¹⁶Ma iŋ sôm yom gôlin daŋ têtŋ ñac bocdec bu, “Ñgac ti lêlôm daŋ mbo, ma gêtŋ naŋ iŋ sô yêc ndê nom gêm ñandô daêsam andô. ¹⁷Dec iŋ gauc gêm têtŋ dau, ‘Aô wakôm sake? Aneŋ andu wakêtŋ gêtŋ ñandô sôc-nga oc nditôm dom.’ ¹⁸Bocdinaŋ dec iŋ sôm, ‘Aô wakôm gêtŋ bocdec. Aô wasen andu akwa-kwa hoŋ su, ma wakwê andu wakuc ñatô naŋ atu andô. Ma yêc dinaŋ, aô wandic aneŋ gêtŋ ñandô ti wapa hoŋ sa. ¹⁹Ma aô wasôm têtŋ dauŋ, ‘Aô gac gêtŋ ñayham daêsam sa, gitôm bu oc wambo yala daêsam. Aô waŋwhaŋ dauŋ, ma waneŋ ti wanôm gêtŋ ma watisambuc.’ ²⁰Magoc Anötô sôm têtŋ iŋ, ‘Am ñgac gauc mbasi-nga! Ôbwêc dec am oc mbwac ndu. Ma wapa naŋ am gic sa tu daôm-nga, naŋ oc ti asa ndê?’ ²¹Goc Yisu sôm, ‘Lau hoŋ naŋ sic wapa daêsam sa tu dau-nga, magoc sêmbo sêtôm lau ñalôm sawa tu sêŋyalê Anötô ti ndê mêtê dom-nga, naŋ lau gauc mbasi-nga bocdinaŋ.’”

Dahêgo dauŋ dom

(Mat 6:25-34)

²²Ma Yisu sôm têtŋ iŋ ndê ñgacsêŋomi, “Bocdinaŋ dec aô wasôm têtŋ mac, ahêgo daôm tu gêtŋ aneŋ-nga, me tu ñakwê asôc-nga dom. ²³Bu Anötô kêtŋ mac ambo tamli, ma gêtŋ dinaŋ iŋ gêtŋ atu. Gêtŋ daneŋ-nga iŋ gêtŋ atu dom. Ma Anötô kêtŋ mac nem ñamlic ñagêtŋ hoŋ. Dinaŋ iŋ gêtŋ atu, ma ñakwê asôc-nga iŋ gêtŋ atu dom.

²⁴“Akôc gauc pi mbac ko. Ñac sêsô gêtŋ dom, ma sic gêtŋ ñandô sa dom. Ñac si andu gêtŋ ñandô-nga mbasi, tigeŋ Anötô gôlôm ñac. Ma Anötô tac whiŋ mac ñamalac hôc gêlêc mbac hoŋ su. ²⁵Ma mac nem asa, bu hêgo dau dec oc tôm bu ndic têtŋ ndê têtŋ mbo tali-nga? ²⁶Mac atôm dom bu akôm gêtŋ sauŋ andô dinaŋ, bocdinaŋ tu sake-nga mac ahêgo daôm pi gêtŋ ñatô?

²⁷“Ma akôc gauc pi ñaola ñayham naŋ sêpo sêlhac kwaŋ ñalôm. Sêkôm gwelenŋ dom, ma sêmasaŋ ñakwê dom, tigeŋ aô wasôm têtŋ mac, bu Kiŋ

Solomon iŋ sôc ŋakwê ŋayham andô, magoc iŋ ndê gôlôn ti ŋawasi hôc gêlêc ŋaola dinaŋ daŋ su dom. ²⁸O mac lau naŋ akêŋ whiŋ gwalec, aŋgô! Kwaŋ ti ŋaola nom-ŋga sêlhac bêc daêsam dom, ma lau oc sêkêŋ ya neŋ su, magoc Anötö kêŋ gêŋ dau ti ŋadalô ŋayham ma yob ŋapep. Ma bocdinaŋ, aŋyalê bu yom ŋandô, Anötö oc yob mac ma kêŋ ŋakwê têŋ mac whiŋ. ²⁹Ahêgo daôm pi gêŋ aneŋ ti anôm-ŋga dom, ma ambo ti ŋalôm ŋawapac dom. ³⁰Lau sambuc naŋ sêŋyalê Anötö dom, naŋ sêhêgo dau pi gêŋ kaiŋ dinaŋ ŋapaŋ, magoc Damam undambê-ŋga kêyalê su bu mac apônda gêŋ dau. ³¹Ahêgo daôm tu gêŋ dinaŋ-ŋga dom, magoc akôm ŋaŋga bu atap malam sa yêc Anötö ndê gôliŋ ŋapu. Ma iŋ oc yob mac tu gêŋ nom-ŋga-ŋga whiŋ. ³²O aneŋ lau, atôc daôm dom. Bu mac nem Damam undambê-ŋga tac whiŋ bu ti mac nem Kiŋ ma kôc mac sa andôc iŋ ndê gôliŋ ŋapu.”

Taŋsalê awa ŋandô undambê-ŋga

(Mat 6:19-21)

³³⁻³⁴“Aô wasôm têŋ mac, bu gameŋ bocke naŋ mac nem awa yêc, naŋ mac oc ahê gauc pi ma atac whiŋ ŋapaŋ. Bocdinaŋ akêŋ nem wapa nom-ŋga têŋ lau sênemlhi, ma akêŋ nem awa tu anem lau ŋalôm sawa sa-ŋga. Ma apo gêŋ undambê-ŋga sa ti nem awa ŋandô, naŋ oc yêc ŋayham ŋapaŋ. Lau kaŋ oc sêtôm dom bu sênem kaŋ, ma gêŋ daŋ oc kôm tisac dom.”

Tamasan dauŋ tu Pômdau mbu meŋ-ŋga

(Mat 24:42-51)

³⁵⁻³⁶“Amasaŋ daôm ŋapep. Ambo atôm lau akiŋ naŋ sêsôc ŋakwê gwelen-ŋga sa, ma sêtuŋ si lam asê ma sêhôn si ŋadau bu mbu meŋ akêŋ mwasiŋ nem awhê-ŋga. Têŋ ndoc ŋac si ŋadau mbu meŋ ma êmati gatam, naŋ ŋac oc sêkac gatam sa têŋ iŋ ŋagahô. ³⁷Ŋadau bu mbu meŋ ma tap lau akiŋ sa, naŋ sêmasaŋ dau gwanaŋ ma sêhôn iŋ sêmbo, dec ŋac oc sêtap mwasiŋ atu sa yêc iŋ. Aô wasôm yomandô, ŋadau dau oc meŋ, sôc ŋakwê tôm lau akiŋ sêsôc, kêŋ ŋac sêndôc tebo, ma nem akiŋ ŋac. ³⁸Ŋadau bu meŋ têŋ timaniŋhu me têŋ ôbwêc lôm, ma tap ŋac sa sem ali ma sêhôn iŋ sêmbo, dec iŋ oc êmwasiŋ ŋac êŋlêc. ³⁹Tigeŋ aŋgô su naŋ! Lau kaŋ sêkêŋ puc pi ndoc sêmeŋ-ŋga dom. Andu ŋadau daŋ, bu êŋyalê ndoc naŋ ŋgac kaŋ daŋ oc meŋ, dec iŋ oc yob iŋ ndê andu ŋapep bu ŋgac kaŋ dinaŋ sôc meŋ dom. ⁴⁰Ma mac bocdinaŋ, amasaŋ daôm ŋapep ma anem ali ŋapaŋ, bu ŋamalac ndê Atu oc mbu meŋ têŋ ndoc naŋ mac akêŋ batam, naŋ dom.”

⁴¹Têŋ dinaŋ Pita sôm, “Pômdau, am sôm yom gôliŋ dinaŋ bu yac ŋgacsêŋomi aŋgô, me bu lau hoŋ sêŋgô?” ⁴²Ma Pômdau ô yom ma sôm, “Mac nem asa iŋ gitôm ŋgac akiŋ ŋayham ma ti gauc? Ŋgac akiŋ kaiŋ

dinaŋ ndê ŋadau bu lhö têtŋ gameŋ daŋ ndi, goc iŋ oc kêtŋ iŋ yob lau akiŋ ŋatô ma kêtŋ gêtŋ danetŋ-ŋga têtŋ ŋac tôm ŋandoc. ⁴³Ma têtŋ ndoc ŋadau mbu meŋ ma tap iŋ sa kôm iŋ ndê gwelenŋ ŋapetŋ mbo, naŋ iŋ oc lic iŋ ŋayham ma kôm ŋayham têtŋ iŋ. ⁴⁴Yomandô! Ŋadau oc kêtŋ iŋ yob iŋ ndê wapa hoŋ. ⁴⁵Magoc ŋgac akiŋ sac oc sôm têtŋ dau, ‘Aneŋ ŋadau oc mbu meŋ ŋagahô dom.’ Goc iŋ oc ndic lau akiŋ ŋatô, ma neŋ gêtŋ ŋawahô ti nôm wain e êŋiŋ iŋ. ⁴⁶Ŋadau oc mbu meŋ hôtŋ asê têtŋ bêc ti acgatu naŋ ŋgac akiŋ dau kêtŋ bata, naŋ dom. Ma iŋ oc kêtŋ ŋagêtŋ sac sambuc têtŋ iŋ, ma soc iŋ su ndi bu mbo whiŋ lau naŋ daŋgapêc ma sêkêtŋ whiŋ dom.

⁴⁷“Ŋgac akiŋ naŋ kêtŋalê gêtŋ naŋ iŋ ndê ŋadau tac whiŋ bu iŋ kôm, tigeŋ tec bu kôm ma kêmasaŋ dau dom, naŋ oc tap ŋagêtŋ atu sa. ⁴⁸Magoc ŋgac akiŋ naŋ kêtŋalê gêtŋ naŋ ŋadau tac whiŋ bu iŋ kôm, naŋ dom, dec kôm mêtê sac naŋ gic waê bu iŋ tap ŋagêtŋ sa, naŋ oc kôtŋ ŋagêtŋ sauŋ. Lau hoŋ naŋ sêtap mwasinŋ sa yêc Anôtô, naŋ iŋ takwê ŋac bu sêkôm gwelenŋ ŋa mwasinŋ dinaŋ e nem ŋandô. Ma ŋac naŋ sêtap mwasinŋ atu sa, naŋ iŋ takwê ŋandô daêsam.”

Lau oc sêwhê dau kôtŋ tu Yisu-ŋga

(Mat 10:34-36)

⁴⁹Ma Yisu gic têtŋ yom ma sôm, “Aô gasip nom gameŋ bu wakêtŋ ya êŋsahê lau nom-ŋga, ma aô atac whiŋ bu ya dau lom asê ŋagahô. ⁵⁰Aô dauŋ oc wahôtŋ ŋawapac ti ŋandê atu, naŋ gitôm busaŋgu kaiŋ daŋ tu waliŋ-ŋga. Ma aô wapô sim dauŋ ŋandô e gêtŋ dau ŋandô sa. ⁵¹Gauc nem bu aô gameŋ bu wahê wamba lau dom. Mba! Tu aô-ŋga dec lau oc sêwhê dau kôtŋ. ⁵²Têtŋ kwahic dec ma ndi, lau naŋ sêmbo andu daŋ, naŋ oc sêwhê dau kôtŋ tu aô-ŋga. Lau amaŋdaŋ bu sêmbo, goc lu oc sêkêtŋ kisa tô, ma tô oc sêkêtŋ kisa lu. ⁵³Tu aô-ŋga dec ŋac oc sêwhê dau kôtŋ. Damba lu atuŋgac oc sêkêtŋ kisa dau, ma dinda lu atuwê oc sêkêtŋ kisa dau. Ma lawawê akwa lu lawawê wakuc oc sêkêtŋ kisa dau bocdinaŋ.”

Taŋyalê ndoc

⁵⁴Ma Yisu sôm têtŋ lau toŋ atu, “Mac bu alic dao yec sambuc daŋ puc pi meŋ, dec mac asôm bu u oc ndic, ma u gic. ⁵⁵Ma muasa bu êŋsêlêtŋ, dec mac asôm bu gameŋ oc ŋandê sa, ma gameŋ ŋandê sa. ⁵⁶Mac lau atim yom lau-ŋga! Mac alic gêtŋ dalô nom-ŋga ti umbotŋ-ŋga ma mac atôm bu aŋyalê ndoc. Ma bocke dec mac alic gêtŋ hoŋ naŋ aô gakôm yêc nom, magoc mac nem gauc sa pi aô neŋ ŋahu lec dom.

⁵⁷“Oc tôm bu mac aŋsahê gêtŋ hoŋ tu bu aŋyalê lêtŋ bocke iŋ lêtŋ gitêtŋ, magoc tu sake-ŋga mac akôm dom? ⁵⁸Aŋgô! Am asa naŋ nem têtŋ bu yêc ŋamalac daŋ, ma iŋ bu wê am têtŋ ŋgac êmatôtŋ yom-ŋga, naŋ goc êmsahê bu êmasaŋ yom whiŋ iŋ têtŋ ndoc amlu aŋsêlêtŋ ambo seŋ. Ma bocdinaŋ ŋgac dau oc kêtŋ am têtŋ ŋgac êmatôtŋ yom-ŋga dom. Bu mba, mboe ŋgac êmatôtŋ yom-ŋga o c kêtŋ am têtŋ

ngac yob gapocwalô-nga, ma inj oc kêñ am sôc gapoc-walô ndi. ⁵⁹Aô wasôm têñ am bu am oc ndöc gapocwalô ñapan e am ndic nem tôp hoñ pacndé.”

Danem dauñ kwi bu dandiñan dom

13 ¹Têñ ndoc dinañ lau ñatô sêmbo sêwhiñ Yisu, ma ñac sic miñ yom pi lau Galili-nga ñatô. Lau dinañ sic domba ndu bu sêkên ti da, ma gôliñwaga Pailot ndê lau sêmeñ ma sic ñac ndu ma sêñgaluñ ñac si dac whiñ domba si dac. ²Yisu ngô ñac si yom dau, goc ndac, “Mac gauc gêm bocke? Lau Galili-nga dinañ si sac hôc gêlêc lau Galili-nga ñatô si sac su, ma bocdinañ ñawapac dinañ hôc asê ñac, a? ³Aô wasôm, mba! Tigeñ mac bu anem nem ñalôm kwi dom, dec mac oc andiñam. ⁴Gauc nem andu baliñ nañ lau sêkwê yêc Siloam, nañ ku sa ma sec lau 18. M ac gauc gêm bocke? Lau 18 dinañ si sac hôc gêlêc lau Jerusalem-nga si sac, a? ⁵Aô wasôm têñ mac, mba! Tigeñ mac bu anem nem ñalôm kwi dom, dec mac hoñ oc andiñam.”

⁶Goc Yisu sôm yom gôliñ dañ bocdec bu, “Yêc ngac dañ ndê ôm wain-nga, a kiñ dañ kalhac. Ma ngac dau gi kêsalê a kiñ ñandô, magoc tap sa dom. ⁷Dec inj sôm têñ ngac nañ yob inj ndê ôm, “Tôm yala tö aô gameñ kasalê ñandô yêc a kiñ dindec, ma gatap sa dom. Lêñ dulu, bu a dau pôc gameñ ahuc ma gêm ñandô dom.’ ⁸Tigeñ ngac yob ôm-nga sôm, ‘Aneñ ñadau, hu siñ lhac yala dañ tiyham. Aô wandic gwelec ma wahôc nom pi ñahu. ⁹Inj bu nem ñandô têñ yala wakuc, dec oc ñayham. Ma bu nem ñandô dom, nañ goc am lêñ dulu.’”

Yisu kôm awêhê bôliñ dañ ñayham sa têñ bêc Sabat-nga

¹⁰Têñ bêc Sabat-nga dañ, Yisu kêdôhôn lau mbo lôm wê-nga dañ. ¹¹Ma awêhê dañ mbo, nañ ñalau sac kôm inj ndöc bôliñ tôm yala 18. Inj kêsêlêñ kêñkôn ma gitôm dom bu inj lhac solop. ¹²Yisu gêlic inj ma ta inj meñ, goc sôm, “O awêhê daôm, aô bu wasen gêñ nañ sô am dôñ, nañ su.” ¹³Goc Yisu kêñ amba sac inj, ma ñagahô inj kalhac tisolop, ma kêpiñ Anötö.

¹⁴Tigeñ ngac bata nañ yob lôm wê-nga dinañ, inj tac ñandê bu Yisu kôm awêhê dinañ ñayham sa têñ bêc Sabat-nga. Dec inj sôm têñ lau, “Bêc 6 yêc bu danem gweleñ. Mac bu atac whiñ bu ñayham sa, dec amej têñ bêc Sabat-nga dom. Amej têñ bêc 6 dinañ ñadañ.” ¹⁵Magoc Pômdau ô inj ndê yom ma sôm, “Mac lau atim yom lau-nga. Mac hoñ akôm gweleñ têñ bêc Sabat-nga têñ ndoc mac ambwala nem doñki ti makao su, ma awê ñac sêsa si bu sênôm bu. ¹⁶Awêhê dindec inj Abraham ndê apawê dañ, ma Sadañ sô inj dôñ tôm yala 18 su. Tu sake-nga dec tambwala inj su têñ bêc Sabat-nga dom?” ¹⁷Yisu ndê yom dau kôm inj ndê ñacyo hoñ maya atu. Tigeñ lau daêsam atac ñayham pi gêñ ñayham hoñ nañ inj kôm.

Yom gôliñ pi gêñ ñawhê sauñ (Mat 13:31-32; Mak 4:30-32)

¹⁸Ma Yisu ndac lau dinañ, “Anötö ndê gôliñ kêsôwec ñalêñ bocke? Aô wanem dôhôn pi gêñ sake bu wawhê sa? ¹⁹Anötö ndê gôliñ gitôm ñawhê

sauŋ andô daŋ, gitôm a soc ŋawhê. Ŋgac daŋ kôc sa gi ma sô yêc ndê ôm, ma tiŋambu gêŋ dau po ti a atu, ma mbac lôlôc-ŋga sêmeŋ sêhê si ŋaic yêc ŋasaŋgac.”

Yom gôliŋ pi yist

(*Mat 13:33*)

²⁰Ma iŋ sôm yom gôliŋ daŋ tiyham bocdec bu, “Aö wanem dôhôn Anötö ndê gôliŋ pi gêŋ sake bu wawhê sa? ²¹Aö wanem dôhôn pi yist, naŋ awhê daŋ kêŋ sip plawa lôŋ atu daŋ ma kêgaluŋ. Ma ŋasawa sauŋ eŋ yist dinaŋ kôm plawa hoŋ suŋ.”

Gatam undambê-ŋga sauŋ andô

²²Tiŋambu Yisu kêsêlêŋ hêganônŋ Jerusalem gi. Iŋ golom-golom malac atu-tu ti sauŋ-sauŋ hoŋ, ma kêdôhônŋ lau. ²³Ma ŋamalac daŋ ndac iŋ, “Pômdu, Anötö oc kôc lau tigeŋ-tigeŋ sa sêndôc undambê, me lau daêsam?” Ma Yisu ô yom ma sôm têŋ lau, ²⁴“Lau daêsam oc sêŋsahê bu sêsôc gatam sêndi, magoc ŋac oc sêtôm dom, bu gatam dau sauŋ andô. Bocdinaŋ akôm ŋaŋga bu asôc gatam dau andi. ²⁵Andu ŋadau bu tisa ma ndic gatam ahuc, dec mac oc alhac awê, amati gatam ma asôm, ‘Pômdu, lêc gatam su têŋ yac.’ Magoc iŋ oc sôm têŋ mac bu, ‘Mac lau dinaŋ amêŋ akêŋ nde? Aö kayalê mac dom.’ ²⁶Ma mac oc asôm, ‘Yac aŋ gêŋ ti anôm gêŋ awhiŋ am, ma am kêdôhônŋ lau yêc yac mba malac lôm.’ ²⁷Tigeŋ iŋ oc sôm, ‘Mac lau dinaŋ amêŋ akêŋ nde? Aö kayalê mac dom. Alhö su yêc aö, mac lau akôm sac-ŋga!’ ²⁸⁻²⁹Têŋ têm ŋambu-ŋga, mac oc alic Abraham, Aisak ma Jakob ti p ropet akwa-kwa hoŋ sêndôc Anötö ndê gameŋ undambê-ŋga. Ma lau oc sêmeŋ akêŋ nom ŋabatij hoŋ, ma sêneŋ mwasiŋ atu yêc undambê. Magoc Anötö oc êmasuc mac su andi ambo gameŋ ahôc ŋandê-ŋga, ma yêc dinaŋ mac oc ataŋ, ma mac nem lhôm êŋsiŋ pi dau. ³⁰Aŋgô su naŋ! Lau ŋatô naŋ kwahic dec sêti lau ŋambu-ŋga, naŋ oc sêti lau ŋamata-ŋga, ma lau ŋamata-ŋga oc sêti lau ŋambu-ŋga.”

Yisu taŋ pi lau Jerusalem-ŋga

³¹Têŋ ndoc dinaŋ lau Palêσαι ŋatô sêtêŋ Yisu sêmeŋ ma sêsôm, “Hu gameŋ dindêc siŋ ma lhö ndi, bu Herod tac whiŋ bu ndic am ndu.” ³²Magoc Yisu sôm têŋ ŋac, “Mac andi asôm têŋ Herod, giam pôm dinaŋ, ‘Acsalô lec ma laŋsê aö oc wasoc ŋalau sac su, ma wakôm lau gêmbac ŋayham sa. Ma têŋ bêc titô-ŋga aö oc wandic dabiŋ aneŋ gwelêŋ.’ ³³Aö oc wakôm aneŋ gwelêŋ tôm bêc ŋatô, ma tiŋambu aö watêŋ Jerusalem wandi. Mac lau Israel-ŋga ac propet daêsam ndu su yêc Jerusalem, ma bocdinaŋ dec aö gac waê bu wapi wandi wawhiŋ.

³⁴“O Jerusalem, Jerusalem. Mac ac Anötö ndê lau propet ndu, ma lau gitêŋ naŋ iŋ kêkiŋ têŋ mac, naŋ mac atuc ŋa hoc ndu. Ndoc daêsam

aö tac whiŋ bu wandic mac lau sa asôc Anötö ndê gôliŋ ŋapu tiyham, gitôm mbac dalec dinda gic ŋatu sa sôc ŋamakê ŋapu. Tigeŋ mac atec. ³⁵Bocdinaŋ Anötö oc hu mac ti nem andu siŋ. Ma aö wasôm têtŋ mac bu mac oc alic aö tiyham dom e mac asôm, ‘Tampiŋ Mesaya naŋ meŋ gêm Pômdau aŋgô.’”

Yisu gêm ŋac ŋamlic suŋ daŋ sa

14 ¹Têtŋ bêc Sabat-ŋga daŋ, Yisu sôc ŋac bata daŋ ndê andu gi bu neŋ gêtŋ. Iŋgac bata dau iŋ lau Palêsai si daŋ, ma ŋac si lau ŋatô tatiŋ Yisu sêmbo. ²Yisu gêlic ŋac gêmbac daŋ ndöc, naŋ amba ti gahi suŋ. ³Goc iŋ ndac lau Palêsai ti gwalam akwa yomsu-ŋga bocdec bu, “Yac bu dakôm lau ŋayham sa têtŋ bêc Sabat-ŋga, dec oc taŋgili yomsu Sabat-ŋga, me mba?” ⁴Iŋac sem dôn ma sêo yom daŋ dom, goc iŋ kêmasec ŋac ti gêmbac dinaŋ, kôm iŋ ŋayham sa, ma kêtŋ iŋ kôlhô gi. ⁵Ma iŋ ndac ŋac, “Mac nem balê daŋ me doŋki daŋ bu peŋ sip sê ŋalôm têtŋ bêc Sabat-ŋga, dec mac oc akôm sake? Mac oc ahê iŋ sa pi meŋ, me ahu iŋ siŋ yêc?” ⁶Ma ŋac sêtôm dom bu sêo iŋ ndê yom.

Datoc dauŋ sa dom

⁷Yisu gêlic bu lau naŋ ŋac bata dau kêgalêm ŋac sa bu sêneŋ gêtŋ sêwhiŋ iŋ, naŋ atac whiŋ bu sêndöc pôn naŋ gic lau tiwaê ŋawaê. Dec iŋ sôm yom gôliŋ daŋ têtŋ ŋac bocdec bu, ⁸“Lau bu sêkêtŋ aheŋ am bu neŋ mwasinŋ nem awhê-ŋga, naŋ ndi ndöc lau tiwaê si pôn dom. Mboe mwasinŋ ŋadau kêgalêm ŋac tiwaê daŋ naŋ hóc gêlêc am su. ⁹Bu bocdinaŋ dec iŋ oc têtŋ am meŋ ma sôm, ‘Kêtŋ pôn ŋayham dindec têtŋ ŋac atu dindec.’ Ma am oc tisa ti mayam, ma ndi ndöc pôn ŋambwa. ¹⁰Boc-dinaŋ lau bu sêkêtŋ aheŋ am bu neŋ mwasinŋ, naŋ ndi ma ndöc pôn ŋambwa. Ma mboe ŋadau oc meŋ ma sôm têtŋ am, ‘Aneŋ silip, tisa ma mweŋ ndöc pôn ŋayham.’ Ma bocdinaŋ iŋ oc po am nem waêm sa yêc ŋaclêŋ hoŋ aŋgô-ŋga. ¹¹Iŋalêtŋ tigeŋ, lau naŋ sêtoc dau sa, naŋ Anötö oc êŋgwiniŋ ŋac. Ma lau naŋ sêŋgwiniŋ dau, naŋ Anötö oc toc ŋac sa.”

Tamwasinŋ lau ŋalôm sawa

¹²Ma Yisu sôm têtŋ ŋac bata dau, “Am bu ndê mwasinŋ bu lau sêneŋ sêwhiŋ am, naŋ kêtŋ aheŋ nem silip ti asidôwai, me lau ti lêlôm naŋ sêndöc am nem malac, naŋ dom. Am bu kôm bocdinaŋ, dec tiŋambu ŋac oc sêkêtŋ aheŋ am bu neŋ gêtŋ whiŋ ŋac, ma mwasinŋ dau ti am nem ŋagêyô. ¹³Têtŋ têm am ndê mwasinŋ daŋ, naŋ kêtŋ aheŋ lau ŋalôm sawa ti lau bôliŋ ma lau tapec. ¹⁴Ma bocdinaŋ am oc tap Anötö ndê mwasinŋ sa. Iŋahu bu lau dinaŋ sêtôm dom bu sêkêtŋ gêtŋ daŋ ô nem mwasinŋ têtŋ kwahic dec. Magoc têtŋ ndoc lau gitêtŋ sêtisa akêtŋ lau batê-ŋga, naŋ Anötö oc kêtŋ ŋagêyô ŋayham têtŋ am.”

Yom gôliŋ pi mwasinŋ atu
(*Mat 22:1-14*)

¹⁵Lau naŋ seŋ gêŋ sêwhiŋ Yisu, naŋ si ŋgac daŋ ŋgô Yisu ndê yom dinaŋ ma sôm têtŋ iŋ, “Lau naŋ bu sêneŋ mwasinŋ atu yêc Anötö ndê gameŋ undambê-ŋga, naŋ oc atac ŋayham hôc gêlêc.” ¹⁶Ma Yisu ô yom ma sôm, “Ŋgac daŋ kêmasaŋ mwasinŋ atu daŋ, ma kêŋ aheŋ lau daêsam. ¹⁷Têtŋ mwasinŋ dau ŋabêc iŋ kêkiŋ ŋgac akiŋ daŋ bu sôm têtŋ lau naŋ iŋ kêgalêm ŋac sa bu, ‘Ameŋ, bu aö kamaŋ gêŋ hoŋ su.’ ¹⁸Tigeŋ ŋac hoŋ sêtec bu sêmeŋ, dec sêmasaŋ yom têtŋ iŋ. Ŋgac daŋ sôm, ‘Aö waloc dom, bu aö gamlhi nom daŋ su, ma kwahic dec aö bu wasa wandi walic. Aö wateŋ am bu hu aö siŋ.’ ¹⁹Ma daŋ sôm, ‘Aö waloc dom, bu aö gamlhi makao amanŋlu, ma kwahic dec aö bu wasa wandi ma waŋsahê ŋac tu sêkôm gwelen-ŋga. Wateŋ am bu hu aö siŋ.’ ²⁰Ma daŋ tiyham sôm, ‘Kwahic dec aö gam awhê sa, bocdinaŋ gitôm dom bu waloc.’ ²¹Bocdinaŋ ŋgac akiŋ dau mbu gi ma gic miŋ yom dinaŋ têtŋ iŋ ndê ŋadau. Ma yom dau kôm ŋadau tac ŋandê, dec iŋ kêkiŋ ndê ŋgac akiŋ tiyham ma sôm, ‘Ŋgahô sôc malac atu ndi, ma kôc lau ŋalôm sawa ti lau bôliŋ ma lau tapec sa sêmeŋ bu sêneŋ aö neŋ mwasinŋ.’ ²²Ma ŋgac akiŋ kôm bocdinaŋ, goc mbu meŋ ma sôm, ‘Aneŋ ŋadau, aö gakôm gitôm am sôm, ma ŋasawa yêc dôn yêc.’ ²³Dec ŋadau sôm têtŋ iŋ, ‘Sa seŋ ma gameŋ ŋamakê-ŋga ndi, ma kac lau bu sêsôc sêmeŋ. Aö tac whiŋ bu aneŋ andu meŋhu. ²⁴Yomandô aö wasôm têtŋ mac, bu lau naŋ aö gakêŋ aheŋ têtŋ ŋamata-ŋga, naŋ si daŋ oc neŋ aneŋ mwasinŋ dom.’”

Lêŋ taŋkuc Yisu-ŋga

²⁵Lau daêsam sêŋsêlêŋ sêwhiŋ Yisu, ma iŋ kac dau kwi ma sôm têtŋ ŋac, ²⁶“Asa naŋ têtŋ aö meŋ ma bu êŋkuc aö, naŋ atac whiŋ aö hôc gêlêc gêŋ hoŋ ndic ŋawaê. Iŋ bu atac whiŋ damba me dinda, me iŋ nawhê ma balêkoc, me asidôwai ti lhuwêi, me iŋ dau ndê lêŋ mbo-ŋga hôc gêlêc iŋ ndê atac whiŋ aö, dec oc tôm dom bu iŋ ti aneŋ daŋ ma êŋkuc aö. ²⁷Asa naŋ bu êŋkuc aö, magoc tec bu hôc ndê a gicso dau, naŋ gitôm dom bu êŋkuc aö.

²⁸“Mac nem daŋ bu kwê andu atu daŋ, naŋ gêŋ ŋamata-ŋga iŋ oc ndöc sic ma kôc gauc pi iŋ ndê mone ti gêŋ bu oc nditôm bu kwê andu dau sa, me mba. ²⁹Iŋ bu kêŋ alhö sip nom ndi, magoc ndic dabiŋ andu dom, dec lau naŋ sêlic, naŋ oc sêsu iŋ susu, ³⁰ma sêsôm, ‘Ŋgac dindê gic hu kwê andu, magoc gitôm dom bu ndic dabiŋ.’

³¹“Ma kiŋ daŋ bu sa ndi bu ndic siŋ têtŋ kiŋ daŋ, dec gêŋ ŋamata-ŋga iŋ oc ndöc sic ma kôc gauc pi iŋ ndê lau siŋ-ŋga 10,000, bu oc sêtôm bu sêhêc gêlêc kiŋ dinaŋ ndê lau siŋ-ŋga 20,000, me mba. ³²Iŋ bu lic bu ŋac sêtôm dom, dec iŋ oc êŋkiŋ lau wamba-ŋga sêtêŋ kiŋ dinaŋ têtŋ ndoc iŋ mbo ahê, bu sêsôm yom wamba-ŋga.

³³“Bocdinaŋ akôc gauc ŋapep muŋ su, goc ameneŋ aŋkuc aö. Asa naŋ tec bu hu iŋ ndê gêŋ hoŋ siŋ tu aö-ŋga, naŋ oc nditôm dom bu ti aö neŋ daŋ.

³⁴“Gwêc so iŋ gêŋ ŋayham, tigeŋ ŋamakic bu niŋga, oc dakôm ŋamakic sa tiyham ŋalêŋ nde? ³⁵Gwêc so dau tisac su, ma boc-dinaŋ tambaliŋ siŋ niŋga. Mac daŋamsuŋ bu yêc, naŋ aŋgô aneŋ yom.”

Yom gôliŋ pi domba daŋ naŋ giŋga

(Mat 18:12-14)

15 ¹Lau sêkôc takis-ŋga ma lau ŋatô naŋ lau Palêsai sêsam ŋac bu lau sac, naŋ daêsam sêtêŋ Yisu si bu sêŋgô iŋ ndê yom. ²Ma lau Palêsai ti lau naŋ sêndôhôn yomsu, naŋ sêtucdiŋ Yisu ma sêsôm, “Ŋgac dau kôc lau sac sa, ma gêŋ gêŋ whiŋ ŋac.” ³Dec Yisu sôm yom gôliŋ daŋ têtŋ ŋac bocdec bu, ⁴“Mac nem ŋgac daŋ bu yob domba 100, ma iŋ ndê domba daŋ bu niŋga, dec iŋ oc kôm sake? Iŋ oc hu 99 siŋ sêmbo gameŋ gapon, ma êŋsalê domba naŋ giŋga su e iŋ tap sa. ⁵Ma têtŋ ndoc iŋ tap sa, naŋ iŋ oc hu sac bakêyac ti atac ŋayham atu. ⁶Ma iŋ oc mbu têtŋ ndê andu ndi, ma êŋgalêm iŋ ndê lau meŋpaŋ iŋ-ŋga ti ndê silip, ma sôm têtŋ ŋac, ‘Mac atac ŋayham awhiŋ aö, bu aö gatap aneŋ domba naŋ giŋga su, naŋ sa.’ ⁷Aö wasôm têtŋ mac, bu ŋalêŋ tigeŋ dinaŋ Anötö ti aŋela undambê-ŋga oc atac ŋayham atu tu ŋamalac sac daŋ naŋ gêm ndê ŋalôm kwi, hóc gêlêc atac ŋayham tu lau gitêŋ 99 naŋ si yom me giso tu sênem dau kwi pi-ŋga mbasi.”

Yom gôliŋ pi mone naŋ giŋga

⁸Ma Yisu sôm, “Ma akôc gauc pi awhê daŋ, naŋ ndê mone silba amanlu sêndôc. Mone daŋ bu niŋga, dec iŋ oc tuŋ lam asê ma sê andu ŋa-basac sa, goc êŋsalê ŋapep e iŋ tap mone dau sa. ⁹Têtŋ ndoc iŋ tap sa su, naŋ iŋ oc êŋgalêm iŋ ndê silip ti lau meŋpaŋ iŋ-ŋga sêmeŋ sêpitigeŋ ma sôm, ‘Mac atac ŋayham awhiŋ aö, bu aö gatap mone naŋ giŋga su, naŋ sa.’ ¹⁰Aö wasôm têtŋ mac bu ŋalêŋ tigeŋ, Anötö ti aŋela undambê-ŋga oc atac ŋayham atu, têtŋ ndoc ŋamalac kôm sac-ŋga daŋ gêm ndê ŋalôm kwi.”

Yom gôliŋ pi balê naŋ giŋga

¹¹Ma Yisu gic têku yom ma sôm, “Ŋgac daŋ mbo ma iŋ ndê atungac lu. ¹²Ma balê sauŋ sôm têtŋ damba, ‘Damaŋ, wapa lêŋsêm naŋ gic aö ŋawaê, naŋ kêŋ têtŋ aö.’ Goc damba whê ndê wapa ti gêŋ hoŋ kôc tu iŋlu-ŋga, ma kêŋ têtŋ balê sauŋ tôm iŋ ndac. ¹³Ŋasawa sauŋ ma balê sauŋ dau gic iŋ ndê gêŋ hoŋ sa, ma kôlhö têtŋ gameŋ baliŋ daŋ gi. Ma yêc dindê iŋ kôm gêŋ hoŋ tôm iŋ ndê atac whiŋ, ma kêyaiŋ ndê awa ti gêŋ hoŋ. ¹⁴Têtŋ ndoc iŋ ndê mone hoŋ pacndê, naŋ tóbôm atu gêm gameŋ dinaŋ ahuc ma iŋ pônnda dau. ¹⁵Goc iŋ têtŋ ŋgac atu daŋ yêc gameŋ dinaŋ gi, ma kêsalê gwelêŋ. Ma ŋgac dau kêŋ iŋ gôlôm iŋ ndê bôc. ¹⁶Gêŋ yô iŋ ŋandô, tigeŋ

lau sêkên gên dan têt in tu neŋ-nga dom, ma boc-dinaŋ in gauc gêm bu neŋ gên naŋ bôc seŋ. ¹⁷Tiŋambu in ndê gauc sa, ma in sôm têt dau, ‘Damaŋ ndê lau akiŋ sêpônda gên danaŋ-nga dom. Tigeŋ gêt yô aô ndu tôm bu wambac ndu-nga. ¹⁸Aô walhō wambu watêt damaŋ wandi, ma wasôm, “Damaŋ, aô gakôm mêtê sac têt Anötö ma têt am. ¹⁹Aô ngac sac, dec gitôm dom bu am sam aô bu am atômngac tiyham. Lic aô gitôm am nem ngac akiŋ dan.” ²⁰Goc in tisa ma mbu têt damba gi.

“In kêsêlêŋ mbo seŋ, ma damba gêlic in yêc ahê ma tawalô in ŋandô, dec kêtî têt in gi, gôlô in dôŋ ma ŋgutô in. ²¹Magoc atungac sôm têt in, ‘Damaŋ, aô gakôm mêtê sac têt Anötö ma têt am. Aô ngac sac, dec gitôm dom bu am sam aô bu am atômngac tiyham.’ ²²Tigeŋ damba sôm têt in ndê lau akiŋ, ‘Ŋagahô, akôc ŋakwê ŋayham ti atapa bu in sôc, ma akêŋ gôlôn amañatu-nga sôc in amba-atu. ²³Ma akôc makao ŋatu tôp ŋayham dan, ma andic ndu. Yac oc dandê mwasin atu ti atac ŋayham, ²⁴bu yac gauc gêm bu aneŋ atungac dindêc mbac ndu su, magoc kwahic dec dalic bu in mbo tali. In giŋga su, ma datap in sa tiyham.’ Ma ŋac hoŋ atac ŋayham.

²⁵“Têt ndoc dinaŋ balê dau dôwa kôm gwelêŋ mbo ôm, ma têt ndoc in mbu meŋ suŋ sa andu, naŋ in ŋgô lau sêtê wê ti sêkôm atac ŋayham atu. ²⁶Goc in mbwêc ngac akiŋ dan meŋ ma ndac in bu, ‘Lau lê sêkôm ŋanta ti atac ŋayham tu sake-nga?’ ²⁷Ma in sôm, ‘Am asim meŋ su ma in mbo ŋayham, ma bocdinaŋ dec damam gic makao tôp ŋayham dan ndu, ma ndê mwasin atu.’ ²⁸Yom dau kôm dôwa tac ŋandê atu, ma in tec bu sôc balaŋ ŋalôm ndi. Goc damba sa gi ma kêmwaŋeŋ in bu sôc ndi. ²⁹Tigeŋ in sôm têt damba, ‘Yala ŋeŋ su aô gam akiŋ ti danaŋ wambu am. Tigeŋ am kêt naniŋ ŋatu me gêt sauŋ dan têt aô bu wandê mwasin tu aneŋ silip-nga dom. ³⁰Kwahic dec am nem atômngac dinaŋ, naŋ kêyaiŋ am nem awa ti wapa whiŋ lauwhê seŋ-nga, naŋ mbu meŋ ma am gic makao tu in-nga.’ ³¹Magoc damba sôm, ‘Aneŋ balê, am mbo whiŋ aô ŋapaŋ, ma aneŋ gêt hoŋ ti am nem. ³²Tigeŋ am asim dindêc naŋ yac gauc gêm bu in mbac ndu su, naŋ mbo tali. In giŋga su, ma datap in sa tiyham. Bocdinaŋ in lêŋ solop bu yac atac ŋayham atu ma dandê mwasin tu in-nga.’”

Yom gôliŋ pi ngac yob wapa-nga

16 ¹Ma Yisu sôm yom gôliŋ dan têt ndê ngacsêŋomi bocdec bu, “Ŋgac ti lêlôm dan mbo, ma lau sic miŋ têt in bu ngac naŋ yob in ndê gêt, naŋ kêyaiŋ in ndê wapa daêsam. ²Dec in ta ngac dau meŋ, ma sôm têt in, ‘Yom bocke dec gaŋgô pi am lec. Kwahic dec am sa ndi ma sê gêt hoŋ sa ma êmasaŋ bapia wapa-nga bu kêt têt aô. Bu aô oc watin am su yêc gwelêŋ yob aneŋ wapa-nga.’ ³Dec ngac yob wapa-nga sôm têt dau, ‘Aô wakôm bocke? Aô neŋ ŋadau oc soc aô su yêc aneŋ gwelêŋ. Aneŋ

licwalô gitôm dom bu wakôm gwelenj ôm-nga, ma aö mayanj bu watenj gênj. ⁴Aö kayalê gênj nanj bu wakôm-nga, ma tênj ndoc njadau tinj aö su yêc anenj gwelenj, dec lau oc sêkôc aö sa ma sênem yaom aö yêc njac si andu.’ ⁵Bocdinañ inj mbwêc lau nanj si tîp yêc inj ndê njadau, nanj tigenj-tigenj sêtênj inj sêmenj. Goc inj ndac njac njamata-nga bocdec bu, ‘Am nem tîp bocke yêc aö nenj njadau?’ ⁶Ma njac dau sôm, ‘Anej tîp gitôm olib njakwi sip lôn^h 100.’ Goc njac yob wapa-nga sôm tênj inj, ‘Am nem bapia tîp-nga kelec. Kôc sa, ndöc sic njagahô, ma to bu am nem tîp gitôm olib njakwi sip lôn 50.’ ⁷Goc inj sôm tênj njac tilu-nga, ‘Am nem tîp bocke yêc?’ Ma njac dau sôm tênj inj, ‘Anej tîp gitôm bolom wit sip dalu atu-tu 100.’ Goc njac yob wapa-nga sôm, ‘Kôc nem bapia tîp-nga, ma to bu am nem tîp gitôm dalu 80.’

⁸“Goc njadau kêpinj njac yob wapa-nga sac dinañ, bu inj kôm gênj ti gauc. Lau sambuc sêkôc awa nom-nga ma sêhê silip njac si lau. Njalênj dinañ njac sêkôm gênj ti gauc sêhêc gêlêc Anötö ndê lau. ⁹Awa nom dindec-nga hê lau daêsam si gauc tu sêkôm mêtê sac-nga. Magoc aö wasôm tênj mac bu akôc nem awa nom-nga ma anem lau sa, ma njalênj dinañ ahê silip tênj daôm. Tinjambu awa dau oc ninja, magoc njac oc sêkôc mac sa ti atac njayham tênj ndoc mac andöc undambê.”

¹⁰Ma Yisu gic têku yom ma sôm, “Asa nanj yob gênj saunj njapep, nanj oc yob gênj atu njapep bocdinañ. Ma asa nanj yob gênj saunj njapep dom, nanj oc yob gênj atu njapep dom. ¹¹Bocdinañ mac bu ayob awa nom-nga njapep dom, dec Anötö oc kênj awa njandô tênj mac tu ayob-nga dom! ¹²Ma mac bu ayob lau njatô si gênj njapep dom, dec Anötö oc kênj gênj dañ ti mac nem gênj dom!

¹³“Njamalac dañ gitôm dom bu nem akiñ njadau lu, bu inj oc tec dañ, ma atac whinj dañ, me oc sap dañ dônj ma pu dañ. Ma mac boc-dinañ, gitôm dom bu atoc Anötö ma awa nom-nga lu-lu sa ti mac nem njadau.”

¹⁴Yisu sôm yom dinañ, ma lau Palêsai njatô nanj sênjgô, nanj sem tô inj. Njahu bu njac lau atac whinj mone-nga. ¹⁵Tigenj Yisu sôm tênj njac, “Yêc njamalac njgô-nga, mac lau dinañ atoc daôm sa bu mac lau gitênj, magoc Anötö kêyalê mac nem njalôm su. Gênj nanj mac lau nom-nga atoc sa bu gênj njayham kêlêc, nanj Anötö gêlic gitôm gênj sac sambuc.”

Yisu puc Anötö ndê yomsu dônj

¹⁶Ma Yisu sôm, “Anötö kênj Moses ndê yomsu ti propet si yom bu lau sênjkcuc e Jon, Njgac Kêku Lau-nga hôc asê. Tênj Jon ndê têm ma meñ, nanj lau sêhoc njawaê asê pi Anötö ndê gôlinj. Ma lau daêsam sêkôm mwasac bu sêsôc Anötö ndê gôlinj njapu. ¹⁷Gitôm bu undambê ti nom oc ninja, tigenj gitôm dom bu Moses ndê yomsu njalhô atêc dañ ninja. ¹⁸Njgac dañ

^h 16:6 Lôn dinañ lôn atu - tigenj-tigenj gitôm 35-40 lita.

bu hu nawhê siŋ ma nem awhê wakuc, naŋ kôm mêtê mockaiŋ-ŋga yêc Anötö aŋgô-ŋga. Ma ŋgac naŋ gêm awhê naŋ hu ndê akweŋ siŋ, naŋ kôm mêtê mockaiŋ-ŋga bocdinaŋ.”

Ŋgac ti lêlôm lu Lasarus

¹⁹Ma Yisu sôm, “Ŋgac ti lêlôm daŋ mbo, naŋ sôc ŋakwê ŋayham ma po dau sa ŋa gêŋ ŋayham-ŋayham tôm bêc hoŋ. ²⁰Ma yêc iŋ ndê andu ŋamakê, ŋgac ŋalôm sawa daŋ ndöc, naŋ ndê ŋaê Lasarus. Gamboc daêsam sem iŋ ŋamlic ahuc, ²¹ma giam sêmeŋ ma sêndambwê gamboc dau. Iŋ gêŋ yô iŋ, dec iŋ takwê bu neŋ gêŋ ŋapopoc naŋ peŋ akêŋ ŋgac ti lêlôm ndê tebo, magoc mba. ²²Têŋ bêc daŋ ŋgac ŋalôm sawa dinaŋ mbac ndu, ma aŋela sêkôc iŋ sa gi ndöc undambê whiŋ Abraham. Ma ŋgac ti lêlôm mbac ndu bocdinaŋ, ma lau sêŋsuhuŋ iŋ. ²³Iŋ sip lambwam gi ma kêsahê ŋandê atu, dec hôc tandô sa pi undambê, ma gêlic Abraham yêc ahê, ma Lasarus ndöc whiŋ iŋ. ²⁴Goc iŋ ta yom têŋ iŋ ma sôm, ‘Abaŋ Abraham, tamwalô aô! Êmkiŋ Lasarus bu kêŋ amba-atu sip bu ndi, ma meŋ kêŋ pi aô êmbalaŋ. Ya dindec kôm aô ŋamlic ŋandê atu.’ ²⁵Tigeŋ Abraham ô yom ma sôm, ‘Aneŋ balê, gauc nem ndoc am mbo tamli, naŋ am tap gêŋ ŋayham-ŋayham daêsam sa, magoc Lasarus mbo sac ŋapaŋ. Kwahic dec iŋ mbo ŋayham, ma am tap ŋandê atu sa. ²⁶Ma gêŋ daŋ tiyham. Yêc hêclu ŋalhu, Anötö kêŋ ŋasawa atu daŋ, dec oc tôm dom bu lau sêtêŋ am sêloc. Ma gitôm dom bu mac nem daŋ lom têŋ yac meŋ.’ ²⁷Goc ŋgac dau sôm, ‘Bocdinaŋ aô wateŋ am abaŋ, êmkiŋ Lasarus têŋ aô damaŋ ndê andu ndi, ²⁸ma kêŋ puc aneŋ asidôwai amaŋdaŋ, bu sênem dau kwi tu bu sêmeŋ ma sêhôt ŋandê yêc gameŋ dindec dom.’ ²⁹Magoc Abraham sôm, ‘Moses ma Propet si yom yêc bu kêŋ puc ŋac. Am nem asidôwai bu sêkêŋ daŋga ŋac si yom, dec oc tôm bu sênem dau kwi.’ ³⁰Ma ŋgac dau sôm, ‘Mba, abaŋ Abraham! Lau batê si ŋgac daŋ bu mbu têŋ ŋac ndi, dec ŋac oc sêkac si ŋalôm kwi.’ ³¹Ma Abraham sôm, ‘Ŋac bu sêkêŋ whiŋ yom naŋ Moses ma lau propet sêto, naŋ dom, dec ŋac oc sêkêŋ whiŋ ŋgac naŋ tisa akêŋ lau batê-ŋga, naŋ dom.’ ”

Yisu ndê yom ŋatô

(*Mat 18:6-7; Mak 9:42-48*)

17 ¹Yisu sôm têŋ iŋ ndê ŋgacsêŋomi, “Gêŋ lêtôm-ŋga oc sêmeŋ sêhôt asê. Tigeŋ ŋamalac asa naŋ bu kôc gêŋ lêtôm-ŋga daŋ meŋ, naŋ oc tap Anötö ndê matôc sa. Oyaê. ²Oc ŋayham bu dasô hoc atu daŋ pi iŋ kachu, ma tambaliŋ iŋ sip gwêc ndi. Ma bocdinaŋ oc tôm dom bu iŋ êntôm aneŋ lau sauŋ si daŋ bu kôm mêtê sac, ma tiŋambu tap Anötö ndê matôc sa.

³“Bocdinaŋ ayob daôm ŋapep! Am nem asidôwa daŋ bu kôm sac, naŋ goc hec yom iŋ. Ma iŋ bu nem dau kwi, goc suc iŋ ndê sac kwi. ⁴Iŋ bu

kôm sac têtj am tidim 7 têtj acsalô tigej, magoc tiŋambu kac ndê ŋalôm kwi ma ndac am bu suc iŋ ndê sac kwi, naŋ dec am suc iŋ ndê sac kwi maŋ.”

⁵Ma lau aposel sêsôm têtj Pômdau, “Nem yac sa bu akêtj whiŋ ŋaŋga.”
⁶Goc iŋ ô yom ma sôm, “Mac nem akêtj whiŋ bu gêtj sauŋ andô nditôm soc ŋamatu sauŋ daŋ, dec oc tôm bu mac asôm têtj a atu dindec bu, ‘Puc daôm sa, ma sa ndi lhac gwêc ŋagapon,’ ma a dau oc daŋga wambu mac.”
⁷Ma Yisu sôm, “Akôc gauc pi ŋgac akiŋ naŋ gic nom me yob domba, ma mbu têtj ŋadau ndê andu têtj telha. Iŋ ndê ŋadau oc sôm têtj iŋ bu, ‘Mweŋ ŋagahô, ndôc sic ma neŋ gêtj,’ a? ⁸Mba, iŋ oc sôm, ‘Sôc ŋakwê sakiŋ-ŋga sa, ma êmasaŋ gêtj bu waneŋ, ma nem akiŋ aô e aô waneŋ ti wanôm gêtj pacndê. Goc tiŋambu am daôm neŋ ti nôm gêtj.’ ⁹Ma ŋadau oc nem daŋge ŋgac akiŋ dau bu iŋ daŋga wambu iŋ ndê yom, a? Mba! ¹⁰Ma mac bocdinaŋ, têtj ndoc mac akôm gêtj hoŋ naŋ Anötö gic atu mac, naŋ asôm, ‘Yac lau akiŋ ŋambwa. Yac akôm gêtj naŋ gic yac ŋawaê eŋ.’”

Yisu kôm lau 10 ti gêmbac leprasi ŋayham sa

¹¹Yisu kêsêlêŋ hêganôŋ malac Jerusalem gi, ma mbo seŋ naŋ yêc gameŋ Samaria ti Galili-ŋga ŋabatiŋ. ¹²Iŋ hóc asê malac daŋ, ma tap laungac 10 ti gêmbac leprasi sa yêc malac dau ŋamakê. Ŋac sêlhac ahê, ¹³ma sêta iŋ ŋa awha atu bocdec bu, “Ŋadau Yisu, tamwalô yac!” ¹⁴Yisu tahê ŋac ma sôm, “Andi, ma atôc daôm têtj lau dabuŋsiga.” Ma têtj ndoc ŋac sêlhô s i, naŋ sêlic bu ŋac si ŋamlic ŋawasi sa. ¹⁵Ŋac si daŋ gêlic bu iŋ ŋayham sa su, dec gic hu kêpiŋ Anötö ŋa awha atu, ma kac dau kwi ma mbu têtj Yisu gi. ¹⁶Ŋgac dau iŋ ŋgac gameŋ Samaria-ŋga, ma iŋ hu dau sip nom yêc Yisu gahi-ŋga, ma gêm daŋge iŋ. ¹⁷Ma Yisu sôm, “Bocke? Mac lau 10 hoŋ ŋamlic ŋayham sa, me? Bocdinaŋ dec lau 9 sêmbô nde? ¹⁸Am ŋgac Israel-ŋga dom, magoc am ŋgac tigeŋ dec mbu mweŋ ma kêpiŋ Anötö.” ¹⁹Ma Yisu sôm têtj iŋ, “Tisa, ma lhô ndi. Am nem kêtj whiŋ kôm am ŋayham sa.”

Anötö ndê gôliŋ ŋapuc

²⁰Têtj béc daŋ lau Palêsai sêndac Yisu pi ndoc bocke Anötö ndê gôliŋ oc meŋ sa tiawê yêc nom. Ma Yisu sôm, “Têtj ndoc Anötö ndê gôliŋ meŋ sa tiawê, naŋ oc tôm dom bu mac alic gêtj daŋ tu kêtj puc mac-ŋga. ²¹Ma oc tôm dom bu lau sêsôm, ‘Alic gêtj dau kelec,’ me ‘Gêtj dau kêlê.’ Mba! Anötö ndê gôliŋ meŋ sa su, ma yêc mac ŋalôm.”

Yisu ndê béc mbu meŋ-ŋga (Mat 24:37-44)

²²Ma iŋ sôm têtj iŋ ndê ŋgac-sêŋomi, “Têm oc meŋ sa, naŋ mac tamkwê bu alic Ŋamalac ndê Atu mbu meŋ ma mbo whiŋ mac tiyham,

magoc mac oc alic iŋ dom. ²³Lau oc sêŋsau bu iŋ mbu meŋ su, ma sêsôm iŋ mbo gameŋ bocdê, me gameŋ bocdec. Magoc aŋgô ŋac si yom dau dom, ma aŋkuc ŋac dom. ²⁴Bu têtŋ ndoc Ŋamalac ndê Atu mbu meŋ, naŋ iŋ oc hôc asê ŋagahô gitôm sickac hep tigeŋ ma umboŋ ŋasawa sambuc ŋawê sa. ²⁵Tigeŋ gêtŋ ŋamata-ŋga iŋ oc hôc ŋandê atu ma lau têtŋ dindec-ŋga oc sêtec iŋ.

²⁶“Têtŋ naŋ Ŋamalac ndê Atu oc mbu meŋ, naŋ lau oc sêmbo tôm sêmbo têtŋ Noa ndê têtŋ. ²⁷Têtŋ ndoc dinaŋ lau seŋ gêtŋ ti sênôm gêtŋ, ma laungac ti lauwhê sem dau e Noa sôc waŋ gi. Goc bu atu suŋ ma seŋ ŋac hoŋ su siŋga. ²⁸Ma oc kainŋ tigeŋ tôm Lot ndê têtŋ, naŋ lau seŋ ti sênôm gêtŋ, semlhi gêtŋ ti sêkêtŋ gêtŋ bu lau semlhi, sêsô gêtŋ ŋawhê ma sêkwê andu. ²⁹Magoc têtŋ bêc Lot hu malac Sodom siŋ, naŋ ya ti †solpa peŋ sip akêtŋ undambê ma seŋ lau Sodom-ŋga hoŋ su. ³⁰Ma lau oc sêmbo ŋalêtŋ tigeŋ dinaŋ têtŋ bêc naŋ Ŋamalac ndê Atu mbu meŋ ma hoc dau asê. ³¹Têtŋ bêc dinaŋ, oc tôm dom bu lau naŋ sêndôc andu ŋasactô, naŋ sêsôc andu ŋalôm sêndi bu sêkôc gêtŋ daŋ. Ma ŋalêtŋ tigeŋ, oc tôm dom bu lau naŋ sêmbo ôm, naŋ sêkac dau kwi bu sêkôc si gêtŋ daŋ. ³²Gauc nem gêtŋ naŋ hôc asê Lot ndê awhê! ³³Asa naŋ tac whiŋ bu sap gêtŋ nom-ŋga dôŋ ŋapaŋ tu mbo tali-ŋga, naŋ oc niŋga. Magoc asa naŋ hu siŋ tu êŋkuc aô-ŋga, naŋ oc niŋga dom. ³⁴Aô wasôm têtŋ mac, têtŋ bêc naŋ Ŋamalac ndê Atu mbu meŋ, naŋ ŋamalac lu oc sêyêc andu daŋ, ma Anötô oc kôc iŋlu si daŋ, ma hu daŋ siŋ. ³⁵⁻³⁶Ma awhê lu oc sêndê gêtŋ sêmbo, ma Anötô oc kôc daŋ, ma hu daŋ siŋ.” ³⁷Yisu ndê ŋgacsêŋomi sêŋgô yom dau su, goc sêndac iŋ, “Pômdu, gêtŋ dinaŋ oc hôc asê yêc nde?” Ma Yisu sôm, “Yac bu dalic macmpoŋ sêŋgihi sêmbo, naŋ taŋyalê bu gêtŋ mbôp daŋ yêc.”

Yom gôliŋ pi lêtŋ datenŋ mbec-ŋga

18 ¹Ma Yisu sôm yom gôliŋ daŋ têtŋ iŋ ndê ŋgac-sêŋomi, ma kêdôhônŋ ŋac bu sêteŋ mbec tôm bêc hoŋ, ma takwê bu sêtap ŋandô sa ma sêhu siŋ dom. ²Iŋ sôm, “Ŋgac êmatôc yom-ŋga daŋ mbo malac atu daŋ. Iŋ töc Anötô dom, ma toc ŋamalac daŋ sa dom. ³Ma awhê sawa daŋ ndôc malac dinaŋ, ma iŋ têtŋ ŋgac êmatôc yom-ŋga dau gi ŋapaŋ, ma sôm, ‘Ŋamalac daŋ kêtŋ ŋawapac têtŋ aô. Nem aô sa ma êmatôc alu mba yom.’ ⁴Iŋ ndac tidim daêsam magoc ŋgac dau tec bu nem iŋ sa e tiŋambu iŋ sôm têtŋ dau, ‘Aô gatôc Anötô dom, ma gatoc ŋamalac sa dom, ⁵tigeŋ awhê sawa dindec ndac aô ŋapaŋ, ma bocdinaŋ aô wanem iŋ sa ma wamatôc iŋ ndê yom. Aô bu wakôm dom, dec iŋ oc meŋ ŋapaŋ e kôm aô lic kam sa.’”

⁶Ma Pômdu sôm têtŋ ndê ŋgac-sêŋomi, “Ŋgac êmatôc yom-ŋga dau iŋ ŋgac gitêtŋ dom, magoc iŋ sôm bu nem awhê sawa dinaŋ sa. ⁷Mac lau naŋ Anötô kêyaliŋ mac sa ati iŋ ndê, naŋ atenŋ mbec têtŋ iŋ acsalô ti ôbwêc, mac gauc gêm sake? Anötô oc tec bu ŋgô mac nem mbec ma nem mac

sa, a? ⁸Mba! Aö wasôm têt mac bu iñ oc nem mac sa ñagahô. Tigen, têt ndoc ñamalac ndê Atu mbu meñ, nañ iñ oc tap lau ñatô sa, nañ sêsap si sêkên whiñ iñ-ña dôn sêmbo, me mba?”

Yom gôliñ pi Palêsai ma ñgac kôc takis-ña dañ

⁹Yisu kêyalê bu lau ñatô nañ sêkên dañga iñ, nañ sêtoc dau sa bu lau gitêt ma sêpu lau ñatô. Bocdinañ iñ sôm yom gôliñ dañ bocdec bu. ¹⁰“Ñgac lu sêtêt lôm dabuñ si, bu sêteñ mbec. Iñlu si dañ iñ Palêsai, ma ñgac dañ iñ ñgac kôc takis-ña. ¹¹Palêsai dau tisa kalhac, ma teñ mbec tu dau-ña bocdec bu, ‘Anötö, aö wanem dañge am bu aö gatôm lau ñatô nañ lau sac, nañ dom. Aö gatôm lau kañ dom, me lau nañ sêkôm mêtê sac me mêtê mockaiñ-ña dom. Ma yomandô, aö gatôm ñgac kôc takis-ña dindê dom. ¹²Yêc wake hoñ ñalôm aö gahu gêt daney-ña siñ tidim lu tu gauc nem am-ña. Aö gawhê neñ awa ti wapa hoñ kôc gi toñ amanlu, ma gakêt toñ dañ ti da têt am.’ ¹³Palêsai teñ mbec bocdinañ, tigen ñgac kôc takis-ña kalhac ahê. Iñ hóc tandô sa têt undambê dom, magoc wec ti ñalôm ñawapac ma teñ mbec bocdec bu, ‘Anötö, tamwalô aö ñgac sac dec.’” ¹⁴Goc Yisu sôm, “Aö wasôm têt mac bu Anötö gêlic ñgac kôc takis-ña dinañ ti ñgac gitêt, ma Palêsai dinañ mba. ñahu bu asa nañ po dau ndê waê sa, nañ Anötö oc êngwiniñ iñ, ma asa nañ kêgwiniñ dau, nañ Anötö oc toc iñ sa.”

Yisu gêm mbec balêkoc sauñ

(Mat 19:13-15; Mak 10:13-16)

¹⁵Têt bêt dañ lau sêkôc si balêkoc sauñ sêtêt Yisu sêmeñ, bu iñ kên amba sac ñac. Iñ ndê ñgac-sêñomi sêlic e sêsôm dinda ti dambai. ¹⁶Tigen Yisu mbwêc ñac sêmeñ ma sôm, “Atec balêkoc dinañ sêtêt aö sêmeñ, ma alhac ñac ahuc dom. Bu Anötö ndê gôliñ gic lau nañ sêtôm balêkoc sauñ-sauñ dindec, nañ ñawaê. ¹⁷Aö wasôm yom ñandô têt mac, bu asa nañ bu sôc Anötö ndê gôliñ ñapu nditôm balêkoc sauñ dañ dom, nañ oc nditôm dom bu sôc ndi.”

Ñgac bata ti lêlôm

(Mat 19:16-22; Mak 10:17-22)

¹⁸Ma ñgac bata Israel-ña dañ ndac Yisu, “Kêdôhônwaga ñayham, aö wakôm sake, dec tiñambu Anötö oc kôc aö sa wambo tañli yêc undambê?” ¹⁹Ma Yisu sôm, “Tu sake-ña am sam aö bu ñayham? Anötö tawasê iñ ñayham. ²⁰Am kêyalê Moses ndê yomsu, ‘Kôm gêt mockaiñ-ña dom. Ndic ñamalac ndu dom. Nem kañ gêt dom. Sôm yom tasañ pi lau dom,’ ma ‘Toc damam lu dinam sa.’” ²¹Ma ñgac dau sôm, “Aö kakuc yomsu hoñ dinañ têt ndoc aö gambo balê ñapañ e kwahic dec.” ²²Yisu ñgô yom dinañ ma sôm têt iñ, “Am pônđa gêt tigen. Kêt am nem wapa hoñ têt

lau sênemlhi, ma ndic sam ŋa-awa têtj lau ŋalôm sawa. Ma bocdinaŋ am nem awa ŋandô oc yêc undambê. Ma tiŋambu mwenj ma êmkuc aô.”
 23 Magoc ŋgac dau ŋgô Yisu ndê yom e ŋalôm ŋawapac, ŋahu bu iŋ ŋgac ti wapa daêsam.

Puc pi awa ti wapa

(Mat 19:23-30; Mak 10:23-31)

24 Yisu tahê iŋ ma sôm, “Lau ti lêlôm si awa ti wapa kalhac ŋac ahuc e gitôm dom bu sêsôc Anötö ndê gôliŋ ŋapu ŋagahô. 25 Bôc atu daŋ gitôm kamel, oc tôm bu sôc so ŋalasê ŋagahô hóc gêlêc ŋgac ti lêlôm daŋ bu sôc Anötö ndê gôliŋ ŋapu su.” 26 Lau naŋ sêŋgô yom dau sêsôm, “Bu bocdinaŋ dec asa oc tôm bu tap Anötö ndê mwasinj nem lau si-ŋga sa? Oc ŋawapac atu!” 27 Magoc Yisu ô yom ma sôm, “Gêŋ naŋ ŋamalac sêtôm dom bu sêkôm, naŋ Anötö gitôm bu kôm.”

28 Ma Pita sôm têtj iŋ, “Yac oc bocke? Yac ahu mba andu ti gêŋ hoŋ siŋ tu aŋkuc am-ŋga.” 29 Ma Yisu sôm têtj iŋ, “Aô wasôm yom ŋandô têtj mac bu asa naŋ bu hu andu, me awhê, me asidôwai, me damba lu dinda, me balêkoc siŋ tu êŋkuc aô-ŋga, 30 naŋ Anötö oc kêŋ gêŋ kaiŋ dinaŋ daêsam têtj iŋ ô, têtj têm iŋ mbo nom. Ma têtj têm ŋambu-ŋga, Anötö oc kôc iŋ sa ma kêŋ iŋ ndôc tali ŋapaŋ yêc undambê.”

Yisu sôm tiyham bu iŋ oc mbac ndu

(Mat 20:17-19; Mak 10:32-34)

31 Yisu kôc ŋgacsêŋomi 12 sa sêsa si sêmbo dau-ŋga, ma sôm têtj ŋac bu, “Kwahic dec yac bu dapi Jerusalem dandi, ma gêŋ hoŋ naŋ lau propet sêto pi ŋamalac ndê Atu, naŋ oc ŋandô sa. 32 Lau oc sêkêŋ iŋ sip lau Rom-ŋga amba, ma ŋac oc sêsu iŋ susu, sêkôm iŋ ŋayom, sêhê gasôp pi iŋ, sêtap iŋ, ma sêndic iŋ ndu. 33 Magoc iŋ oc tisa tiyham têtj bêc titô-ŋga.” 34 Tigeŋ ŋac sêŋyalê yom dau ŋahu dom. ŋahu yêc siŋ dau têtj ŋac, ma ŋac si gauc sa pi Yisu ndê yom dau dom.

Yisu kôm ŋgac tapec tandô po asê

(Mat 20:29-34; Mak 10:46-52)

35 Yisu ma lau naŋ sêŋkuc iŋ sêŋsêlêŋ e sêsuŋ sa malac Jeriko. Ma yêc seŋ ŋamakê ŋgac tapec daŋ ndôc ma teŋ gêŋ. 36 ŋgac dau ŋgô bu lau daêsam sêŋsêlêŋ sêmbo seŋ, goc ndac gêŋ dau ŋahu. 37 Ma lau sêsôm têtj iŋ bu Yisu Nasaret-ŋga kêsêlêŋ mbo seŋ meŋ. 38 Goc iŋ mbwêc, “Yisu, †Dawid ndê Atu, tamwalô aô!” 39 Lau naŋ sêŋsêlêŋ sêmuŋ Yisu sêhec yom ŋgac tapec dau, ma sêsôm têtj iŋ bu nem dôŋ. Magoc iŋ mbwêc ti ŋaŋga, “Dawid ndê Atu, tamwalô aô!” 40 Yisu kwê dôŋ kalhac, ma sôm têtj lau bu sêkôc ŋgac dau sêtêŋ iŋ sêmeŋ. Ma têtj ndoc iŋ tigasuc Yisu, naŋ Yisu ndac iŋ, 41 “Am tac whiŋ bu aô wakôm sake têtj am?” Ma iŋ

sôm, “Pômdau, aö tac whiḅ bu tanôḅ ḅayham sa.” ⁴²Goc Yisu sôm têtḅ iḅ, “Tanôm ḅayham sa! Am nem kêtḅ whiḅ kôm am ḅayham sa.” ⁴³Ma ḅagahô eḅ iḅ tandô ḅayham sa, ma iḅ kêtḅ Yisu ma kêtḅ Anötö. Ma lau hoḅ naḅ sêlic gêtḅ dinaḅ, naḅ sêmḅiḅ Anötö bocdinaḅ.

Yisu lu Sakias

19 ¹Yisu sôc malac Jeriko gi, ma bu êḅsêlêtḅ gacgeḅ sa ndi. ²Ma ḅgac daḅ mbo, naḅ sêsam iḅ ndê ḅaê bu Sakias. Iḅ ḅgac bata kôc takis-ḅga, ma iḅ dau ndê mone daêsam. ³Iḅ tac whiḅ bu lic Yisu pi ḅandô, magoc iḅ gitôm dom, bu iḅ ḅgac apê, ma lau daêsam sêtḅgihi Yisu ahuc. ⁴Tu dinaḅ-ḅga iḅ kêtḅ muḅ gi, ma pi a kiḅ daḅ, bu lic Yisu naḅ kêsêlêtḅ mbo seḅ meḅ. ⁵Têtḅ ndoc Yisu hôc asê a dinaḅ ḅapu, naḅ tatac ma sôm têtḅ iḅ, “Sakias, sip mweḅ ḅagahô! Acsalô dec aö wambo am nem andu wawhiḅ am.” ⁶Goc ḅagahô Sakias sip nom ma kôc Yisu sa ti atac ḅayham, ma sêtêtḅ iḅ ndê andu si. ⁷Magoc lau hoḅ naḅ sêlic gêtḅ dau sêtucdiḅ ma sêsôm, “Yisu bu ndic ḅgac sac daḅ kêtḅ!”

⁸Têtḅ ndoc sêmbo Sakias ndê andu, naḅ ḅgac dau tisa ma sôm têtḅ Yisu, “Pômdau lic! Kwahic dec aö wawhê aneḅ wapa hoḅ kôc ndi toḅ lu, ma wakêtḅ toḅ daḅ têtḅ lau ḅalôm sawa. Ma lau naḅ aö kasau ḅac ma gakôc ḅac si mone, naḅ aö waô mone dau tidim hale têtḅ ḅac.” ⁹Dec Yisu sôm, “Acsalô lec Anötö ndê mwasiḅ nem lau si-ḅga meḅ pi lau andu dindec-ḅga. Bu ḅgac dindec iḅ Abraham ndê apaḅgac daḅ whiḅ. ¹⁰ḅamalac ndê Atu meḅ bu êḅsalê lau naḅ siḅga su, ma bu nem ḅac si.”

Yom gôliḅ pi mone gol

(Mat 25:14-30)

¹¹Lau naḅ sêtḅgô Yisu ndê yom dinaḅ, naḅ sêlic bu iḅ suḅ sa têtḅ Jerusalem, ma sêkêtḅ bata bu têtḅ ndoc iḅ hôc asê, naḅ Anötö ndê gôliḅ oc meḅ sa tiawê, ma Yisu oc ti lau Israel-ḅga si kiḅ. Bocdinaḅ Yisu gic hu sôm yom gôliḅ daḅ têtḅ ḅac. ¹²Iḅ sôm, “ḅgac ti waê atu daḅ kêmasaḅ dau bu têtḅ gameḅ baliḅ daḅ ndi, bu yêc dindê kiḅ atu oc kêtḅ ḅaclai têtḅ iḅ bu nem gôliḅ lau yêc iḅ dau ndê gameḅ. Ma tiḅambu iḅ oc mbu meḅ. ¹³Bocdinaḅ iḅ kêtḅgalêm iḅ ndê lau akiḅ amaḅlu sa, ma kêtḅ mone gol daḅ naḅ sêsam bu ‘maina’ têtḅ ḅac tôm gi.ⁱ Ma iḅ sôm têtḅ ḅac, ‘Akôc mone dec sa, ma akôm gwelēḅ pi e nditôm aö wambu wameḅ.’ ¹⁴Magoc iḅ ndê lau sêtēc iḅ, ma sêkêtḅ lau aheḅ-ḅga ḅatô sêtḅkuc iḅ bu sêsôm têtḅ kiḅ atu bu, ‘Yac atec ḅgac dec bu nem gôliḅ yac.’ ¹⁵Magoc kiḅ atu ḅgô ḅac si yom dom ma kêtḅ ḅaclai têtḅ ḅgac dau bu nem gôliḅ lau, goc iḅ mbu têtḅ iḅ ndê gameḅ gi. Iḅ hôc asê su, goc kêtḅ yom bu iḅ ndê lau akiḅ naḅ iḅ kêtḅ mone têtḅ ḅac, naḅ sêtêtḅ iḅ sêndi. Iḅ bu lic ḅac sêkôm gwelēḅ bocke pi mone dau.

ⁱ 19:13 Maina tigeḅ gitôm †denarii 100, naḅ gitôm ḅaôli gwelēḅ bêc 100-ḅga.

16 “Ŋgac akiŋ ŋamata-ŋga meŋ ma sôm, ‘Aneŋ ŋadau, aô gakôm gwelenŋ pi am nem mone tigeŋ, ma gatap mone amanŋlu tiyham sa.’ 17 Ma ŋadau sôm, ‘Aneŋ ŋgac akiŋ, am kôm ŋayham! Am yob gêŋ sauŋ dindec ŋapep, ma kwahic dec aô wakêŋ am nem gôliŋ malac amanŋlu.’

18 “Ma ŋgac tilu-ŋga meŋ ma sôm, ‘Ŋadau, aô gakôm gwelenŋ pi am nem mone tigeŋ, ma gatap mone amanŋdanŋ tiyham sa.’ 19 Ma ŋadau sôm têtŋ iŋ, ‘Kwahic dec aô wakêŋ am nem gôliŋ malac amanŋdanŋ.’

20 “Ma lau akiŋ dau si danŋ meŋ ma sôm, ‘Ŋadau, am nem mone gol tigeŋ kelec. Aô kapaŋ si ŋapep. 21 Aô gatôc am, bu am ŋgac lêlê-ŋga dom. Am kêŋ batam bu kôc gêŋ ŋandô yêc lau naŋ am kêŋ gêŋ têtŋ ŋac dom. Ma am gic gêŋ ŋandô sa yêc gameŋ naŋ am sô gêŋ ŋawhê dom.’ 22 Goc ŋadau sôm têtŋ iŋ, ‘Am ŋgac akiŋ sac! Aô wamatôc am wanŋkuc yom naŋ am daôm sôm. Am kêyalê bu aô ŋgac lêlê-ŋga dom, ma bu aô gakêŋ batanŋ bu wakôc gêŋ yêc lau naŋ aô gakêŋ gêŋ têtŋ ŋac dom, ma bu wandic gêŋ ŋandô sa yêc gameŋ naŋ gasô gêŋ dom. 23 Tu sake-ŋga am kôm gwelenŋ pi aneŋ mone dom? Oc tôm bu am kêŋ aneŋ mone têtŋ lau sêyob mone-ŋga bu sêyob e aô wambu wameŋ, dec oc tôm bu sêkêŋ mone ŋagec sac mone dau ŋahô ma aô wakôc hoŋ sa.’

24 “Ma iŋ sôm têtŋ lau naŋ sêlhac sêmpiŋ, ‘Akôc iŋ ndê mone tigeŋ dinaŋ su, ma akêŋ têtŋ ŋgac akiŋ naŋ kôc mone amanŋlu.’ 25 Magoc ŋac sêsôm, ‘Ŋadau, iŋ kôc mone amanŋlu su!’ 26 Goc ŋadau sôm, ‘Aô wasôm têtŋ mac bu asa naŋ yob gêŋ naŋ aô gakêŋ sip iŋ amba, naŋ ŋapep, naŋ wakêŋ gêŋ ŋatô tiyham têtŋ iŋ whiŋ. Tigeŋ asa naŋ yob ndê gêŋ ŋapep dom, naŋ aô wakôc iŋ ndê gêŋ hoŋ su. 27 Ma aŋgô! Aneŋ ŋacyo naŋ sêtec bu aô wanem gôliŋ ŋac, naŋ akôc ŋac sêmeŋ, ma andic ŋac ndu yêc aô aŋôŋ-ŋga.’ ”

Yisu hôc asê Jerusalem

(*Mat 21:1-9; Mak 11:1-10; Jon 12:12-15*)

28 Yisu sôm yom dinaŋ su, ma kêsêlêŋ hêganôŋ Jerusalem gi, ma iŋ ndê sêŋomi sêŋkuc iŋ. 29 Iŋ kêsêlêŋ gi e kêpiŋ malac lu naŋ sêsam bu Betpagi ma Betani, malac lu naŋ sêyêc Lôc Olib. Ma iŋ kêkiŋ ndê ŋgacsêŋjom lu 30 ma sôm têtŋ iŋlu, “Asôc malac dindê andi, ma amlu oc atap doŋki danŋ sa, naŋ sêsô dôŋ kalhac. Iŋ doŋki ŋatu wakuc, naŋ ŋamalac danŋ ndôc ŋahô muŋ su dom. Aŋgapwêc su ma akôc sa amêŋ. 31 Ma lau bu sêndac amlu bu bocke ma amlu bu aŋgapwêc iŋ su, goc asôm têtŋ ŋac bu, ‘Pômdau tac whiŋ bu doŋki dindec nem iŋ sa.’ ” 32 Boc-dinaŋ ŋgac lu dinaŋ sêsôc malac dau si, ma sêtap doŋki dau sa tôm Yisu sôm. 33 Sêŋgapwêc doŋki sêmbo, ma ŋadaui sêndac iŋlu bu, “Amlu aŋgapwêc iŋ tu sake-ŋga?” 34 Ma sêsôm, “Pômdau tac whiŋ bu doŋki dindec nem iŋ sa.”

35 Iŋlu sêwê doŋki dau sêtêŋ Yisu si, ma sêkêŋ ŋac si ŋakwê awê-ŋga sac doŋki, ma sêkêŋ iŋ pi gi ndôc ŋahô. 36 Yisu ndôc doŋki ma kêsêlêŋ gi,

ma lau sêhê si ñakwê yêc seŋ. ³⁷Iñ kêsêlêñ gi e hôc asê gameñ nañ seŋ sip akêñ Lôc Olib, goc sêñomi toñ atu nañ sêñkuc iñ, nañ sêmbwêc ti atac ñayham atu, ma sêmpinñ Anötö pi gêñ dalô nañ sêlic. ³⁸Sêsôm, “Anötö nem mbec kinñ nañ meñ gêm Pômdau aŋgô. Yom malô yêc undambê, ma Anötö ndê waê sa yêc lôlôc!”

³⁹Palêsai ñatô sêmbô sêwhinñ lau daêsam dinañ, ma sêsôm têñ Yisu, “Kêdôhônwaga, hec yom am nem sêñomi, bu ñac si yom so.” ⁴⁰Ma Yisu sôm têñ ñac, “Añgô! Sêñomi bu sênem dôñ, goc hoc dindec oc sêmbwêc asê!”

⁴¹Yisu kêsêlêñ gi e hôc tandô sa pi malac atu Jerusalem, dec tañ pi malac dau. ⁴²Iñ sôm, “Tôm ñasawa baliñ su e meñ têñ acsalô lec aô tac whinñ bu mac lau Jerusalem-ñga añyalê lêñ nañ oc tôm bu kêñ mac ambo ti atac malô. Tigeñ mac nem ñalôm ñadandi ma kwahic dec lêñ dau yêc siñ dau têñ mac. ⁴³Têm oc meñ sa, nañ nem ñacyo oc sêñgihi mac ahuc ma sêñgili tunbôm ma sêsôc nem malac sêloc. ⁴⁴Ñac oc sêndic mac ti nem balêkoc hoñ ndu, m a sêseñ malac dindec su e hoc dañ ndôc hoc dañ ñahô tiyham dom. Ñac oc sêkôm bocdinañ, ñahu bu Anötö têñ mac meñ bu nem mac sa, magoc mac añyalê dom.”

Yisu soc lau su yêc lôm dabuñ

(*Mat 21:12-17; Mak 11:15-17*)

⁴⁵Têñ ndoc Yisu hôc asê Jerusalem, nañ iñ kêsêlêñ gi e sôc lôm dabuñ ñabatêmdö gi. Ma iñ soc lau nañ sêkêñ gêñ bu lau sênemlhi, nañ sêsa awê. ⁴⁶Iñ sôm têñ ñac, “Sêto Anötö ndê yom yêc bocdec bu, ‘Aneñ andu gic waê bu lau sêteñ mbec sêmbô-ñga,’ magoc mac akôm Anötö ndê andu ti lau kañ si gameñ.”

⁴⁷Tôm bêc hoñ iñ kêdôhônñ lau mbo lôm dabuñ ñabatêmdö. Ma dabuñsiga atu-tu ti lau †Skraib nañ sêndôhônñ yomsu, ma lau bata Israel-ñga sêñsalê lêñ bu sêndic iñ ndu. ⁴⁸Magoc sêtap lêñ dañ sa dom, bu lau hoñ atac whinñ bu sêñgô iñ ndê yom, ma sêsap iñ dôñ ñapañ.

Gêndac pi Yisu ndê ñaclai ñahu

(*Mat 21:23-27; Mak 11:27-33*)

20 ¹Têñ têm dinañ Yisu kêdôhônñ lau, ma gêm mêtê pi ñawaê ñayham mbo lôm dabuñ. Ma dabuñsiga atu-tu ti lau Skraib ma lau bata Israel-ñga sêtêñ iñ si, ²ma sêsôm, “Sôm têñ yac. Am kôc ñaclai yêc nde, bu kôm gêñ hoñ nañ am kôm? Asa kêñ têñ am?” ³Ma iñ sôm, “Gêñ ñamata-ñga aô bu wakêñ gêndac dañ têñ mac. Asôm têñ aô, ⁴asa kêñ ñaclai têñ Jon dec iñ kêku lau? Anötö kêñ ñaclai têñ iñ, me mba?”

⁵Ñac sem yomgalôm têñ dau pi Yisu ndê gêndac ma sêsôm, “Yac bu dasôm bu, ‘Anötö kêñ ñaclai têñ Jon,’ dec iñ oc ndac yac, ‘Tu sake-ñga mac akêñ whinñ Jon dom?’ ⁶Magoc yac bu dasôm bu Jon kêku lau

kêkuc ñamalac nom-nga si gauc ñambwa, dec lau hoñ oc sêruc yac ña hoc dambac ndu, bu ñac sêlic Jon bu Anötö ndê propet dañ.” ⁷Bocdinañ sêsôm têtñ Yisu bu sênjalê Jon ndê ñaclai ñahu dom. ⁸Ma Yisu sôm têtñ ñac, “Ma bocdinañ aö wasôm aneñ ñaclai ñahu asê têtñ mac dom.”

Yom gôliñ pi lau sêyob ôm wain-nga
(*Mat 21:33-46; Mak 12:1-12*)

⁹Ma Yisu sôm yom gôliñ dañ têtñ lau dau bocdec bu, “Ïgac dañ sô ôm wain-nga dañ, ma kêtñ têtñ lau ñatô bu sêyob. Goc iñ têtñ gameñ dañ gi ma mbo ñasawa baliñ. ¹⁰Têtñ ndoc sêhoñ wain ñandô sa-nga, iñ kêkiñ ñgac akiñ dañ têtñ lau nañ sêyob iñ ndê ôm, nañ gi, bu sêkêtñ wain ñandô ñatô têtñ iñ. Tigeñ ñac sic iñ, ma sêkêtñ iñ kölhô amba sawa gi. ¹¹Goc ñadau kêkiñ ñgac akiñ dañ tiyham, magoc ñac sic iñ ma sêkôm mêtê sac têtñ iñ, ma sêkêtñ iñ kölhô amba sawa gi. ¹²Ma iñ kêkiñ ñgac titö-nga têtñ ñac gi, magoc ñac sic iñ basô, ma sêmasuc iñ sa awê gi. ¹³Goc ôm wain-nga ñadau sôm, ‘Aö wakôm sake? Aö wañkiñ aneñ balê, nañ aö atac whiñ iñ ndu andô. Mboe ñac oc sêtoc iñ sa.’ ¹⁴Tigeñ têtñ têtñ lau sêyob ôm-nga sêlic ñadau ndê atu kêsêlêñ meñ, nañ sêsôm têtñ dandi, ‘Ïadau ndê atungac dê oc wêkaiñ ôm dindec. Dandic iñ ndu ma dakôc ôm dindec su ti yac neñ.’ ¹⁵Ma sêmasuc iñ yêc ôm wain-nga, ma sic iñ ndu.”

Ma Yisu ndac, “Mac gauc gêm bu ôm ñadau oc kôm sake têtñ ñac? ¹⁶Iñ oc meñ ma ndic lau sêyob ôm-nga ndu, ma kêtñ ndê ôm têtñ lau ñatô sêyob.” Lau nañ sênjêgô yom dinañ sêsôm, “Mba! Bocdinañ dom!” ¹⁷Magoc Yisu tahê ñac ma sôm, “Gauc nem yom nañ sêto yêc bocdec bu, ‘Hoc nañ lau sêkwê andu-nga sêtec, nañ kwahic ti hoc ñamata-nga yêc andu dau.’ Mac añjalê yom dau ñahu, me mba? ¹⁸Lau hoñ nañ sêtinñ gahi pi hoc dinañ e sêpeñ, nañ oc sêninñga, ma hoc dau bu peñ pi ñamalac dañ, dec oc sec iñ popoc.”

¹⁹Lau Skraib ti dabuñsiga atu-tu sênjalê bu Yisu ndê yom gôliñ dinañ hêganôñ ñac, dec ñac atac whiñ bu sêkôc iñ dôñ ñagahô eñ. Magoc ñac sêtoc lau nañ sêmbo sêwhiñ iñ, dec sêkôm dom.

Lau bu sêtinñ Yisu pi yom takis-nga
(*Mat 22:15-22; Mak 12:13-17*)

²⁰Ma lau bata Israel-nga dinañ tatiñ Yisu ñapep, ma sêkêtñ lau ñatô bu sêtinñ iñ. Lau sêtinñ Yisu-nga dinañ sênjsau bu ñac tac whiñ bu sênjêgô iñ ndê yom. Tigeñ sêkêtñ dañga bu mboe sênjêgô iñ sôm yom so dañ, dec ñac oc sêkêtñ iñ sip gôliñwaga Rom-nga ndê amba, bu êmatôc iñ. ²¹Ma ñac sêsôm têtñ iñ bu, “Kêdôhônwaga, yac añjalê bu am sôm yom ma kêdôhônñ lau ñalêñ gitêñ. Am toc lau hoñ sa ñalêñ tigeñ, ma kêdôhônñ Anötö ndê lêtñ têtñ lau kêkuc yom ñandô. ²²Kwahic dec yac bu andac am bu iñ solop bu yac dakêñ takis têtñ Sisa, me mba?”

²³Yisu kêyalê bu ñac gauc gêm bu sêtîm iñ, dec sôm têtñ ñac, ²⁴“Atôc mone silba dañ têtñ aö.” Ma iñ ndac, “Asa ndê ñagatu ti ñaê yêc mone dindec?” ²⁵Ma ñac sêsôm, “Sisa ndê.” Goc Yisu sôm têtñ ñac, “Bocdinañ atoc Sisa sa ña gêtñ nañ gic iñ ñawaê, ma atoc Anötö sa ña gêtñ nañ gic iñ ñawaê.”

²⁶Ñalêtñ dinañ ñac sêtñsahê bu sêtîm iñ bu sôm yom so dañ yêc lau hoñ añgô-ñga, magoc sêtôm dom. Sêhêdaê tu iñ ndê yom ti gauc-ñga, ma ñac si yom mba bu sêsôm ô.

Lau Sadiusi bu sêtîm Yisu pi yom datisa akêtñ lau batê-ñga
(*Mat 22:23-33; Mak 12:18-27*)

²⁷Têtñ dinañ lau †Sadiusi ñatô sêtêtñ Yisu si. Ñac lau Israel-ñga si toñ dañ, nañ sêkêtñ whiñ bu lau batê oc sêtisa tiyham dom. Ma ñac sêkêtñ gêndac dañ têtñ Yisu bocdec bu, ²⁸“Kêdôhônwaga, Moses to yac neñ yomsu dañ bocdec bu. Ñgac dañ bu ndê dôwa nem awhê sa ma bu mbac ndu ma balêkoc mbasi, nañ ñgac dau oc nem dôwa ndê awhê sawa, ma kwê balêkoc asê tu dôwa-ñga. ²⁹Têtñ têtñ dañ, asidôwai 7 sêmbo. Ñgac ñamata-ñga gêm awhê sa, magoc iñ mbac ndu ma iñ ndê balêkoc mba. ³⁰⁻³¹Ma ñgac tilu-ñga gêm awhê sawa dau, tigeñ mbac ndu ma balêkoc mba. Ñalêtñ tigeñ ñgac titô-ñga e têtñ ñgac ti-7-ñga hoñ sem awhê sawa dau magoc sêmbac ndu ma balêkoc mba. ³²Ma tiñambu awhê dau mbac ndu. ³³Kwahic dec yac bu andac am bocdec bu. Lau batê bu sêtisa tôm lau ñatô sêsôm, dec awhê dau oc ti asa ndê awhê? Bu asidôwai 7 dinañ hoñ sem iñ su têtñ ndoc sêmbo tali.”

³⁴Ma Yisu ô yom ma sôm têtñ ñac, “Lau têtñ dindec-ñga sem dau, ³⁵tigeñ têtñ têtñ ñambu-ñga, lau nañ Anötö oc lic bu lau gitêtñ ma uñ ñac sa bu sêndôc tali yêc undambê, nañ oc sênem dau dom. ³⁶Ma oc tôm dom bu ñac sêmbac ndu tiyham, bu ñac oc sêmbo sêtôm añela. Lau nañ Anötö uñ sa sêndôc undambê, nañ oc sêti iñ ndê balêkoc. ³⁷Ma Moses dau tôc asê bu lau batê oc sêtisa. Gauc nem yom nañ iñ to pi ndoc iñ gêlic ya golom sa a dañ. Têtñ ndoc dinañ iñ sam Pômdau bu Abraham ndê Anötö, Aisak ndê Anötö, ma Jakob ndê Anötö. ³⁸Lau batê bu sêtisa dom, dec tu sake-ñga Anötö sam dau bu lau tö dinañ si Anötö? Anötö iñ lau batê si Anötö dom, iñ lau tali si Anötö, bu lau hoñ si ñahu sêmbo tali-ñga yêc Anötö.”

³⁹Lau †Skraib ñatô sêtñgô Yisu ndê yom dau ma sêsôm, “Kêdôhôn-waga, am nem yom ñayham!” ⁴⁰Ma tiñambu lau sêtôc dau bu sêkêtñ gêndac têtñ Yisu tiyham.

Yisu kêsahê lau si gauc pi Mesaya
(*Mat 22:41-46; Mak 12:35-37*)

⁴¹Ma Yisu sôm têtñ ñac, “Bocke ma lau sêsôm bu Mesaya iñ Dawid ndê Atu? ⁴²Dawid dau to yom yêc Buku Wê-ñga bocdec bu, ‘Anötö sôm

têḡ aneḡ Pômdau, “Am ndöc aö amanḡ andô-ḡga, ⁴³e nditôm aö wakêḡ nem ḡacyo sêsöc am gahim ḡapu.” ⁴⁴Bocdinaḡ Dawid dau sam Mesaya bu Pômdau, ma bocke dec lau sêsôm bu Mesaya iḡ Dawid ndê Atu?”

Yisu ndê puc pi lau Skraib si mêtê sac
(*Mat 23:1-7; Mak 12:38-40*)

⁴⁵Ma yêc lau hoḡ dinaḡ si aḡḡô-ḡga, Yisu sôm têḡ iḡ ndê ḡgacsêḡomi, ⁴⁶“Ayob daôm ḡapep bu aḡkuc lau Skraib si gêbôm dom. ḡac sêsöc ḡakwê baliḡ ma sêḡsêlêḡ sêmbo malac lôm, bu ḡac atac whiḡ bu lau sêtoc ḡac sa ma sêhê mwalêc ḡac. ḡac atac whiḡ bu sêndöc mala ḡamata-ḡga yêc lôm wê-ḡga, ma lau tiwaê si mala têḡ ndoc sêneḡ mwasiaḡ-ḡga. ⁴⁷Yêc lau hoḡ aḡḡô-ḡga, sêteḡ mbec baliḡ, magoc têḡ ndoc lau sêlic ḡac dom, naḡ sêḡsau lauwhê sawa bu sêḡḡaho ḡac si andu su. Anötö oc êmatöc ḡac ma kêḡ ḡagêyö sac andô têḡ ḡac.”

Awhê tuc daḡ kêḡ da daḡe
(*Mak 12:41-44*)

21 ¹Yisu hôc tandô sa ma gêlic lau ti lêlôm sêkêḡ si da sip apa da-ḡga naḡ kalhac lôm dabuḡ ḡamakê. ²Ma iḡ gêlic awhê tuc ḡalôm sawa daḡ kêḡ awa sauḡ lu gitôm wan toea lu sip apa da-ḡga. ³Ma iḡ sôm, “Aö wasôm yomandô têḡ mac, bu yêc Anötö aḡḡô-ḡga awhê tuc ḡalôm sawa dindec kêḡ da hôc gêlêc lau hoḡ si da su. ⁴ḡahu bu lau ti lêlôm sêkêḡ si da, magoc ḡac si awa daêsam gacgeḡ yêc ḡac-ḡga. Tigeḡ awhê dindec iḡ awhê ḡalôm sawa, ma iḡ kêḡ iḡ ndê gêḡ hoḡ ti da.”

Yisu sôm yom pi lôm dabuḡ Jerusalem-ḡga
(*Mat 24:1-2; Mak 13:1-2*)

⁵Yisu ndê ḡgacsêḡomi ḡatô sêsôm yom pi hoc ḡayham-ḡayham ma gôlôn ḡayham naḡ lau ḡatô sêkêḡ bu sêḡgôlôn lôm dabuḡ. Magoc Yisu sôm, ⁶“Ndoc oc meḡ sa, naḡ gêḡ ḡayham hoḡ naḡ kwahic dec mac alic yêc gameḡ dindec, naḡ oc niḡga. ḡacyo oc sêseḡ hoc hoḡ su, ma hoc daḡ oc ndöc hoc daḡ ḡahô tiyham dom.”

Gêḡ wapac têm ḡambu-ḡga-ḡga
(*Mat 24:3-14; 10:17-22; Mak 13:3-13*)

⁷Ma Yisu ndê ḡgacsêḡomi sêndac iḡ, “Kêdôhônwaga, ḡawapac naḡ am sôm yom pi, naḡ oc hôc asê Jerusalem têḡ têm bocke? Ma gêḡ sake oc kêḡ puc yac bu têm dau meḡ kêpiḡ?” ⁸Ma Yisu sôm, “Ayob daôm ḡapep bu lau sêḡsau mac dom. Lau daêsam oc sêmeḡ sênem aö aḡônḡ ma sêsôm, ‘Aö Mesaya dau,’ ma ‘Têm dau meḡ kêpiḡ.’ Aḡkuc ḡac dom! ⁹Ma têḡ têm mac aḡḡô ḡawaê bu lau sic siḡ têḡ dau, me lau sêli dau sa, naḡ atöc daôm dom. Bu gêḡ hoḡ dinaḡ gic waê bu meḡ sa muḡ, magoc têm ḡambu-ḡga

yêc dôn yêc.”¹⁰ Ma Yisu gic têku yom ma sôm, “Kinj nom-nga oc sêkên kisa dau, ma lau akên gamej danj oc sêndic sinj têtj lau akên gamej danj.¹¹ Tiyhò oc nem atu, ma tóbôm ti gêmbac atu-tu oc sêhòc asê gamej njatò. Lau oc sêlic gêtj dalò atu-tu yêc umboj, ma gêtj atu-tu nanj oc kôm njac sêtòc dau atu.

¹² “Gêtj njamata-nga, lau oc sêkên kisa mac, ma sêkòc mac dôn. Tu mac akên whij aö-nga, dec lau oc sêmatòc mac yêc lôm wê-nga, ma sêkên mac andòc gapocwalò. Ma njac oc sêkên mac alhac kinj ti gòlinjwaga anjò-nga bu sêmatòc mac.¹³ Ndoc dinaj ij mac nem têtj bu asôm yom asê pi aö.¹⁴ Ahêgo daòm tu yom asôm-nga dom,¹⁵ bu aö dauj oc wanem mac sa, ma wakên yom ti gauc têtj mac. Ma mac nem njacyo oc sêtôm dom bu sêd mac nem yom me sêsej mac nem yom.¹⁶ Dinami ti damami, ma asidôwai ma silip nanj sêkên whij dom, nanj oc sêhoc mac nem lau njatò asê, ma sêndic njatò ndu.¹⁷ Tu aö-nga dec lau hoj oc sêtec mac.¹⁸ Tigenj Anötò oc yob mac e nem kêclauj njandò danj ninja dom.¹⁹ Magoc alhac njanga ma ahu aö sinj dom, ma Anötò oc kòc mac sa andòc tamli njapanj yêc undambê.”

Ŋawapac gamej Judia-nga
(*Mat 24:15-28; Mak 13:14-23*)

²⁰ “Têtj ndoc mac alic lau sinj-nga sêngihi Jerusalem ahuc, nanj dec anjyalê bu njasawa sau j ma njac oc sêsej malac atu dau su.²¹ Têtj ndoc dinaj, mac lau nanj ambo gamej Judia-nga nanj alhò njagahò api gamej lôc-nga andi. Lau nanj sêmbo Jerusalem, nanj sêhu malac dau sinj, ma lau nanj sêmbo gamej njamakê-nga nanj sêsòc malac atu dau tiyham dom.²² Yom hoj nanj lau propet sêhoc asê gwana j pi njagêyò nanj oc tap lau nom-nga sa, nanj oc njandò sa têtj têtj dinaj.²³ Oyaê. Lauwhê nanj daê ma lauwhê nanj sêkên su têtj balêkoc, nanj oc sêtap njawapac atu sa têtj têtj dinaj. Ŋawapac atu oc hôc asê nom, ma lau Israel-nga oc sênsahê njacyo si atac njandê.²⁴ Lau gamej apa-nga oc sêndic lau Israel-nga njatò ndu njac bienj bali j, ma sêngaho njatò su ma sêwê njac sêtêtj lau apa si gamej sêndi sêtôm lau gapocwalò-nga. Anötò kêmatij têtj bu lau gamej apa-nga sêngwini j lau Jerusalem-nga, ma njac oc sêkôm e têtj dau pacndê.”

Ŋamalac ndê Atu ndê bêc mbu me j-nga
(*Mat 24:29-36; Mak 13:24-31*)

²⁵ “Lau oc sêlic gêtj dalò ac-nga ti ayò-nga ma tata-nga. Ma yêc nom, gwêc oc li dau sa atu, ma kôm lau si gauc ênsò j ma njalóm njawapac atu.²⁶ Gêtj ti njac lai nanj sêlhac umboj oc wiwic sa, ma tu dinaj-nga lau oc sêtòc dau e njac tagólò ma sêhêgo dau tu gêtj bocke nanj oc hôc asê nom-nga.²⁷ Têtj ndoc dinaj lau oc sêlic Ŋamalac ndê Atu mbu me j ndòc dao njahò ti njac lai ma njawasi atu.²⁸ Têtj ndoc gêtj kai j dinaj bu me j sa, nanj

atisa ma tamtac, bu mac nem ndoc bu atap Anötö ndê mwasinj nem mac si-nga na-ñandô sa, nañ meñ kêpiñ.”

²⁹Ma Yisu sôm yom gôliñ dañ bocdec, “Gauc nem a lañ ma a ñatô. ³⁰Têñ ndoc mac alic ñalauñ wakuc bu léc, nañ mac añyalê bu ndoc ac-nga meñ kêpiñ. ³¹Ma bocdinañ têñ ndoc mac alic gêñ nañ aö gasôm yom pi, nañ hóc asê, dec añyalê bu ndoc meñ kêpiñ bu Anötö ndê gôliñ meñ sa tiawê. ³²Yomandô! Lau tèm dinañ-nga oc sêmbac ndu dom e gêñ hoñ dinañ hóc asê. ³³Undambê ti nom oc ninga, tigeñ aneñ yom dañ oc ninga dom.”

Danem ali

³⁴⁻³⁵Ma Yisu sôm, “Oc tôm dom bu ñamalac dañ êñléc béc ñambu-nga dau. Bocdinañ dec amasañ daôm ñapep ma anem ali. Ayob bu anôm gêñ êñiñ mac-nga ma aneñ gêñ ñawahô me apô sim daôm tu ñawapac nom-nga êñléc dom, bu mboe gêñ dau oc hê nem gauc dôñ têñ tèm béc ñambu-nga dau meñ sa. Bu béc dau oc hóc asê mac ñagahô, tôm bôc dañ sip akô sep eñ. ³⁶Anem ali ma ateñ mbec bu Anötö kêñ licwalô têñ mac bu ñawapac hoñ nañ oc sêhóc asê, nañ ku mac dulu dom, ma bu mac oc atôm bu alhac ñamalac ndê Atu añgô-nga ti mayam pac.”

³⁷Têñ ñasawa dinañ Yisu kédôhônñ lau mbo lôm dabuñ ñabatêmdö têñ aosalô, ma iñ sa gi yêc Lôc Olib têñ ôbwêc. ³⁸Tôm béc hoñ lau daêsam sêtêñ lôm dabuñ si têñ bêbêc ganduc, bu ñac atac whiñ bu sêngô Yisu ndê yom.

Judas sôm tidônñ bu hoc Yisu asê

(Mat 26:14-16; Mak 14:10-11)

22 ¹Lau Israel si ñMwasinj Bolom Yist Mba-nga nañ lau sêsam bu Mwasinj Pasowa-nga, nañ meñ kêpiñ. ²Ma dabuñsiga atu-tu ti kédôhônñwaga yomsu-nga sêñsalê lêñ bu sêndic Yisu ndu gelec, ñahu bu sêtôc lau. ³Têñ ndoc dinañ Sadañ sip Judas ndê ñalôm. Iñ ñgac nañ sêsam bu Iskeriot, ma iñ ñgacsêñomi 12 si dañ. ⁴Iñ têñ dabuñsiga atu-tu ti lau siñ-nga nañ sêyob lôm dabuñ, nañ gi, ma ñac sem yomgalôm pi lêñ tu Judas hoc Yisu asê têñ ñac-nga. ⁵Goc ñac atac ñayham, ma sêsôm tidônñ bu sênemlhi iñ ña mone. ⁶Judas gôlôc ma kêsâlê ndoc bocke nañ lau daêsam oc sêmbo sêwhiñ Yisu dom, dec oc tôm bu iñ hoc Yisu asê.

Yisu ndê ñgacsêñomi sêmasañ Mwasinj Pasowa-nga

(Mat 26:17-19; Mak 14:12-16)

⁷Mwasinj Bolom Yist Mba-nga ñabêc nañ lau Israel sic domba Pasowa-nga ndu, nañ meñ hóc asê. ⁸Ma Yisu kêkiñ Pita lu Jon ma sôm, “Amlu andi ma amasañ Mwasinj Pasowa-nga bu daneñ.” ⁹Ma sêndac iñ, “Am tac whiñ bu alu amasañ Pasowa yêc nde?” ¹⁰Ma Yisu sôm têñ iñlu, “Asôc

Jerusalem andi, ma amlu oc atap ngac danj sa, nanj hóc bu lôn danj. Anjukc inj atên inj ndê njadau ndê andu andi, ¹¹ma asóm tên andu njadau, ‘Alu mba kêdôhônwaga ndac am pi njalóm njaclej-njga, bu inj ti ndê njgacsênjomi bu sênej Mwasinj Pasowa-njga yêc am nem andu.’ ¹²Ma inj oc tôc njalóm atu danj yêc andu dau njahô-njga tên amlu. Tebo ti gên hoj tu yac danej Mwasinj Pasowa-njga yêc njalóm dinanj, goc amlu amasanj gên yêc njalóm dinanj.” ¹³Goc injlu sêsóc Jerusalem si ma sêtap gên hoj sa gitôm Yisu sôm tên injlu, ma sêmasanj mwasinj Pasowa-njga.

Yisu gic hu Mwasinj Dabuj
(*Mat 26:26-29; Mak 14:22-26*)

¹⁴Tên ôbwêc dinanj, Yisu ndóc tebo whinj lau aposel bu sênej Mwasinj Pasowa-njga. ¹⁵Ma inj sôm tên njac, “Njasawa sauj aô oc wahóc njandê atu, magoc aô atac whinj bu wanej Mwasinj Pasowa-njga dindec wawhinj mac muj. ¹⁶Bu aô wasóm tên mac, aô wanej Mwasinj Pasowa-njga tiyham dom e Anötö ndê gôlinj mej sa tiawê, ma Pasowa dau nj-njandô mej sa.” ¹⁷Goc inj kôc laclhu wain-njga danj, gêm danje ma sôm, “Akôc ma akên lom tên daôm. ¹⁸Aô wasóm tên mac bu aô oc wanôm wain tiyham dom e Anötö ndê gôlinj mej sa tiawê.” ¹⁹Ma inj kôc bolom, gêm danje ma pô kôc, goc gic sam tên njac ma sôm, “Aô nej njandô dau dec, nanj gakênj tu mac-njga. Anej gên dindec tu bu gauc nem aô-njga.” ²⁰Njac sej gên pacndê, goc njalênj tigenj inj kôc laclhu wain-njga danj ma sôm, “Lacclu dindec ti dôhôn pwac wakuc anej dac-njga, nanj wakêc sinj tu mac-njga. ²¹Tigenj njgô! Njgac nanj bu hoc aô asê, nanj gên gên ndóc tebo whinj aô. ²²Bu gên nanj oc hóc asê Njamalac ndê Atu, nanj kêkuc lênj nanj Anötö kêmasanj gwananj su, tigenj njgac nanj hoc aô asê, nanj oc tap njagêyô atu sa. Oyaê!” ²³Goc njac hoj sêndac dandi pi njac si asa oc kôm gênj dau.

Asa ti njgac njamata-njga
(*Mat 20:25-28; 19:28; Mak 10:42-45*)

²⁴Ma tên ndoc dinanj njgac-sênjomi sêsej dau bu njac si asa ti njgac njamata-njga. ²⁵Goc Yisu sôm tên njac, “Lau sambuc si kinj sêtoc dau sa tên njac si lau, ma lau nanj sem gôlinj lau, nanj sêsam dau bu lau njamata-njga. ²⁶Magoc mac anjukc mêtê kainj dinanj dom. Mac nem asa inj njgac tiwaê, nanj êngwininj dau ti njgac waêmba. Ma asa inj njgac njamata-njga, nanj ti njgac akinj njambwa. ²⁷Mac gauc gêm bocke? Njgac nanj ndóc tebo, ma njgac nanj gêm akinj inj, nanj injlu si asa ti njgac njamata-njga? Yêc njamalac njgô-njga, njgac nanj ndóc tebo inj njgac njamata-njga. Tigenj aô gambo gawhinj mac gitôm njgac akinj.

²⁸“Ndoc bocke nanj njawapac me kisa tap aô sa su, nanj mac ahu aô sinj dom. ²⁹Bocdinanj tinjambu aô wakênj mac anem gôlinj lau, gitôm Damanj kênj njac lai tu wanem gôlinj-njga sip aô dauj amanj. ³⁰Ma mac oc anej ti

anôm gêñ awñij aö yêc gameñ undambê-nga, ma mac oc andöc pônj atu ma amatöc Israel si lau ñatorj 12.”

Yisu sôm bu Pita oc sêc ij ahuc

(Mat 26:31-35; Mak 14:27-31)

³¹Ma Yisu gic têku yom ma sôm, “Saimon, Saimon, Sadarj ndac bu êñsahê mac nem akêñ whij bu gêñ ñandô me mba, gitôm lau sêwhê wit ñapa ti ñandô kôc. ³²Tigeñ aö gateñ mbec tu am-nga Saimon, bu am oc hu nem kêñ whij sij dom. Ma tiñambu têtj têtj am nem daôm kwi, nañ puc nem asidôwai dôñ.” ³³Dec Pita sôm, “Pômdau, tôm ñac sêkêñ hêclu dasôc gapocwalô, me sêndic hêclu ndu, aö wahu am sij dom.” ³⁴Ma Yisu sôm, “Pita, aö wasôm têtj am, ôbwêc dec am oc sêc aö ahuc tidim tö, ma tiñambu dalec oc tañ.”

Ñgacsêñomi oc sêtap kisa sa

³⁵Goc Yisu ndac ñac, “Têtj ndoc aö kakiñ mac asa a bu anem mêtê lau, nañ mac akôc talhi mone-nga, ti gata, ma atapa dom. Têtj ndoc dinañ mac apônda daôm, me mba?” Ma ñac sêsôm, “Mba.” ³⁶Goc Yisu sôm, “Kwahic dec ma ndi, mac nem talhi mone-nga me gata bu yêc, nañ akôc sa. Ma mac nem bieñ baliñ bu mbasi, dec akêñ nem ñakwê awê-nga têtj lau sênemlihi, goc akôc ña-awa ma anemlihi bieñ baliñ dañ. ³⁷Bu sêto yom dañ yêc bocdec bu, ‘*Sêlic ij gitôm lau sac si dañ.*’ Yom dau hêganônj aö, ma gic waê bu ñandô sa. Yomandô, yom nañ sêto pi aö, nañ oc ñandô sa.” ³⁸Ma ñgacsêñomi sêsôm, “Pômdau lic! Bieñ baliñ lu dec sêyêc.” Ma Yisu sôm, “Gitôm.”

Yisu teñ mbec yêc Lôc Olib

(Mat 26:36-46; Mak 14:32-42)

³⁹Yisu ti ndê ñgacsêñomi sêhu malac Jerusalem sij, ma sêsa sêtêtj Lôc Olib si. Têtj daêsam su sêkac sa sêmbo gameñ dinañ. ⁴⁰Iñ hóc asê ma sôm têtj ñac, “Ateñ mbec bu lêtôm tap mac sa dom.” ⁴¹Goc ij hu ñac sij ma sa ñasawa sauñ gi, pônj haduc ma teñ mbec bocdec bu, ⁴²“Damañ, am bu tac whij, dec kôc laclhu ñawapac-nga dindec su yêc aö. Tigeñ êmkuc aneñ tac whij dom, kôm tôm am daôm nem atac whij bu kôm.” ⁴³Ma añela undambê-nga dañ hoc dau asê têtj ij, ma kôm ij licwalô sa. ⁴⁴Yisu pô sim dau ñandô, ma teñ mbec ñañga, ma ij ndê wahêñ kêc sip nom gitôm dac.

⁴⁵Iñ teñ mbec su, goc tisa ma mbu têtj ij ndê ñgacsêñomi gi, ma gêlic bu ñac sêyêc bêc sêyêc. ñac si ñalôm ñawapac kôm ñac kwapac. ⁴⁶Ma ij uñ ñac sa goc ndac ñac, “Tu sake-nga mac ayêc bêc ayêc? Atisa mac ateñ mbec bu lêtôm tap mac sa dom.”

Sêkôc Yisu dôn

(Mat 26:47-56; Mak 14:43-52; Jon 18:1-11)

⁴⁷Yisu sôm yom dau mbo, ma ngacsênjomi 12 si danj, nanj sêsam bu Judas, nanj hôc asê ma wê lau tonj atu sêwhinj inj. Inj kêsêlêrj têtj Yisu bu ngutô inj, ⁴⁸magoc Yisu ndac inj, “Judas, bocke? Am bu ngutô Îamalac ndê Atu tu bu hoc inj asê, a?” ⁴⁹Lau nanj sêmbo sêwhinj Yisu, nanj sêlic gêtj nanj bu hôc asê ma sêndac, “Pômdu, yac andic njac njac bienj, a?” ⁵⁰Ma njac si danj puc ndê bienj sa ma pa dabunj-siga njamata-njga ndê njac akiñ ndê danjgalaunj andô-njga su. ⁵¹Magoc Yisu sôm, “Akôm bocdinañ dom!” Ma inj kêmasec njac dau ndê danjgalaunj, ma kôm inj njayham sa. ⁵²Goc Yisu sôm têtj dabunjsiga atu-tu ti lau bata, ma lau sinj sêyob lôm dabunj-njga, nanj sêmernj bu sêkôc inj dôn, “Bocke dec mac akôc bienj ti gêtj sinj-njga ma asa amernj bu akôc aô dôn gitôm njac kanj danj? ⁵³Tôm bêc honj aô gambo gawhinj mac yêc lôm dabunj njagamerj, ma mac akôc aô dôn dom. Tigenj kwahic dec ti mac nem ndoc, ma njac lai njasec-njga gêm gôlinj mac.”

Pita sêc Yisu ahuc

(Mat 26:69-75; Mak 14:66-72; Jon 18:15-18, 25-27)

⁵⁴Îjac sêkôc Yisu dôn, ma sêwê inj sêtêtj dabunjsiga njamata-njga ndê andu si. Ma Pita kêkuc njac mbo ahê. ⁵⁵Yêc dabunjsiga dau ndê andu njatunlôm, lau njatô sêkôm ya golom asê, goc sêndôc sêwhinj dau ma sênjsulu. Ma Pita gi ndôc sic whinj njac. ⁵⁶Awhê akiñ danj gêlic Pita ndôc ya njawê, goc tahê inj ma sôm, “Inj njac dindec inj kêkuc Yisu whinj.” ⁵⁷Tig ernj Pita pa dau ma sôm, “Awhê! Aô kayalê inj dom!”

⁵⁸Îjasawa sauñ ma njamalac danj gêlic inj ma sôm, “Am lau nanj sênjkuc inj, nanj si njac danj!” Ma Pita ô yom ma sôm, “Am njac, mba!”

⁵⁹Acgatu njasawa danj merj gi su, ma njamalac danj tiyham sôm ti njanja, “Îjac dindec inj kêkuc Yisu whinj! Yomandô! Bu inj njac Galili-njga.” ⁶⁰Magoc Pita sôm, “O njac daôm! Aô kayalê yom nanj am sôm, nanj njahu dom!” Inj sôm yom dinañ mbo, ma mbac dalec tanj. ⁶¹Ma Pômdu kac dau kwi ma tahê Pita, ma Pita gauc gêm yom nanj Pômdu sôm têtj inj bocdec bu, “Ôbwêc dindec am oc sêc aô ahuc tidim tô, ma tinjambu mbac dalec oc tanj.” ⁶²Goc inj sa awê gi, ma tanj dau ndu.

Lau sinj-njga sêsu Yisu susu

(Mat 26:67-68; Mak 14:65)

⁶³⁻⁶⁴Lau sinj-njga nanj sêkôc Yisu dôn, nanj sic hu sêsu inj susu. Sêkic inj tandô ahuc njac po, goc sêtap inj ma sêndac, “Am bu propet, dec sôm asê bu asa dec tap am?” ⁶⁵Ma sêpu inj ti sênjwininj inj njac yom sac daêsam.

Lau bata Israel-njga sêmatôc Yisu

(Mat 26:63-68; Mak 14:61-65)

⁶⁶Têtj bêbêc ganduc lau bata Israel-njga, ma dabunjsiga atu-tu ti lau Skraib sêkac sa sêpitigenj, ma sêkênj Yisu kalhac njac anjgô-njga. Îjac sêsôm

têḅ iḅ, ⁶⁷“Am bu Mesaya dau, dec sôm têtḅ yac!” Ma Yisu sôm têtḅ ḅac, “Aö bu wasôm, dec mac oc akêtḅ whiḅ aö dom, ⁶⁸ma aö bu wakêtḅ gêḅdac daḅ têtḅ mac, dec mac oc aö aneḅ yom dom. ⁶⁹Tigeḅ, têtḅ kwahic dec ma ndi, ḅamalac ndê Atu oc ndöc Anötö ḅaclai ḅadau ndê amba andö-ḅga.” ⁷⁰Ma ḅac hoḅ sêsôm, “Bocdinaḅ, am sôm bu am Anötö ndê Atu, a?” Ma Yisu sôm, “Mac asôm solop bu aö dauḅ dindec.” ⁷¹Goc sêsôm têtḅ dandi, “Yac daḅgö yom naḅ iḅ dau sôm su. Dapönda yom daḅ tu taḅgöliḅ pi iḅ-ḅga dom.”

Pailot kêsü Yisu

(*Mat 27:11-26; Mak 15:2-15; Jon 18:29–19:16*)

23 ¹Goc lau hoḅ dinaḅ sêtisa ma sêwê Yisu sêtêtḅ Pailot si. ²Ma ḅac sêḅgöliḅ yom pi iḅ, ma sêsôm, “ḅḅac dindec gêli lau Israel-ḅga ḅalôm sa. Iḅ sôm bu lau sêkêtḅ takis têtḅ Sisa dom, ma iḅ toc dau sa ma sam dau bu Mesaya, kiḅ naḅ lau Israel-ḅga sêkêtḅ bata.” ³Goc Pailot ndac Yisu bocdec bu, “Am lau Israel-ḅga si kiḅ, a?” Ma Yisu sôm, “Tôm naḅ am daôm sôm.” ⁴Dec Pailot sôm asê têtḅ dabuḅsiga atu-tu ti lau hoḅ, “Aö gatap ḅḅac dindec ndê giso daḅ sa dom, bu tamatöc iḅ pi-ḅga.” ⁵Tigeḅ ḅac sêsôm ti ḅaḅga, “Iḅ kêdöhöḅ lau ma gêli ḅac si ḅalôm sa yêc gameḅ Judia-ḅga hoḅ. Iḅ gic hu yêc gameḅ Galili-ḅga ma kôm ḅapaḅ e meḅ têtḅ gameḅ dindec.”

Pailot kêkiḅ Yisu têtḅ Herod Antipas

⁶Têtḅ ndoc Pailot ḅgö yom dinaḅ, naḅ iḅ ndac ḅac bu Yisu iḅ ḅḅac Galili-ḅga, me mba. ⁷Ma iḅ tap sa bu iḅ ḅḅac Galili-ḅga, dec kêkiḅ iḅ têtḅ Herod gi. Herod iḅ ḅḅac naḅ gêm göliḅ gameḅ Galili-ḅga, ma iḅ mbo malac Jerusalem têtḅ têm dinaḅ. ⁸Têtḅ têm Herod gêlic Yisu, naḅ iḅ tac ḅayham atu, bu ḅasawa baliḅ su iḅ tac whiḅ bu lic iḅ. Iḅ ḅgö ḅawaê pi Yisu su, ma kêtḅ bata bu lic iḅ kôm gêtḅ dalö daḅ. ⁹Iḅ kêtḅ gêḅdac daêsam têtḅ Yisu, magoc Yisu ö yom dom.

¹⁰Têtḅ dinaḅ dabuḅsiga atu-tu ti lau Skraib sêtisa ma sêḅgöliḅ yom pi iḅ ti ḅaḅga. ¹¹Goc Herod ti lau siḅ-ḅga sêsu Yisu susu ma sêḅgwiniḅ iḅ. Sêkêtḅ iḅ söc ḅakwê baliḅ gitôm kiḅ sêsöc, ma sêḅkiḅ iḅ mbu têtḅ Pailot gi. ¹²Muḅ-ḅga Herod lu Pailot sêkêtḅ kisa dau, magoc acsalö dinaḅ iḅlu sêhê silip dandi.

Pailot bu êḅgapwêc Yisu

¹³Pailot mbwêc dabuḅsiga atu-tu ti lau bata ma lau Israel-ḅga ḅatö sêpitigeḅ, ¹⁴ma sôm têtḅ ḅac, “Mac aköc ḅḅac dau atêtḅ aö ameḅ, ma asôm bu iḅ gêli lau ḅalôm sa. Aö kasahê iḅ yêc mac aḅôm-ḅga, ma gatap sa bu yom naḅ mac aḅgöliḅ pi iḅ, naḅ ḅahu mba. ¹⁵Ma Herod bocdinaḅ, bu iḅ kêkiḅ iḅ mbu têtḅ yac meḅ. Bocdinaḅ wasôm têtḅ mac bu ḅḅac dau kôm

giso daŋ dom bu dandic iŋ ndu. ¹⁶⁻¹⁷Tu dinaŋ-ŋga aö wakêŋ aneŋ lau sêhi iŋ ŋa sô, ma sêhu iŋ siŋ lhô ndi.” ¹⁸Magoc ŋac sêmbwêc atu sêwhiŋ dau bu, “Kôc iŋ sa ma ndic iŋ ndu! Ma hu Barabas siŋ têtŋ yac.” ¹⁹Barabas iŋ ŋac naŋ ndöc gapocwalô têtŋ ndoc dinaŋ, bu iŋ kégilí lau bu sêndic siŋ, ma iŋ gic lau ŋatô ndu. ²⁰Magoc Pailot tac whiŋ bu êŋgapwêc Yisu su, dec sôm yom ŋaŋga tiyham bu nem ŋac si ŋalôm kwi. ²¹Magoc ŋac sêmbwêc yom ŋapaŋ, “Ndic iŋ pi a gicso dau! Ndic iŋ pi a!” ²²Goc Pailot sôm têtŋ ŋac tidim tó-ŋga, “Tu sake-ŋga? Iŋ kôm giso bocke? Aö gatap yom daŋ sa pi iŋ dom, bu dandic iŋ ndu. Bocdinaŋ aö wakêŋ aneŋ lau siŋ-ŋga sêndic iŋ ŋamlic ŋandê, ma wahu iŋ siŋ.” ²³Tigeŋ ŋac sêmbwêc hôc ahuc ŋapaŋ, bu sêndic iŋ pi a gicso dau. Ma sêmbwêc yom dau e Pailot sôc ŋapu. ²⁴Iŋ gôlôc ma sôm têtŋ lau siŋ-ŋga bu sêkôm gitôm lau dau si yom. ²⁵Barabas, ŋac siŋsêlêc naŋ ndöc gapocwalô tu iŋ gic lau ndu-ŋga, naŋ sêŋgapwêc iŋ su tôm lau sêndac. Magoc Yisu, naŋ sêtec, naŋ Pailot kêkiŋ iŋ têtŋ lau siŋ-ŋga bu sêndic iŋ ndu.

Sic Yisu pi a gicso dau

(*Mat 27:32-44; Mak 15:21-32; Jon 19:17-27*)

²⁶Iŋac sêwê Yisu sêsa si, ma yêc seŋ sêtap ŋac daŋ ŋaê Saimon sa. Iŋ ŋac malac Sairin-ŋga,^j ma iŋ kêsêlêŋ mbo seŋ akêŋ gameŋ ŋamakê-ŋga bu têtŋ Jerusalem ndi. Lau siŋ-ŋga sêkôc Saimon ma sêkêŋ iŋ kêbalaŋ a gicso dau kêkuc Yisu.

²⁷Lau daêsam sêŋkuc Yisu si, ma lauwhê ŋatô sêwhiŋ ŋac, sêhu daŋgibo asê pi iŋ ma sêtaŋ. ²⁸Goc Yisu kac dau kwi ma sôm têtŋ ŋac, “Mac lauwhê Jerusalem-ŋga, ataŋ aö dom! Tigeŋ ataŋ tu daôm-ŋga, ma tu mac nem balêkoc-ŋga. ²⁹Bu ndoc ŋawapac-ŋga oc meŋ sa, naŋ mac oc asôm bu iŋ gêŋ ŋayham bu lauwhê ŋatô ŋac lauwhê gapoc ma sêkôc balêkoc me sêkêŋ su têtŋ balêkoc dom. ³⁰Têtŋ ndoc dinaŋ, lau oc tac whiŋ bu lôc daŋ tip meŋ ma êŋgatôc ŋac si. ³¹Gêŋ naŋ kwahic dec sêkôm têtŋ aö, naŋ gitôm sêkêŋ ya gêŋ a batac. Bocdinaŋ ahêgo daôm pi gêŋ ŋac oc sêkôm tiŋambu-ŋga, oc nditôm sêkêŋ ya neŋ a basô.”

³²Lau siŋ-ŋga sêwê ŋac sac lu sêwhiŋ Yisu, bu sêndic iŋlu ndu sêwhiŋ iŋ. ³³Iŋac sêsa si e sêhóc asê gameŋ naŋ sêsam bu Iŋakêcyha, ma yêc dinde ŋac sic Yisu pi a gicso dau. Ma sic ŋac sac lu sêpi a gicso sêwhiŋ Yisu, daŋ kêgalêŋ andô-ŋga, ma daŋ kêgalêŋ gasê-ŋga. ³⁴Têtŋ dinaŋ Yisu teŋ mbec ma sôm, “Damaŋ, suc aneŋ ŋacyo si sac kwi, bu ŋac sêŋyalê gêŋ naŋ sêkôm, naŋ dom.” Tiŋambu lau siŋ-ŋga sêpuc gapoc bu sêlic ŋac si asa oc kôc Yisu ndê ŋakwê.

³⁵Lau daêsam sêlhac ma tahê Yisu, ma lau bata Israel-ŋga bocdinaŋ. Sêlhac ti sem tô iŋ ma sêsôm, “Iŋ gêm lau ŋatô sa. Iŋ bu Mesaya naŋ

^j 23:26 Sairin - malac daŋ naŋ yêc Not (North) Afrika.

Anötö këyalij sa, nañ nem dau si mañ.” ³⁶Ma lau siñ-nga sêtigasuc ma sêsu iñ susu boc-dinañ. Sêkên wain ñamakic têt iñ, ³⁷ma sêsôm, “Am bu lau Israel-nga si kiñ, nañ goc nem daôm si.” ³⁸Ñac sêto yom kalhac iñ ndê a gicso dau ñahô, nañ sôm, ‘Lau Israel-nga si Kiñ dindec.’

³⁹Ñgac sac dañ nañ kègalên a gicso dau kèpiñ Yisu, nañ su iñ susu ma sôm, “Am Mesaya dau, a? Bocdinañ dec nem daôm si, ma nem alu si awhiñ!” ⁴⁰Tigeñ ngac sac tilu-nga hec yom iñ, ma ndac, “Am töc Anötö, me mba? Yac lau tö dakôc ñagêyô tigeñ. ⁴¹Hêclu dakôc ñagêyô solop, bu hêclu dakôm sac. Magoc ngac dindec kôm giso dañ dom.” ⁴²Goc iñ sôm têt Yisu, “Yisu, têt ndoc am ndöc nem pôn kiñ-nga, nañ gauc nem aö.” ⁴³Ma Yisu ô yom ma sôm têt iñ, “Aö wasôm yomandô têt am bu acsalô lec am oc ndöc †Paradais whiñ aö.”

Yisu mbac ndu

(*Mat 27:45-56; Mak 15:33-39; Jon 19:28-30*)

⁴⁴Têt ac kalhac lhu, ñasec gêm gameñ sambuc ahuc e acgatu gitôm 3 kilok telha-nga, ⁴⁵bu ac gêm ganduc. Ma po baliñ nañ kègalên lôm dabuñ ñalôm, nañ dau kic gi lu. ⁴⁶Têt ndoc dinañ Yisu mbwêc awha atu ma sôm, “Damañ, aö gakên aneñ gatuñ sip am amam!” Iñ sôm yom dinañ su, goc mbac ndu.

⁴⁷Ñgac bata siñ-nga gêlic gêt hoñ dinañ, ma kèpiñ Anötö ma sôm, “Yomandô! Ñgac dindec iñ ngac gitêt!” ⁴⁸Ma lau daêsam nañ sêkac sa su bu sêlic lau siñ-nga sic Yisu pi a gicso dau, nañ sêlic gêt hoñ dinañ e kôm ñac si ñalôm ñawapac, dec sêndahiñ ñasu ma sêlhô si. ⁴⁹Ma lau hoñ nañ sêñyalê Yisu, ma lauwhê nañ sêñkuc iñ akên gameñ Galili-nga, nañ sêlhac ahê ma sêlic gêt dinañ.

Josep kên Yisu ndê ñamlañ yêc hoc ñasuj

(*Mat 27:57-61; Mak 15:42-47; Jon 19:38-42*)

⁵⁰⁻⁵¹Ñgac dañ mbo, nañ ndê ñaê Josep. Iñ ndê malac Arimatiya yêc gameñ Judia-nga, ma iñ ngac ñayham ma gitêt nañ kên bata Anötö ndê gôliñ bu meñ sa tiawê. Iñ lau †Sanedrin-nga si dañ, tigeñ iñ ñalôm whiñ yom nañ ñac sêkic pi Yisu bu sêndic iñ ndu, ti gêt nañ sêkôm têt iñ, nañ dom. ⁵²Têt telha dinañ iñ têt Pailot gi, ma ndac Yisu ndê ñamlañ. ⁵³Goc iñ kôc iñ su yêc a gicso dau, kèpañ iñ ña po ñayham dañ, ma kên iñ yêc sêhô dañ. Lau sêlên sêhô dinañ gwanañ su yêc hoc dañ ñalôm, ma sêkên ngac batê dañ yêc sêhô dau muñ su dom.

⁵⁴⁻⁵⁵Lauwhê nañ muñ-nga sêñsêlên sêwhiñ Yisu têt ndoc iñ meñ akên gameñ Galili-nga, nañ sêñkuc Josep si, ma sêlic sêhô dinañ ti gameñ nañ Josep kên Yisu ndê ñamlañ yêc nañ. Tigeñ bêt dinañ iñ lau Israel si bêt sêmasañ dau tu sêlic om-nga, ma ndoc Sabat-nga meñ kèpiñ. ⁵⁶Bocdinañ lauwhê dinañ sêmbu sêtêt si andu si, ma sêmasañ bu ñamalu ti gêt ñatô

bu sênem oso Yisu. Ma têtj bêc Sabat-nga, ñac sêñwhañ dau tòm yomsu Sabat-nga sôm.

Yisu tisa

(Mat 28:1-10; Mak 16:1-13)

24 ¹Sabat meñ gi su, ma têtj wake ñabêc ñamata-nga, goc lauwhê dinañ sêti têtj bêbêc ganduc. Sêkôc gêñ ñamalau nañ sêmasañ su, ma sêsa sêtêtj sêhò dau si. ²Ma sêlic bu hoc atu nañ Josep kêpi gi tij sê awha, nañ ndöc ñamalau dom. ³Dec sêsôc si, magoc sêtap Pômdau Yisu ndê ñamlañ sa dom. ⁴Sêlhac ma sêhêdaê, ma ñgac lu ti ñakwê ñawasi atu, sêhoc dau asê ma sêlhac sêwhiñ ñac. ⁵Dec lauwhê sêtöc dau, ma sêwec añgô andô têtj nom. Ma ñgac lu sêsôm têtj ñac, “Tu sake-nga mac añsalê iñ nañ mbo tali, yêc lau batê si mala? ⁶Iñ mbo lec dom, iñ tisa su. Gauc nem yom nañ iñ sôm têtj mac muñ su, têtj têtj iñ mbo gameñ Galili-nga. ⁷Iñ sôm bu lau oc sêhoc ñamalac ndê Atu asê ma sêkêñ iñ sip lau sac si amba, ma ñac oc sêndic iñ pi a gicso dau, ma têtj bêc titö-nga iñ oc tisa tiyham.” ⁸Goc lauwhê dinañ gauc gêm yom nañ Yisu sôm muñ su. ⁹Ma ñac sêhu sêhò dau siñ ma sêmbu sêtêtj Jerusalem si, ma sic miñ yom hoñ dinañ têtj ñgacsêñomi 11, ma têtj lau hoñ nañ muñ-nga sêñkuc Yisu.

¹⁰Lauwhê dau si ñaê bocdec. Maria Magadala, Joana, ma Jems dinda Maria, ma lauwhê ñatö sêwhiñ. ñac sic miñ têtj lau aposel, ¹¹magoc aposel sêñgô yom dau gitôm yom ñambwa, ma sêkêñ whiñ dom. ¹²Goc Pita tisa ma kêti têtj sêhò gi. Iñ wec bu töt gwaniñ sêhò ñalôm, dec iñ gêlic po ñambwa nañ yêc. Goc iñ kölhö gi ma gauc gêm yom daêsam pi gêñ hoñ dinañ.

Yisu hoc dau asê têtj ñgacsêñom lu

¹³Têtj bêc tigen dinañ ñgac-sêñom lu sêñsêlêñ sêmbu señ bu sêtêtj malac Emeyas sêndi. Señ akêñ Jerusalem têtj Emeyas, nañ ñasawa gitôm kilometa 11. ¹⁴Iñlu sem yomgalôm têtj dandi, pi gêñ hoñ nañ hóc asê têtj têtj dinañ. ¹⁵Sêñsêlêñ ti sem yomgalôm sêmbu, ma Yisu dau meñ kêsêlêñ whiñ iñlu. ¹⁶Tigen Anötö kôm iñlu tandö ñalêñ kaiñ dañ sa, dec sêñyalê iñ dom. ¹⁷Ma iñ sôm têtj iñlu, “Yom bocke dec amlu asôm têtj daôm ma añsêlêñ ambo señ?” Goc iñlu sêkwê dôñ sêlhac, ma sêwec. ¹⁸Ma iñlu si dañ nañ sêsam bu Kliopas ô yom ma sôm, “Ñaclêñ hoñ nañ sêmbu Jerusalem têtj têtj dindec, nañ sêñyalê gêñ nañ hóc asê. Bocke dec am kêyalê dom?” ¹⁹Ma Yisu ndac, “Gêñ sake?” Ma sêsôm têtj iñ, “Gêñ nañ hóc asê Yisu Nasaret-nga. ñgac dau iñ propet dañ, ma iñ kôm gêñ ma sôm yom ti ñaclai atu yêc Anötö ma ñamalac hoñ añgô-nga. ²⁰⁻²¹Ma yac akêñ batañ su, bu mboe iñ Mesaya nañ Anötö oc êñkiñ bu êñgaho lau Israel-nga su yêc lau Rom-nga amba. Tigen yac mba dabuñ-siga atu-tu ti lau bata Israel-nga sêkêñ iñ têtj lau Rom-nga bu sêmatöc iñ, ma ñac sêkic

yom bu iŋ mbac ndu, ma sic iŋ pi a gicso dau. Gêŋ hoŋ dinaŋ hóc asê iŋ, ma kwahic dec bêc tō giŋga su. ²²Ma bêbêc lec yac mba lauwhê ŋatō sêsôm yom naŋ kôm yac hoŋ asô. Têŋ bêbêc ganduc, ŋac sêtêŋ sêhō si, ²³magoc sêtap iŋ ndê ŋamlan sa dom. Sêmbu sêmeŋ, ma sêsôm bu aŋela sêhoc dau asê têŋ ŋac, ma sêsôm têŋ ŋac bu Yisu mbo tali. ²⁴Lau ŋatō naŋ sêmbu sêwhiŋ yac, naŋ sêsa sêtêŋ sêhō si, ma sêtap gêŋ hoŋ sa tôm lauwhê dau sêsôm, magoc sêlic Yisu dom.”

²⁵Goc Yisu sôm têŋ iŋlu, “O mac lau! Mac nem gauc sa dom. Lau propet sêhoc yom asê pi gêŋ hoŋ dinaŋ gwanan su, magoc mac akêŋ whiŋ gwalec! ²⁶Sêhoc yom asê ma sêsôm bu Mesaya gic waê bu hóc ŋawapac hoŋ dinaŋ, ma tiŋambu tap iŋ ndê ŋawasi sa.” ²⁷Ma Yisu whê iŋlu si gauc sa pi yom hoŋ naŋ Moses ti lau propet sêto hêganôn iŋ, e iŋ whê Anötö ndê yom hoŋ naŋ sêto gwanan pi iŋ, naŋ sa têŋ iŋlu.

²⁸Ŋac sêsuŋ sa malac Emeyas, ma Yisu kôm bu hu iŋlu siŋ, ma êŋsêlêŋ gacgeŋ ndi. ²⁹Magoc sêteŋ iŋ ti ŋaŋga, ma sêsôm, “Mbo whiŋ alu, bu ac pacndê ma sauŋ oc ôbwêc sa.” ³⁰Dec Yisu sôc malac dau gi, bu mbo whiŋ iŋlu. Ma têŋ ndoc sêndôc sic bu sêneŋ gêŋ, naŋ Yisu kôc bolom sa, gêm dange ma pô kôc, goc kêŋ têŋ iŋlu. ³¹Ma iŋlu si tandô ŋawa sa, dec sêŋyalê iŋ. Ma ŋagahô eŋ Yisu aŋgô mba. ³²Ma iŋlu sêsôm têŋ dandi, “Yomandô. Têŋ ndoc iŋ sôm yom têŋ hêclu yêc seŋ, ma whê Anötö ndê yom naŋ sêto yêc, naŋ sa, dec kôm hêclu neŋ ŋalôm kac hêclu ŋandô.” ³³Goc iŋlu sêtisa ŋagahô, ma sêlhô sêmbu sêtêŋ Jerusalem si. Ma sêtap ŋgacsêŋomi 11 sa, ti lau ŋatō naŋ sêmbu sêwhiŋ ŋac. ³⁴Ma ŋgacsêŋomi sêsôm têŋ iŋlu, “Pômdau tisa yomandô, ma iŋ hoc dau asê têŋ Saimon!” ³⁵Goc iŋlu sic miŋ yom pi gêŋ naŋ hóc asê yêc seŋ, ma bu iŋlu sêŋyalê Yisu têŋ ndoc iŋ pô bolom kôc.

Yisu hoc dau asê têŋ sêŋomi hoŋ

³⁶Sêsôm yom dinaŋ sêmbu, ma Yisu hoc dau asê ma kalhac ŋac aŋgô-ŋga, ma sôm têŋ ŋac, “Yom malô whiŋ mac.” ³⁷Ŋac sêsô ti sêtôc dandi ŋandô, bu ŋac gauc gêm bu sêlic ŋalau dan. ³⁸Ma iŋ sôm têŋ ŋac, “Tu sake-ŋga mac nem ŋalôm ŋawapac, ma gauc gêm yom daêsam? ³⁹Alic amaŋ ti gahiŋapa, bu aô dauŋ dindec. Amasec aô, ma alic. Ŋalau si ŋamsôm ti ŋakwa mbasi, magoc alic aô neŋ.” ⁴⁰Iŋ sôm yom dinaŋ, goc tôc amba ti gahiapa têŋ ŋac.

⁴¹Ŋac atac ŋayham babalec, magoc ŋac gauc gêm yom daêsam, ma atac lu-lu bu gêŋ naŋ hóc asê, naŋ gêŋ ŋandô, me mba. Goc iŋ ndac ŋac, “Mac nem gêŋ daneŋ-ŋga ndôc?” ⁴²Ma sêkêŋ i tō dan naŋ sêpec su, naŋ têŋ iŋ. ⁴³Ma iŋ kôc su, ma gêŋ yêc ŋac si aŋgô-ŋga. ⁴⁴Goc iŋ sôm têŋ ŋac, “Gauc nem bu aô gasôm yom têŋ mac muŋ su, pi gêŋ naŋ kwahic dec ŋandô sa. Têŋ ndoc aô gambo gawhiŋ mac, naŋ gawhê sa bu gêŋ hoŋ naŋ sêto pi aô yêc Moses ma lau propet si bapia tilhuŋ, ma yêc Buku Wê-ŋga, naŋ

gic waê bu ñandô sa.”⁴⁵ Ma ij whê ñac si gauc sa pi Anötö ndê yom hoñ nañ sêto yêc. ⁴⁶Ij sôm têtj ñac, “Sêto yom pi Mesaya bu ij oc hôc ñandê atu ma mbac ndu, ma têtj bêc titö-ñga ij oc tisa ma mbo tali tiyham. ⁴⁷Ma sêto bu lau oc sênem mêtê tu ij ndê ñaê-ñga, ma sêsôm têtj lau bu sêkac si ñalôm kwi, dec Anötö oc suc ñac si sac kwi. Ñac oc sêndic hu sênem mêtê dau yêc malac Jerusalem, ma tiñambu mêtê dau oc sa têtj lau gameñ apa-ñga hoñ. ⁴⁸Gêtj hoñ dindéc mac alic gatô su, dec oc ahoc yom ñandô asê pi gêtj dau awhij. ⁴⁹Ma alic! Aö oc wakêtj gêtj nañ aneñ Damañ gic bata su, nañ têtj mac. Bocdinañ ambo malac dindéc e Anötö kêtj ij ndê ñaclai nem mac ahuc.”

Yisu pi undambê gi

⁵⁰Tiñambu Yisu wê ñac sêsa sêtêtj gameñ nañ yêc kêpiñ malac Betani si. Yêc dinañ ij hôc amba sa, ma gêm mbec ñac. ⁵¹Ma têtj têm ij gêm mbec ñac mbo, nañ ij hu ñac siñ, ma Anötö kôc ij sa pi undambê gi. ⁵²Dec ñac sêpôn haduc ma sêmpiñ ij. Ma sêlhö sêmbu sêtêtj Jerusalem si ti atac ñayham atu. ⁵³Ma tôm bêc hoñ, sêkac sa sêmbu lôm dabuñ ñabatêmdö, ma sêhoc Anötö ndê waê asê.